

UPA SABAT SKUL ZIRLAI

NI NETA HRANGIH TIMTUAHAWKNAK

A Ngantu : Norman Gulley

**April, May, June
2018**

Sabbath School Lesson

ແລ້ວມະຈຸດ:ວາວວາ

ບຸກືໍບົດ

ວິຊາພັນ:ສິນ (00244)

ມັນເຟເງົາ

ກັດ:ເຫັນບຸກືໍບົດທີກົນ

ຢູ່ໂຮງໝໍວິຫານ: ລົງກັນ:ມືລື.ນຍົງ
ລົງກັນ.

ထຯຕົກ

ວິຊາທີ່ມເວົາ (01447)

ບັນຍາ

ມົນໆໜັງປົງວິຫານ: ອົງກັນ

ໃຈ ວິຊາກົດລົງກັນ:

ລົງກັນ.

ອຸປະກອນ – 240

ອຸປະກອນ

ປະມາກົດ

A Sung Um Thupawl

(1) Lei Leh van Huap Ih Thu Elawknak	6
(March 31-April 6)	
(2) Daniel Le Can Netnak	16
(April 7-13)	
(3) Jesuh Le Thuphuan Cabu	25
(April 14-20)	
(4) Can Netnak Leh Rundamnak	34
(April 21-28)	
(5) Van Hmun Thianghlim Sungah Bawi Khrih	44
(April 28 – May 4)	
(6) Thukhaam Thlengnak	54
(May 5-11)	
(7) Mathai Bung 24 Leh 25	64
(May 12-18)	
(8) Sersiamtu Biaknak	74
(May 19-25)	
(9) Can Netnak Ih Bumnak	84
(May 26- June 1)	
(10) American Le Babalon	94
(June 2-8)	
(11) Pathian Hminsinnak Le Sahrang Hminsinnak..	105
(June 9-15)	
(12) Babalon Le Armageddon	115
(June 16-22)	
(13) Kan Bawipa Jesuh Khrih Ratsalnak.....	125
(June 23-29)	

Ni Neta Le Bawi Khrih

Jesuh in hringnun a hman laiih a can neta lamah a tirhthlahpawl hnemnak hitin a sim.

“Thin har le beidong in um hlah uh, Pathian zum uhla kei khal I zum uh. Ka Pai inn ah umnak innkhann tampi a um, nan hrangah cuih hmun rem dingah ka feh ding. Cutin si hlah sehla hitin ka lo sim lo ding. Nan umnak ka rem ngah hnuah ka rasal ding ih, ka hnenah ka lo hruai ding. Cule ka umnak ah nan um ve ding. Ka fehnak ding hmunih lamzin nan thei ko” tiah a ti (John 14:1-4).

Jesu in hnemnak thu an hnenih a simmi a san an thei lo ih a thlen ding can khal an thei lo. A pai innah umnak innkhaan tampi a um maw? An hrangah Jesuh in hmun a va remsak sokhaw? Leitlun ih an neih mi hnakih tha sawn a si rori ding.

Hnemnak thu a sim hlanah a dungthluntupawl thawn Jesuh cu can tawite an to ih a ratsal hlanih thil cang ding mipawl kha fiangte in a sim. Cuih a ra thleng ding mipawl cu ngai nuammi a um lem lo. Ral doawknak thuthang, miphun pakhat le pakhat, ram pakhat le ram khat doawknak, mangtaam, hmun tinah linghninnak, hivek riahsiatza ih hramthok ding mi a sim. Hremnak, phiarawknak, bumawknak, harsatnakpawl kan thei ih, a ra thleng rero ding a si.

Ralrinnak thu Jesui a rak simmi an thleng famkim vivo ih cuihpawl cu a tui kan sanah co tha kan ngahnak dingah a si. A thupi bikih a rak sim cia mi thu pahnih a thlen famkim zo mi kan hmu. (1) Dan. 7:25 ih a simmi kum thum le hrek simsung thu kha zabi 6, AD 538 ihsin zabi 8 AD 1798 kumah a netnak a thleng famkim. (Thuphuan 12:6,14; Thuphuan. 13:5; Mipum. 14:34 ah kan hmu thei ve). Simsung thu ih tikcu can reibik ni 2300

thu tla 1844 AD kumah a thleng famkim zo mi kan hmu thei a si.

Danpeksalnak 12:13 ih can netnak thu a simmi kha a tui kanmai san a sinak a fiang zet. Himi thupawl ih a hnukpi Jesui ratsalnak ding a thlen can kan thei lo, kan theih tla a tul lo. Simsung thupawl a thlen famkim ding tiih zum le cuih thil thleng dingmi hrangih rak timtuahawk hi a thupi sawn.

Tu kuata sungih kan zir dingmi cu can netnak thu a si ih, a zaten kan zir theh lo ding. Can netnak thu le cuih canih thil thleng ding mipawl hrangah ziangtin so kan timtuahaw ding timi ih a tumtah mi cu Jesuh ratsalnak hi a si. Cuih can ih leitlun thil thlengmi thu le minung umdan pawl in can netnak thu thawn an pehzomawknak Bible ih a sim mipawl kan zoh tlang ding a si. Himi thuthawn pehaw in Jesuh hi zo a si, ziang in tuahsak, kan sungah ziangtin so hna a tuan, a ratsal tikah ziangso a tuah ding timi Bible ih a sim mipawl an tel ding. Paul ih a sim vekin Bawi Khrih le a thihnak hi kan zumnak hrampi a si. Nan hnenih ka um laiah Khrih le thinglamtah ih a thihnak siar lo thildang ngaihtuah ding ka tum lo (I Korin 2:2 NKJV). Amah kan ruat ringring ahcun amah vek kan si ding, Amah vekih zawnlung kan si ding. Rei lote ah a ra thleng cing ding mi Jesuh in a duhdawt mipawl hrangih a rem mi hmunah kan luh can a thleng ding. Cuih can cu hngak hlap zetin kan thlir ih, cumi hrangah timtuahaw sinsin ding kan si.

*Norman Gulley, Ph.D hi Southern Adventist University
ah Systematic Theology zirnak hmunah hruaitu a si.*

ZIRLAI 1

March 31- April 6

LEI LE VAN HUAPIH THU ELAWKNAK **(The Cosmic Controversy)**

SABAT TLAILAM:

March 31

TUZARH SIAR DING: Ezek. 28:1,2,11-17; Sem. 3:1-7;
Thup. 12:1-17; Rom 8:31-39;
Thup. 14:12.

BIBLE CANG KEN: “**Rul hreng cu nunau nui parah a thin a heng tukih Pathian thukham tluntu le Jesuh ih a phuanmi thutak rinsantu nunau nui tefa hmuah-hmuah do dingah a pok lala**” (Thup. 12:17).

DO-AWKNAK mak kan ti theu mi hi Bible thlirdan a si ih, lei le van huap thudik cuhawknak a si. Lei le van huapih thu elawknak hmun cu hi lei thun hi a si. Sualnak, tuarnak, thihnak, ram khat le ram khat doawk ih ukawknak, thuthangtha sim thehnak pawl hi ni neta ih thil thleng dingpawl an si.

Tuzarh ahcun doawknakih athupi zetnak hmun kan zoh ding. Mi famkim Lucifer thinlung sungin a hung suakih ziangruangah a thok ti kan thei lo. Cuih doawknak in sual nei lo Adam le Eve kha sualah an tluk. Lucifer le Adam le Eve an umnak hmun hi leilungpi hi doawknak hmun a si. Van le lei doawknak ah a thupi bik mi ah kan tel.

Setan parih Jesui nehnak famkim thuthangtha kha ni khatniah a cemzo tiah a ti mi sawn a si. Cross parah

Jesui a tuah famkim zo mi ruangah mikip hnenih pekmi thuthangtha sunlawinak a si. Ka ra rori ding tiah Jesui thu in kami a hngaktu kan zaten nehnak cotu kan si vekin zumngamnak nei in zawnlung dingih kawhmi kan si.

**THAWHSAL NI
MI FAMKIM TLUKNAK**

April 1

Van le lei doawknak hi Bible thlirdan ih kan sim ahcun thusuhnak tampi a suak. A thupi bik mi pakhat cu ziangtin so hi mipawl hram a thok? Thil tha lo sualnak le dodalnak hi a hramthok ih ummi a si lo ti kan thei ziangah ti le duhdawtnak Pathian in lei le van a tuah a si. Thu elawknak hi sersiam miah a tel lo timi le sualnak ih tha man hi a tul lo mi a si tiah fiangten kan thei. Cuti cingin kanmah tla thu elawknak hmunah kan um ih cumi ah kan tel vei.

**Ezek. 28:1,2,11-17 le Isaiah 14:12-14 siar aw.
Lucifer ih tluknak le thil tha lo thu ziangso in zirh?**

Lucifer hi vanih a um laiah mi famkim a si. Amah ihsin sualnak a thok ih, a kiangkap ziangtin so a hnawihhnih thei? Bible in sualih thuthup a relmi hi kan thei ban lo mi thu pakhat a si (2 Thess. 2:7).

Pathian in a semsuahmi hmuahmuah duhhril theinak famkim tein a pek. Lucifer ih tluknak hi a san um lo a si. E.G White in thuk zetih a tarlang mi cu, Sualhram thoknak le a rak umnak san hi simfiang theih lo mi a si Sual hi hramhram in a lutih a luhnak san sim theitu an um lo. Thuthup a sih puhmawh ding zohman an um lo. Kan him theinak dingah cun amah hnen ihsin venhimawk hi a si ko. Sualnak hmun le sual ngailthahnak hmun cu amai parih um sual cemter a tulmi a si. (**The Great Controversy, Pp. 492, 293.**)

Thil tha lo timi aiawhtu ah sual tiah hmang sehla, a tuahmi a langdan thawn a rem sawn. Sual le a umnak san simfiang thei lo mi a si Hramhram in a lut, puhmawh ding dang a um lo. Thuthup a si ruangah suanlam hawl theimi a si lo. A hnen ihsin venhimawk hi kan ti theitawk a si ih, sualnak le a sinak kha cemter tul mi a si.

Zalen zetih duhhril theinak na neih mi ruat salaw? Duhrilnak zalen zetih kan tuahnak thuah fimkhur zet le thlacamnak thawn tuah a tulnak ziangruangah so a si?

**TLAWNGKAI NIKHAT
MILAI THEIH THIAMNAK HNAKIN**

April 2

Sual a hung suahnak a san kan thei thei lo nan, sualnak hi thiam coter theih a si lo. Bible in vanih Lucifer thinlung sung ihsin a thok tiah a sim. Vanih doawknak thu Bible in tampi a sim lo. The Great Controversy timi cabu ah “Sual thawhkehnak” timi calu ah ‘mi hip thei zet’ tiah E.G White cangan mi sungah a um. Leitlunih sual thawhkehnak thu ah Bible ih simmi a fiang zet.

Seemtirnak 3:1-7 siar aw. Adam le Eve ah sualpuh theinak ziangso a um? Thil a langsuk mi ziangso a si?

Pathian ih thupek cia zomi an si nan, hitawk ah Eve ih tonmi thil kha ziangtluk riahsiat za so a si. Pathian ih a rak simmi “Kha mi kha nan tham lo ding, nan ei lo ding, nan ei le nan thi rori ding” tiah Eve in a sim sal (Seem. 3:3 NKJV). Bible sungih thu lo vekih a simmi a um. Pathian in nan tham lo ding tiah a sim lo. Eve ih a theihfiang mi thu cu theirah einak ruangin thihnak a thlenter timi thutak a si.

Cule Setan in hngalhngawng zet le langhngan ih soiselnak a simmi cu Eve hnenah nan thi hrimhrim lo ding tiah rulpi in a ti (Seem. 3:4).

Hi thu ah a ruhlang rori in an danglam NASA. Nunau nu kha Setan in hrawkhrawl zetin a panih, a thnlung duhmi hmakhatte ah a kai ngah. Setan in Pathian thu rinsan tlak lo le zumtlak lo a sinak langhngan in a sim ih, Eve in a do neh thei lo. Eve in a theih lo mi thil ihsin a poi zetmi sualnak a tuah lo. Ka thei hrimhrim lo tiah a sim fawn lo.

A theih zo mi thu kha a poi lo tiah sualnak zin a zawh. Eden human ah humhimnak a tha zet ko nan, Eve himnak dingah a theihnak a rak famkim lo. Adam khalin sual a tuah hnu lawngah thutak a theifiang. Sual theihnak lawngin kan rundamnak a famkim ko tiah aatthlak zetin kan ruat ding a si lo. Pathian in ziangso in sim timi kan theih a tulih cumi in zawnlung ih thuthlunnak kan nei ding a si.

Pathian in thu simmi pakhat a nei ih Setan khalin simmi a nei ve, Adam le Eve in kha mi an thei. Setan thu lung dingih duhhrilnak an tuah mi a poi lo tiah thil fate zetih an ruah mi kha kum thawng tampi a liam tikah ziangtluk in so danglamnak a um timi ruatsal aw. Kha vekih palhnak ziangtin so kan hrial thei ding.

**TLAWNGKAI NIHNIH
VAN LE LEI AH DOAWKNAK**

April 3

Kan nu le pa hmaisapawl ih an tluknak kha thil tha lo sualnak le thihnak ih luhnak a si. Sualnak a tuah mipawl in lak hruak thilcang mi parah an lungkim thei lo nan, hnainhoknak, buainak le pawngsualnak dodalawknak le natnak hi anhnon theih mi a si lo.

Thudik cuhawk nak ah van le lei doawk buainak kan reltlang ih, a tha, a felih a dik fawn. Van le lei buainak hramthoknak hi a tui leitlun ih a cang rero mi bangtuk a si ko. Bible sungah tampi a sim ih, Eden ih tluknak kha a

netabik Jesui ratsalnak thlentertu a si. Bible sungah a phunphun ih a langter mi cu doawknak thu a si. Hi thu le hla cuhawknak lakah khawsa mi kan si. Bible in fiangte ih in simmi cu tui thil cang rero lai mi le a liam zo mi ah ziangvek so a si ih, a thupibik mi cu can netnak ziangvek in so a thlen ding ti mipawl a si.

Thuphuan 12:1-17 siar aw. Na mitthlamih a lang theinak dingah lei le van doawknak ziangvek in so na hmuh ve?

Ral donak hmaisabik kan hmuhmi cu lei le van ih doawknak kha a si (Thup. 12:7-9) ih, Michael le Setan timi (Hebru tongih Pathian thawn bangaw mi) doawknak a si. Dodaltu cu Setan timi ralpa tinak a si. Amah cu sersiam mi a si ih, a sersiamtu Jesuh a dodal (Heb. 1:1,2; John 1:1-4).

Doawknak mak hi Setan in a sersiamtu a donak a si. Sersiam mi in sersiamtu dodalnak a si.

Van ih Khrih le Setan doawknak ah Setan a sung ko nan, leitlunah Bawi Khrih naute ih a suah laiah Setan in amah do dingin a pok lala (Thup. 12:4). Himi hmun khalah Setan a sungsal. Cuih hnuah hramlak ram thing hmun khalah Setan a sung. Calvary Cross ahcun Setan kha tho thei nawn lo dingin a neh nan a tlen mi zumtupawl hnenah NASA zetin a dosal lala a si. Himi hi thinnatnak le aithok thinhengnak ruangih ral donak tiah Khrihfa thuanthu ah tampi kan hmu (Thup. 12:6; 14-16). Cuih doawknak cu can cem tiangin a um vivo ding (Thup. 12:17). Jesui ratsalnak can tiangin Setan a sung thotho ding.

Thuphuan 12:10-12 siar aw. Bible cang dangah dodalawknak le thu elawknak sungah himi Bible cang ihsin ruahsan ding ziangso kan neih thei ding?

**TLAWNGKAI NITHUM
CAN CEM TIANG NANGMAH THAWN KA UM RINGRING**

April 4

Pathian zumtupawl in harsatnak an tong ding tiah Thuphuan ih a rak sim mi kha Kawhhran thuanthu ah a tha lamih hmuh dingin a um. Thuphuan 12:6 ih sim mi thu kha Thuphuan 12:14 khalah kan hmu ih kum 1260 sung kawhhran in harsatnak le dodalnak a tonnak thu a si.

Siangpahrang Nero uknak sung ihsin martar a thok ih tuar hmaisa bik tu cu Paul asi. Himi hremnak hi a nasa deuh le nasa lo deuh in zabi tinah a pehzom in a um vivo. Amahte a ra cangmi siatnakpawl, mangtam, linghnin pawl a umnak hi Khrihfapawl ruangah a si tiah dik lo zetin an puhih nun rawng zetin an hrem. Huatmi le rinhleh mi ah an cangih sualnak nei lopawl hek dingah a man cia mi le an heknak man ngah tumtupawl an um. Uktu siangpahrang dodaltu le sakhanak ral tihnung le mi hnaihnoktu le harsatnak thlentertu ah an puh. Amphitheater bualrawnpi sungah sahrang rawlih hlon le nung cingih mei urnak an tong (**The Great Controversy. Pp. 88**).

Cui san laiah nunau timi Kawhhran kha hramlak ramthingah a tlan (Thup. 12:6). Mupi thla pahnih a nei ih a sim duhmi cu bomnak a ngah theinak hmun hla zetah zam hlo dingih pekmi a si. Setan ih a kaih ngah lonak dingin ram car ramthing ah nunau nu kha kilkhawi a rak si (Thup. 12:14). Nasa zetih hremnak a um laiah Kawhhran kha Pathian in a kilhim ringring vekin ni neta ih kawhhran khal a tuah ding.

Ni neta ih tihnungza thil ummi thawn peh zom awknak a um ruangah Khrih in a thluntupawl hnenah a simmi cu 'Nan hnenah can cem tiang ka um ringring ding' tiah a ti (Matt. 28:20 NIV). Martar hremnak tong

dungthluntupawl parih thil thlengmi zoh tikah a sunglawi zetmi thukam hi ziangtin so kan theithiam thei ding (Rom 8:31-39; Matt. 11:28).

Harsatnak mangtam le thihnak khalin Pathian duhdawtnak thawn in then theitu a um lo. A tu le can cemnak ni khalah Bawi Khrih kan hnenah a um ringring. Kan hnenih in umpi ruangah natnak riahsiatnak, harsatnak le thihnak ihsin kan luat ding tinak a si lo. Khavek tong lo dingah thu in kam lo. Kumkhaw nunnak nei dingih thukam mi kan si ih, lei thar le van thar ah kumkhua in kan um ding. Jesui in tuahsak mi a si ruangah harnak lak khalah Pathian in in umpi dingin thukam mi kan si ruangah ruahsannak kan nei. Paul vekin hitawk ih thil ummi ngaihsak lo in ruahsannak a tha sawn mi thawn kan nung thei maw? Paul in a dingmi thuthentu kan Bawipa in cuih ni ah in pek dingmi nehnak laksawng in retsak mi in in hngak. Cuih laksawng cu dingnak sui lukhum a si. Ka hrang lawng a si lo, duhdawtnak thawn amah a hngaktu hmuahhmuah hrangah pek a si ding (2 Tim. 4:8). Hngakhlap zetin a ratsalnak thlirtu kan si ih, himi ruahsannak le thukam mi hi ka ta a si kan tin gam kem?

**TLAWNGKAI NILI
DAAN THUKHAAM LE THUTHANGTHA**

April 5

Seventh-day Adventist kan si vekin kan hmin kan dinpi a tul. Seventh-day timi in ni sarih sabat a tarlang ih kan zummi a langter. Khami pakhatte lawng kan zum tinak a si lo, a zaten kan zummi a sitheh. Adventist timi in Jesuh ratsalnak kan zummi a langter. A voi khatnak Khrih a ratnak in remnak in tuahsak mi ih a thumaw mi thutak a si. Seventh-day Adventist timi kan hmin hi a hmun ringring

mi thutak thawn then theih lo thukhaam le thuthangtha kha a tarlang.

Thuthangtha le thukhaam naihaw zetih an pehzomawknak hi mi Bible cangpawl in ziangvek in so a langter.

- Jeremiah 44:23
 Rom 3:20-28
 Rom 7:7

Thuhla tha hi thuthangtha a si. Pathian thukhaam kan buarih misual ah kan cang. Cross parah Khrih ih in tuahsak mi ruangah sual ngaidam mi kan si. Cule kan buar zo mi Pathian thukhaam zawnlung teih thlun thei dingah thilitheinak in pek ih, thukhaam thlun thei ah kan cang.

Doawknak mak a si vekin thinhengnak le nunrawng zetin a tuan ih ni neta khalah a tuan thotho dingih cumi cu mangbang ding a um lo. Hi zawnah Pathian zumtupawl in nun ziaza mawinak in kan langter ding a si.

Thuphuan 14:12 siar aw. Thuthangtha le thukhaam pehzomawknak ziangtin so in sim?

Seventh-day Adventist kan si ih, Pathian thukhaam zawnlung ih thlun ding timi kan thei. Amah ruangih rundam ngahmi kan si ruangah kan sinak sualnak thawng in Pathian duhdawtnak nunpi ih thangso ding kan si tiah ziangtin so midang hnenah kan langter thei ding. Danp. 11:1 le I John 5:3 pawl in himi thuhngetkhoh dingin ziangtiih sawh hnget ding so kan si?

TLAWNGKAI NINGA

April 6

RUAH BET DING: Lei le van ih Pathian sersiam mi hmuahhmuah in duhdawtaw le rualrem teih um ding ti an

thei ko. Cumi cu van mipawl ih lungawinak khal a si ih, anmah sersiamtu khalin a saduhthah mi a si. A ropitnak le sunloihnak langter an duh. Pakhat le pakhat duhdawtaw ih rinsan awknak hi Pathian duhdawtnak ihsin a ra. Cumi ah rem lonak le siatsuahawknak a um lo, vanlam umdan thawn an remaw zet. Asinan himi nun nuamnak pawl hi thil danglam tak in a thlengh theh. Pathian in a sersiam mi hmuahhmuah hnenah a pekmi zalennak kha mi pakhatin a hmang sual ih, cumi cu Khrih dottu Pathian ih cawisan mi hnen ihsin a ra suak a si (E.G. White, Patriarchs and Prophets, Pp. 35).

Duhdawtnak ah rinum timi E.G White ih simmi kha hminsin aw. Duhdawtnak ah rinum zet le rinsantlak si dingah hmual nei le san nei zetih hruai mi kan si. Kan kopi nupi pasal hnenih duhdawtnak a langter mi kha rinumnak a si. Pathian thawn a tuih kan pehzomawknak kha duhdawtnak ih rinumnak a si ih, van khalah hiti thotho a si.

RETLANG DING:

- Doawknak mak ah Setan amah lawng si loin a hnatuannak tiang a takih khiihmuh theitu Bible ih a langmi ziangso kan neih? Setan hi milai thinlung sungih thil tha lo khiihmuhnak lawng si loin taksa pum nei rori a sinak midang in fiangte ih an theih theinak dingah ziangtin so na bawm thei ding?**
- Seventh-day kan si vekin mi sunglawi kan sinak theihawk hi Bible thu tak a si ih, pom harsa zet a si. A mak zetmi cu kan theihnak men in rundam kan si thei lo. Ziangah so a si ding? A tui kan theihnak lawng hi cu a famkim lo, tampi kan theih a tul. Cucu ziangpawl so an si?**

3. Jesui hmai ah tu fangih na tuah rero mi le tonnun na neih mi ziangpawl so an si? Ziangti vekih harsat mangbangnak ah himi tonnun in ziangtin so a lo bawm thei ding?
4. Duhdawtnak ah rinum timi kha reltlang uh. Zumnak zawnlung ih thuthlunnak, thukhaam le zangfahnak karlak an pehzomawkdan theithiam dingah himi pomdan in ziangtin so a lo bawm? Kan pianken, kan sinak in duhdawtnak hi famkim in kan nei timi pomdan hi zalenak thu in ziangtin so in zirh? A tu ah duhdawtnak ah rinumnak ziangtin so kan langter ding?

ZIRLAI 2**April 7-13****DANIEL LE CAN NETNAK****SABAT TLAI LAM:****April 7**

TUZARH SIAR DING: Luka 16:10; Dan. 1; Dan. 2; Dan 3:1-6; Thup. 13:11-15; Dan. 3:13-18; John 3:7; Dan. 4:6.

BIBLE CANG KEN: Siangpahrang cun Daniel hmenah, “Na Pathian hi Pathian dang hmuahhmuah lakah a maksak bik, siangpahrang tlunah Bawi a si ih, mangbangza thil simfiangtu Pathian a si. Himi cu ka thei ziangatile mangbangza thil nangmah in na simfiang so’ a ti” (Dan. 2:47).

HLANLAI Israel-pawl hrangah Bawipa in mangbangza khawkhannak a nei. “Nannih cu keimah hrangih pekmi miphun thiang, I riantu ding Puithiam miphun nan si ding” (Suah. 19:6). Himi uknak ram puithiam, miphun thianghlim, Johovah lawng hi Pathian a si tiah tetti khan in leitlun ah sim phuangtu ding kan si (Isai. 43:10). Miphun thianghlim si dingih Pathian kawh an sinak vekin an nun lo ruangah Babulon sal an tang.

Ral kaihmi harsatnak lak khalah Judah miphunpawl hi Pathian in a thuthangtha simtu dingah pumpak rori in a fial theu ti kan theih a tul. Judah le Israel-pawl an dinhmun a siat zet lai khalah Pathian in Daniel le a rualpipawl kha a tumtah mi tuahsuak dingah a hleice in a hril. Israel miphun hi Pathian ta thianhlimter mi an sinak

theithiam dingah hi minungpawl a hmang ti kan theih theinak phunkhat a si.

An thuanthu hi phuan theh mi a si ko nan ni neta ih kan can thaw cun a danglamaw tuk mi a si. Asinan, an sinak le an ziaza langter mi cu kan hmuh thei dingah a um lai ih santhar minung hrangih tuanvo latu an si. Ni neta ih a nung mipawl hrang lawngah si loin Pathian be lo. Babulon rorelnak zungpi ah fial mi an si vekin leitlun ah tettikhan dingin Pathian ih fialmi le kawhmi an si. An thuanthu ihsin zirsuah mi ziang so kan nei thei ding.

**THAWHSAL NI
A FATEBIK TIANGIH RINUM**

April 8

Thil malte parih a rinum mi cu tampi par khalah a rinum. Thil fate parih rinum lo mi cu tampi par khalah a rinum lo ding (Luka 16:10).

Jesui thusim mi kha zohaw, thil fate parah a poi lo ti a ol tuk. Hivek men titham a si lo an ti theu mi ah kan buai theu. Ziangahtile titlak lo thil tenau a si. A poi lo tiih mi tuahmi vek tuahih mi nun cawn hi kan hmu tam bik. Hi thamtham timi in thil sual dang tuahnak ah ngamnak in pek. Cule that lonak pakhat hnu pakhat in kan tuahih a netnak ahcun a tampi ah a cang.

A tu ih ruahdan kan simmi vek thinlung put le Babulon sal tang Juda tlangval pali ih an nundan Daniel bung khat thuanthu kha ruat aw.

Dan. 1 siar aw. Hi bangtuk hi Israel miphunpawl umdan a si tiah Daniel, Hananiah, Mishael le Azariah pawlin an nun danin an langter (Danp. 4:6-8; Zekha. 8:28).

Midang hnakin a let hra ih an fim cungcuannak kha himi Bible cangin an ei in ziangtin so a langter (Dan. 1:20). Bible cangin a langter mi cu an fimnak le thiamnak

hi Pathian pekmi ti ah a ti. A thianghlim lo mi Babulon ei in pawl ei duh lonak kha Pathian hnenih an rinumnak langter ih zawnlungtei an nun man thlawsuah a si. Ni neta khalah hi bangtuk thil tuahmi rak um hlah sehla rinumnak kan nei thei kem?

Kawhhran khalin kan tul mi kan dil theu mi thutak khal tampi pek zo mi kan si. In pekmi parah rinum le zawnlung in kan um maw? Hmual nei zetin Pathian hrangah tetti khan thei dingah pumpak in ziang vekin so tan kan lak cio ding?

**TLAWNGKAI NIKHAT
DANIEL IH THANGDORNAK**

April 9

Leitlun ah zokhal ih an sim lo hmanah Daniel 2 thu an siarnak ruangah Pathian zumtu tampi an um. Pathian a um ko timi lawng si loin thil hung um lai dingmi a theih thei mi ruangah hmual nei zetin a pehzomter. Himi Bible cangin Pathian ih thil rak theihcianak a fimnak le kan parih thil a thleng mi ruangah Pathian a um rori timi a phuangsuak a si.

Dan 2 siar aw. Pathian a sinak kan pom theinak dingah himi ih in tuahsak mi ziangso a um? Himi Bible cangih a simmi tui san Europe ram kha zoh aw (Dan. 2:40-43). Kum 2600 a liam zo mi san ih Daniel kha mi ramih umdan dik a sim theinak kha Pathian thawn pehzomawknak tel loin a sim thei kem?

A hnenah ah Pathian ih a phuan mipawl kha a dik rori tiah a zumih a pom ruangah mipy hmaiah a phuang ngam. Siangpahrang ih mang a simfiangnak lawng a si lo, theih thei dingih fimnak le theihnak a rakneih mi ruangah porhawknak olten a nei thei ve ko. Asinan, Daniel in porhawk hnakh a tha sawn mi a thei. Amai thlacannak le

midang ih thlacam bomnak kha (Dan. 2:17-23) Pathian an rinsan pumhlumnak a langter. Cuti si lo sehla mifim thiampawl an zaten an thi theh ding.

Siangpahrang ih cawmmi mifimpawl, polthiam le dawithiampawl in siangpahrang ih mang an let thei lonak kha a nehhnu lawngah Daniel in a thei. Midang thawn an bangawk lonak cu van ih a ummi Pathian lawngin thuthup le thuthuk a phuang thei ih amah lawng hi Pathian a si.

Tangdornak nun Daniel ih a neihnak, Pathian a rinsannak ruangah hmual nei zetin tetti a khan thei. Daniel ih tangdornak nun zohthim in kannih teh tangdornak nun ziangtluk tamih langter ding so kan si. Rundam khawkhannak in pekmi kha Daniel in a rak theih mi a si lo. Cui kan theih mi cu Cross parah Jesui tuah mipawl an si ih, khami kha tangdor nun kan neih theinak dingah tangkainak a nei maw?

Cross in tangdornak thu ziangso in zirh? Kha mi in misual kan sinak lawng si loin rundamnak ah Pathian rinsan pumhlum dingah ziangso in sim? Cross tel loih na nunnak ahuarawk ding na neihmi ziangtal a um maw?
(Gal. 6:14)

**TLAWNGKAI NIHNIH
SUI MILEM**

April 10

Dura phairawn ah Hebru tlangval pathum (Daniel 3) thu le (Thuphuan 13) ih Pathian zumtupawl hremnak an rak tuar mi le ni neta ih zumtupawl in an ton lai dingmi kha pehzomawknak an nei a si.

Dan. 3:1-6 kha Thuphuan 13:11-15 thawn zohthim aw. Hi thu pahnih an bangawknak ziangso a si?

Himi thu ih a tumtah mi cu sakhuhanak a si. An pahnih in hramhram ih fialawknak a si. Uktui thuneihnak ih fialmi a si ih, thupek an suah can hi tuanvo latu Pathian ta a si.

Dan. 3:13-18 siar aw. Ni neta ah ziangso kan tong ding ih, ziangtin so kan din thei ding, hi thuanthu kan zirnak ihsin ziangtluk in so in bawm thei.

Leitlun hmuahmuah uktu Nibukhanizar in tlangvalpawl le an biak Pathian kha hmuhsuam in a hnih san. “Zo so ka kut sungin a lo hum theitu Pathian cu” tiah a ti. Can rei lo te ah a lo hum theitu Pathian a ti mi cu a mit rori in a hmu. Cun a simsal mi cu “Shadarak, Mesak, Abenego pawlih Pathian thangthat si ko seh. A van mi a run thlah ih rinum zetih amah rinsantupawl a runsuak ti ih siangpahrang au-aw cu phundang zetin a thang. An nun pumhlum Pathian hnenah an apaw ih an biakmi Pathian siar lo an rian lo ih, an be fawn lo (Dan. 3:28).

Siangpahrang in mangbangza thil a hmu hnu cun tlangval pathumpawl ih an biakmi le an rian mi Pathian zo a si ti a thei fiang.

Tlangval pathum kha meisa sung ihsin runsuak lo sisehla phundang zetin an hmu ding (Dan. 3:18). Meisa sungah kangral ta hai sehla siangpahrang thusuak el in ziangtin so thil dik an tuah ngam nawn ding? Hi thuanthu in a langter mi cu rinsannak, zumnak man ngah lo khalah an dingngamnak kha hmual nei zetin an langter.

Biaknak thu ah cozah thusuak kha ni neta bikih a um tikah anmah vekin rinumten kan um theinak dingah ziangvek in so kan um ding. Thil tenau thu hmanah rinum lo kan si ahcun ni neta ih buainak a ra thlen tikah ziangtin so rinumten kan um thei ding?

**TLAWNGKAI NITHUM
PATHIAN BE LOPAWL LUNG THLENGNAK**

April 11

Dan. 3 ah Nibukhanizar in huham nei Pathian ngaingai a um ti a theihnak thu kha a ngan. Pathian le a thiltitheinak huham theih hi hrinsalnak Jesui simmi rundamnak thu thawn cun an bangaw lo (John 3:7). Dan. 4:30 ih a lang mi thlarau rundamnak lung tlengnak thu a si.

Dan 4:30 siar aw. Kha pa ih biakmi kha ziangso a si? (John 15:5; Tirhthlah 17:28; Dan. 5:23).

Himi Bible in Nibukhanizar in harsatnak a ton laiah huham neihnak ngaingai hi Pathian lawngah a um ih, amah tel loin santlaihnak a neilo tinak thu a zirsuak.

Tluang khawng zetmi siangpahrang kha tangdor zet Pathian fa ah a cang. Dik lo zetih uktu kha mi zangfah thei zet le a fimmci siangpahrang ah a cang. A hmuhsuam ih a nautat mi Pathian ih thiltitheinak a cungnung mi huham a neihnak a tu ahcun a thei ngah hnu cun Pathian tihzahnak a nei sinsin ih a lungawinak sangbik ah a cang. Siangpahrang tlunih thununnak tangah a ummi Nibukhanizar ih a zirsuak mi thatnak kha uktu hmuahmuah ih an zir dingmi a si. Johovah hi Pathian a si ti a thei ih, keimah Nibukhanizar in van Pathian ka thangthat, ka upat ih ka cawimawi tiah a ti. A lamzin a dik, a tuahmi hmuahmuah in a hmun mi a si. Mi hngal cu tangah a thum tiah a ti. **E.G White, Prophets Kings, pp. 521.**

Danpeksalnak 4:35 siar aw. Pathian thu ih thutak Nibukhanizar in ziangso a langter?

Danpeksalnak 4 sungah Jentail pa in Hebru-pawl Pthian thuneihnak a thiltitheinak le a uknak a thei. Hlanlai

kawhhran sungih hi thil cang mi in Pathian huham thawngin Judah-pawl ih tetti an khannak ah Jentail pa in Bawipai thutak a zir suak ngah ih leitlun ah thutak a phuang a si.

John 3:7 siar aw. Ni netabik ih thil cang dingmi tuah dingih thu peknak, Pathian biaknak le hremnak pawl hi thil dang hmuahmuah hnakin can cemnak hrangih kan timtuahawknak dingah Jesuh in ziangso in sim?

**TLAWNGKAI NILI
DANIEL RINUMNAK**

April 12

Danpeksalnak 6 siar aw. A tangih thusuhnakpawl phi aw.

- (1) Dan. 6:4,6 ah Daniel ih ziaza ziangso a sim? A ziaza kan hmuh suak theinak dingah zirlai ziangso kan lak thei ding?
- (2) Thuphuan 13:4,8,11-17 sungah ngan mi ni netabik ih a thleng dingmi thawn a bangaw mi cipciar zetih a simmi Dan. 6 ah ziangso kan hmuh thei?
- (3) Hivek canah Daniel dinhmun ah dingaw ter aw. Thla cam loin anmah thawn tongkam cuhaw in suanlam ziangso nahawl ding? Kiosa thawng sungah an hlonih hremnak a ton can khalah amai nunnak ding ruat loin dingfelnak a tuah vekin ziangtin so kan tuah thei ve ding?
- (4) Daniel kha thlacam tul lo vek a bang nan ziangruangah thla a cam ringring tina ruat dah maw?
- (5) Siangpahrang Darius in Daniel kiosa thawng sungih hlon a si hlanah Daniel biakmi Pathian ih huham a langmi a theih zonak thu ziangso a sim? Daniel in a biak mi le a ren mi Pathian thu siangpahrang hnenah amah rori in fiangten a sim zo timi siangpahrang in ziangtin so a sim?

TLAWNGKAI NINGA**April 13**

RUAH BET DING: Lei can cemnak kan pan rero ih Daniel ih a nganmi simsung thu kan ruat nasat a tul. Khakha kan ton dingmi thuhla thawn an pehzomaw a si. Thlunghar cabu netabik ih thuzirh mi thawn pehawknak an nei. Daniel ih nganmi le John ih nganmi Thuphuan bu kha mi tampi in theih harsa le theih thei lo mi thupawl an si tiah ruat dingin Setan in a duh. Asinan, himi thu zirtupawl in an theihthiam ruangah an lungawinak a si. Dan. 12:10 ah mifimpawl in Daniel ih langnak a hmuh mi kha ni neta ah theih thei lo dingih thuh mi thu a si lo ti an thei. Jesuh in tirhthlah John hnenih a pekmi thuphuan kha sankhat hnu sankhat Pathian zumtupawl hruaiawknak dingih a pekmi a si. Hi cabu siartu Prophet thusimmi a theitu le a thluntupawl cu mi lungawi an si tiah Thuphuan 1:3 ah a sim a si. **E.G White, Prophets and Kings. Pp. 547.**

Daniel cabu hi ram le miphunpawl doawknak le thuthennak khal kan hmu thei (Dan. 7:22,26; Dan. 8:14). Culawng si loin netabik ih harsatnak canah Pathian in amah zumtupawl a luatternak ding khal a si (Dan. 12:1). Daniel cabu ah kan hmuh mi harsatnak hremnak pawl ziangtik can khalah thleng hman sehla timtuahawknak kan neih cio theinak dingin zohthim dingih in pekmipawl tu zarh sungah kan zir a si. Himi thuanthu ih in simmi cu ni neta ih um mipawl in kan hmai ih kan ton dingmi thucah kan theihthiamnak dingah a si. Sahrang hminsinnak, mangbang vansang ih umnak can le hremnak a rak thlen canah Pathian zangfah lainatnak kan tul lai cante ah himi thu kan theih mi in in bawm thei ding. Thildang hnakih kan tulbik mi cu Daniel le a rualpipawl le Nebukhanizar ih tonnun “Piantharnakpawl” an si.

RELTLANG DING:

1. **Dan. 9:3-19 ih Daniel thlacamnak kha siar aw. Thla a camnak in zangfahnak thu a theihnak ziangtin so a langter? Kan thatnak ih kan phu lo mi kan parah zawnruahnak a neih ruangah ziangvek in so in runsuak? Himi thutak hi theih men lawng si loin a takih nunpi ding ziangruangah so a thupit zet?**
2. **Daniel le a rualpi pathumpawl ih an biakmi thu an thlun ruangah ram uktu bawi ih hronak tangah ral tha zetih an ding theinak kha nan zir canah reltlang uh. Hivek thil na tonmi a um ve maw? Nan tonmi thawn an danglamnak a um maw? Hmual nei zetih thuthangtha sim thei dingah himi thu ihsin ziangso kan zir thei?**
3. **Piangthar timi sullam ziangso a si? Kan pianthar a tulnak thu Jesuh in ziangah so a sim?**

ZIRLAI 3**April 14-20****THUPHUAN CABU LE JESUH****SABAT TLAILAM:****April 14**

TUZARH SIAR DING: 1 Kor. 10:1-11; Thup. 12:1-17; Thup. 19:11-15; Efe. 1:20; Thup. 11:19; Thup. 1:10-18.

BIBLE CANG KEN: “**Nehtu ka si! Ka pai hnenih a Bawi tohkham ah ka to vekin nehtupawl cu ka Bawi tohkham ah ka toter ding**” (Thup. 3:21).

THLUNGTHAR kan siar veten a thupi zetmi thutak a lang. Thlunghar le thlung hlun hi then theih lo a si. Thuthangtha cabupawl le cakuat ngan mipawl in a tu le a tu thlung hlun thu kha langhngan in siseh, peh hel in siseh an lak theu. Bawi Khrih amah rori ih rawng a bawlnak langter a si tikah ca thianghlim thu a thleng famkim ding a si tiah a tu le atu a sim (Matt. 26:54,56; Mark 14:49; John 13:18; John 17:12).

Thuphuan bu le Daniel bu in an thusimmi an bangaw ih Thuphuan bu kha Daniel vekih theih thei lo dingmi a si maw? Hitei pahnih in thu bangaw an sim ih, hmun khatih zirtlang ding an si.

Jesuh in Thlung hlun sungih a poimawh zetmi thupawl kha thuphuan sungah a simsal. Thuphuan hi Jesui thu a si ih, (1) Tuah zo mi a sinak, (2) amah zumtui hrangah ziangso a rak tuah, (3) can cemnak ah teh kan

hrangah ziangso in tuahsak ding? Ni neta ih thil thleng ding mipawl ah Jesuh kha hmai tawngtu bik ah ret dingah thuphuan bu ih a tumtah mi a si. Thuphuan bu sung ihsin Jesuh hmuhdan tuzarh sungah kan zir ding.

THAWHSAL NI**April 15****THUPHUAN IH PIANHMANG (OR) UMDAN**

Daniel le Thuphuan hi Bible budang tampi hnakin an thu a bangaw ih, thupi then hnih in a um. (1) Thuanthu, (2) ni neta ih thil thleng dingmi tiah then a si. Hi cabupawl hi theih harsa a hnok zetmi an si. Ni neta ah leitlun pumhuap ih thil thleng dingmi zohthimnak thilpawl a si. Thlung hlunih thilcang mi kan zirsuaknak in a tu kan san le a ralai dingmi sanah ziangso a cang lai ding timipawl kan thlir thei a si. Himi tuahdan hi Daniel le thuphuan in rikhamnak a tuah cuang lo.

1 Korin 10:1-11 siar aw. A tlunih thupawl ziangvek in so a fehpitdan kan hmuh thei?

Dan. 3:6,15,27 le Dan. 6:6-9,21,22 ah thuanthu a si mi hmun pakhat ih thil cangmi a lang ih a hrekkhatpawl tla cu thuphuan sungih can netnak ih thil thleng dingmi a langtertu an si ih, kan dung zarhah kan zir. Himi thuanthu zirnak thawngin can netnak lamah Pathian zumtupawl in an ton ding mipawl thinlung mitthlam ih kan hmuh theinak dingah a si. A poimawh zetmi si khal sehla ngaihsak loih kan um ahcun luatnak famkim ngah thei dingin kan hna a ngam thei kem? Thuphuan ih in zirhmi cu rinum ih nehnak thutiam kam mi kan si.

Thuphuan 1-11 ih thuanthupawl kha famkim lonak um hman sehla, Thuphuan 13-22 sungah can cemnak thu pehzom in a sim.

Thuphuan 12:1-17 siar aw. Himi bung hi tui can thu ah maw, can netnak ih thil cang leh dingmi ah so kan ret ding?

Himi bungah thil phun hnih pehzomaw mi kan hmu thei a si. (1) Setan van ihsin hlon thlaknak thuanthu (Thup. 12:7-9), (2) Naute Jesuh kha Setan ih a donak (Thup. 12:4). Cui hnuah kawhhran hremnak (Thup. 12:14-16). Can netnak ah Setan in a tanglai mi kawhhran a donak thu (Thup. 12:17) pawl an si.

Mi pakhat cun thuanthu kan zirnak ah himi thu a tel ve lo a ti. Kha mi pomdan kha mi tampi ih an cin theu mi an palhnak a si ih, an damsung rei lo te daithlang ih an hmannah san khal a si. A liamcia mi canih thuanthu ihsin zir ding tampi a um ih, hivek palhnak tuah lo dingah ziangtin so kan hrial ding.

TLAWNGKAI NIHKAT

JESUI HMUIHMEL KENG (Images of Jesus)

Apirl 16

A tangih Bible cangpawl siar aw. A rak tuah zo mi, a tuah rero mi le a tuah lai ding mi parah Jesui hmin a phunphunin an ngan. Bible cangpawl in Jesui thu ziangso in zirh?

Thuphuan 1:5

Thuphuan 1:18

Thuphuan 5:8

Thuphuan 19:11-15

Thuphuan 12:6

Thuphuan bu cang malte sung lawngah Jesui hnatiuannak le a sinak phun tampi in a ngan. Voikhat a ratnak ah tuu fa tiih kawh a si ih, cuih a sinak in kan sual

hrang raithawinak in a pekaw. Nannih cu a tharih rawh mi sang nan si theinak dingah thilnu hlun kha hlon uh. Kan lantak tufa Khrih cu raithawinak ah pek a si zo (I Kor. 5:7). Amah cu voikhat a thi ih a tu ah kumkhua hrang nung dingah a thosal zo (Thup. 1:18). A thihnak le a thawsalnak fiangten a langter. Khrih cu nasa zetin a tuar dingih a thih hnu nthumnak ah a thosal ding (Luka 24:46). Thuphuan 19:11-15 sungah leitlun ih a ratsal tikah thuthennak sunlawinak le thiltitheinak a neih mi a langter. Milai fapa in vancung mipawl le a pai sunlawinak thawn a ra ding, an tuah mi vekin laksawng a pe ding (Matt. 16:27).

Nunnak, thihnak le thawsalnak le Jesui ratsalnak tumtahnak nei in kan damsung can tawite ah duhhrilnak ziangvek so kan tuah ding?

TLAWNGKAI NIHNIH

THUPHUAN SUNGIIH PUANTHLAM RIRUANG

April 17

A thupi zetmi thu phun hnih ih then zo hnuah Hebru-pawl ih puanthlam an sakmi thu a umsal. Puan biakinn thu hi a thupi zetmi thu phun hnih sungih khum mi a si lo nan, anmah thawn thu khatih fehtlang mi an si.

Puan biakinn lenglam tual hmaisabik ah mei-ur thawinak biaktheng a um ih, cutawk ah thawinak rannung an that theu. An thah mi tilva thihnak kha Cross hmuhsaknak a si ih, puithiam in hmun thianghlim ah a luhpi ih rawng a bawlnak kha Jesuh thihnak le a thawsal hnuah vanah so in hmun thianghlim sungih a hna a tuannak hmuhsaknak a si. Hihi meisa vannak thuam pasarih lakah Jesuh rawngbawl ih a toihvah reronak a sim duhmi a si (Thup. 1:13).

Thuphuan 4:1,2 siar aw. Ongaw cia ih a ummi sangka in ziangso a khiihmuh. Khami kha khui ah so

a um (Tirh. 2:33; Tirh. 5:31; Efe. 1:20; Heb. 10:12,13; Saam 110:1; Thup. 12:5 khalah kan hmu thei).

Bawi Khrih vanih a kai hnuah van hmun thianghlim ah rawngbawl hram a thok. Cumi ihsin sangka a ong hmaisabik. Thuphuan bu ih Khrih a lang hmaisabiknak cu lei biakinn hmun thianghlim mei vannak thuam pasarih umnak khan le van hmun thianghlim khan hmaisa ih a rawngbawlnak kha a si (Thup. 1:10-18).

Thuphuan 11:19 siar aw. John in hmun thianghlimbik sungih a ummi thukhaam kuang a hmu (Pui. 16:12-14). Van biakinn a ong timi ih a hmuhsak mi ziangso a si ding?

Van ih hmun thianghlimbik ih thukhaam thingkuang ih a langter mi hi el theih a si lo. Thuphuan cabu sung lawngah kan hmu loih, rinsan tlak zetmi lei puan biakinn rawngbawlnak le van biakinn rawngbawlnak ah inn khan pahnih a um ih, lei le van rawngbawlnak an pehzomawknak kan hmu betsal. Thuanthu sungah harsatnak lakih a umnak le Thuphuan cabu sungah ni neta ih thil thleng ding a langter mi ah hnangamnak kan ngah theinak ding a um. Bawipai ni a ra thleng dingmi ah zumtupawl khoh zetih ding thei dingin timtuahawknak ah vanih a ummi hmuahmuah ih lungkimpinak thawn tangtlang in an tuan. Cutin van le lei hi naihaw zetih pehzomawknak an nei. **E.G White, My Life to Today. Pp. 307.**

TLAWNGKAI NITHUM THUPHUAN SUNGIH BAWI KHRIH (THEN 1)

April 18

Bawi Khrih hnatiuan dingmi kha Thuphuan cabu ih tumtah mi a si. Curuangah a hramthoknak ihsin Jesuh KHrih ih thuphuan tiah (Apocalypse is sou Christou) a ti.

A tlangpi ih kan theih dingmi cu (1) Jesui thu phuansuah mi, (2) Jesuh Khrih thuhla phuansuahnak (Thup. 1:2). A thu in "Thuphuan" a si ruangah mi tampi in theihthiam har a si an ti theu. Kan Bawipa cu Bible cabu pawl neitu le phuangtu a si ih, a siartupawl theih thei dingih a tuah lo cun ziangah so a tuah ding?

Thuphuan 1:1-8 siar aw. Jesui thu ziangso in zirh?

Jesuh kha leilung tlun uktu le siangpahrang tiah Thuphuan cabu in a tarlang (Thup. 1:5 NIV). Thuphuan 19:16 ah siangpahrang hmuahmuah lakah siangpahrang tiah a ngan. Leitlun buainak hnaihnoknak karlakah a sunglawi zetmi thuthangtha cu ziangkim tlunih thuneitu Bawi in in duhdawt ih in run. Hivek runtu Bawi neih hi kan hnangamnak bik a si.

Thuphuan 1:5, Bawi Khrih kha tlantu a si tiah fiang zetih phuansak kan si. In duhdawt ih a thihnak thisen thawngin kan sualnak ihsin in luatter zo. Hihi Cross parah a nun hlanih a thihnak thu a sim. Amah in thiam in coter men si loin thianhlimnak nun in pek (I Kor. 6:11). Himi in rundam hnangamnak kan ngah thei. Ziangahtile Jesuh in kan sual in kholhfa saknak a lang. Hihi kanmahtei kan tuah thei lo mi a si.

Thuphuan 1:7 siar aw. Jesui thu ziangso in sim?

Khrihfapawl ih lungphum mero thawn Bawi Khrih a rasal ding thukamnak a si. A rat tikah leitlun mi hmuahmuah in an mit rori in an hmu ding. Kumkhua catuan thukam mi hmuaknak ah harsatnak, buainak le siatnak cu thil hmuahmuah a netnak ah voikhat ah a ra thleng ding.

Thuphuan 1:8 Jesui thu ziangso in zirh? Lei ah hnangamnak kan ngah theinak dingah ruahsannak ziangso kan ngah thei?

**TLAWNGKAI NILI
THUPHUAN SUNGIH JESUH (THEN 2)**

April 19

Thuphuan 1:10-18 siar aw. Jesuh in amai thu ziangso a sim?

Himi ah hmun thianghlim ah Jesuh a dinnak hmaisabik a lang. A thuphuan suahnak hi a ropi tukih John tla Jesui kehram ah a tluk. Jesuh in keimah hi Alpha le Omega, a hmaisabik le a netabik kumkhua a nungmi Pathian ka si tiah a phuangih tih lo dingin a sim. Cuih hnuah a thihnak le a thawhsalnak in ruahsannak a thlenpi. Jesuh kha thihnak thlan thim tawh kaitu a si. Jesuh in John hnenah a simmi kha Martha hnenah a tapa thih ih a simmi John cabu sungih a rak nganmi thu kha a sim sal. Kei cu thawhsalnak le nunnak ka si. Keimah I zumtu cu thi hman sehla an nung ding. Zokhal zumnak nei in ka sungih a nungtu cu an thi nawn lo ding. Himi hi na zum maw (John 11:25,26).

John le Martha hnenah Jesui thusimmi in thawhsalnak ruahsan ding in neih ter. Hihi Khrihfa zumnak lungphum a sim. Himi ruahsannak um lo sehla ruahsan ding ziangso kan neih?

Thuphuan 22:7,12,13 siar aw. Jesui thu ziangso a tarlang.

Bawi Khrih hi Alpha le Omega, Thlung hlunih semtirnak le Thlung Thar ih thuphuan kha a si. Hi cabu pahnih tonawknak cu Bawi Khrih ah a si. Adam pahnihnak ih zawnlung thuthlunnak in Pathian le Adam hmaisa remnak a tuahsak. Zoh mawi lo zetih Adam hmaisa sunghnak kha Adam neta in Setan ih tukforhnak ah nehnak famkim a co. E.G White Comments, The SDA Bible Commentary Vol. 6. Pp. 1092. Jesuh hi a hramthoknak le

a cem netnak a si ih, amai kutin a hramthok ihsin a sersiam ih a cem netnak khalah in sersiam sal ding.

A hram a thokih a net tiang a thlen, himi hi thuanthu zirnak menmen a si lo. Ni neta ih thil thleng leh dingmi thu a si. Thuphuan cabu hi (Apocalypse Iesou Christou) Jesuh Khrih ih thuphuan suahnak a si. Can cemnak ih thil thleng dingmipawl kan zoh kirsal ahcun thil hmuahmuah ih a bulhrampi kha Jesuh a si.

Kan nunnak ih a hrampibik Jesuh si dingah nitinten ziangvek in so kan kilhimawk ding?

TLAWNGKAI NINGA

April 20

RUAH BET DING: Thuphuan sungah Pathian sinak thuthuk a langter ih thawkkhum hmin pek mi a sinak hi thuphuan ti a si ih, on thiang lo tacik khen mi cabu thawn a kalhaw. Thupuan timi cu thil phuansuahnak a si. Bawipa in a tirhthlah hnenah cabu sungih a ummi thu khirhkhan-pawl kha mi hmuahmuah ih zir thei dingah a onsak mi a si. A langter duhmi thutak cu John san lai minungpawl vequin tui ni neta lei can cemnak ih a umtupawl hrangah a si. Himi simsungnak thil thleng tampi ah hlan lai thilpawl an langih a hrekkhat cu a tuah a um rero mi a si. Van lal fapa le thimnak lal karlak ih buainak nasa zetmi kha himi simsung thu ih sim duhmi a si. Lei thar ahcun tlenciapawl ih nehnak lungawinak a taktak in a thleng ding. **E.G White, The Acts of The Apostles. Pp. 584.**

A hramthoknak cabu le a netnak cabu pahnih hi tu zarh sung kan zirmi a si ih, Jesui thu ziang tlukin a tam timi a langter. Thlung Hlun sung hmuahmuah ah Thuanthu vequin thil thleng mipawl a tarlang. Thuphuan bu ah Jesui thu tampi in zirh (Thup. 3:14; Thup. 5:5,6; Thup. 7:14; Thup. 19:11-16). Jesui thu kha Thuphuan

cabu sungah tam zet a ngan. Himi Bible cangpawl hmunkhat ih kan ret ahcun Jesui hmin aiawh ih an hman mi kan hmu thei. Kan hnenih a langter duhmi cu dungthluntupawl hnenih a phuan mi kha a si.

RETLANG DING:

1. **Thlung Thar hmuahhmuah in tlung hlun ih nganmi thu an lak mi kha kan hrangah sullam ziangso a neih? Himi in Bible hi kan zumnak lungphum si dingah le Pathian thu kan sunsak theinak dingah ziangso in sim. Kan kawhhran khawvel le kan pumpak nunah Bible thuneihnak huham a mal vivo lonak dingin ziangtin so kan kilhimawk thei ding?**
2. **Thuphuan cabu le a dangpawl in a tlangpi ih an sim cio mi kha Jesuh a si. Nan zirnak hmunah himi hi ringpi in siar uh. Kan Bawipai ziaza huham le a hnatuannak kha tabavuah (nature) umdan in na hnenah ziangso an lo sim. Himi in ziangvek hnangamnak so na ngah thei?**
3. **Lei pumsa thihnak ihsin ruahsannak kan zir thei mi ziangso a um? Mithi thosalnak thukam mi in ziangvek in so hnangamnak a lo neiter thei?**

ZIRLAI 4

April 21-27

CAN CEMNAK LE RUNDAMNAK

SABAT TLAI LAM:

April 21

TUZARH SIAR DING: John 14:9; Zef. 3:17; John 1:1-3; Rom 8:38,39; Saam 91:15,16; Thup. 14:6,7; Efe. 4:4,5.

BIBLE CANG KEN: “**Hihi duhdawtnak a si, kanmah in Pathian kan rak duhdawt tinak a si lo. Amah in in duhdawt ih a Fapa a run thlah. Cumi cu kan sual thlah raithawinak dingah a si**” (1 John 4:10).

KHRIHFA le sakhaw dang an danglamnak cu a dinsuaktu ih thuzirhnak kha an thupitter. An sakhua dintu in an hrangih a tuahsak mi sim phuan ding kha sa khua dang pawl in an nei ve lo. An sakhua dintu in an hrangih a tuahsak mi le a tuarsaknak um hman sehla a run thei nawn lo. Hivek minungpawl ih an zirh mi cu pumpak zuamnak ih rundam ngahnak lawng a si.

Khrihfa sakhuhanak cun Jesui thuzirhmi lawng si loin kan hrangih in tuahsak mi ruangah rundamnak tiang a tel. Khrih cu tisa in hringnun a hmang (Rom 8:3). Cross ah a thi (Rom 5:8), thihnak in a thosal (I Pet. 1:3) hnu ah vanah rawngbawlnak a nei (Heb. 7:25) Hi hna a tuannak lawngin rundamnak kan ngah thei. Kanmah in tuah theimi zianghman kan nei lo. Thatnak, thianghlimnak, upat tlaknak, thil tha tuah theinak pawl le thatnak pawl kha pathian hmaiah suah pi seh la dodaltu le phiartu vek kan si ding. **E.G White, Faith and work, pp. 24.**

A tui kan san ni neta lamah bumnak le tihnung phunkim karlak ah kan um ih himi thutak sunglawi hi kan hrangah a thupibik mi a si.

**THAWHSAL NI
PA IH DUHDAWTNAK**

April 22

Jesuh Cross par a thlen hlan ni rei lote ah a hnen ihsin minungpawl in pai hnen thlen theinak thu a sim. Cu hnu ah Filipi in, “Bawipa na Pa in hmuh awla, kan lung a kim ding” a ti (John 14:8).

Fillip tong kha Jesuh in ziangtin so a sawn? John 14:9, Pa thu ih a lehnak in ziangso in zirh? Pathian thu ah kan thei sual (or) ruah palh mi thu ah Jesui a sawnnak thu in ziangvek in so theifiangnak in pek?

Mi tampi in thlung hlun Pathian hi thuthentu Pathian a si an ti ih, thlung than Pathian hi zangfahnak, zawnruahnak le sual ngaidamtu Pathian a si, an ti. Himi hi thudik lo a si. Thlung hlun le thlung than Pathian hi danglamnak a um lo sinak thlengaw dah lo mi Pathian a si.

Leitlun ah Khrih a ratnak san pakhat cu Pa Pathian thu ih thutak langter dingah a si. Kum za tampi Pathian ziaza ah ruahdan sual an neih mi kha a karh sinsin. Pathian be lo mipawl hnen lawngah si loin hril mi miphun zumtu hnen khalah a si ve. Leitlun hi thimnak in a tuam theh ih Pathian thuhla ah ruah sualnak le zum sualnak a um. Cuih thimnakah tleunak a thlen tikah Pathian hnenah leilungpi cu a thleng leh ding. Setan ih bumnak huham kha siatter theh a si ding. **E.G White, The Desire of Ages.**

Pp. 22. Himi hi Jesuh leitlun ih a ratnak san a si.

Pathian a thlengaw dah lo. Thlung hlun ih thil thleng mipawl kan thei ahcuh thlung hlun ih Pathian kha thlung than ih Pathian ngil nei a sinak kan hmu ding. Bible ih a

simmi cu “Duhdawtnak Pathian” a si (John 4:8). Kan Pathian a danglam dah lo. “Jesuh hi mi zan tuni le a kumkhua in a danglam dah lo” (Heb. 13:8 NRSV).

Thlung Hlun ih Pathian kha Cross ih thah mi a si ti kan theih a tul. Himi Pathian hi a thin a sau, mi rinum mi ngil nei le zangfah thiam duhdawtnak thawn a khat mi Pathian a si (Suah. 34:6,7). Pathian hi duhdawtnak a tlasam dah lo (Saam 143:8), a dugnthaluntupawl hnenih um hi nuam a ti (Saam 147:11). Pathian in a mipawl hrangah hlawhtlinnak ding tumtah mi a nei ih, ruahsannak a pek (Jer. 29:11). A duhdawtnak sungih a umtupawl hrangah cun a mawh thluk dah loih lungawi zaihla thawn an hnenah a umpi theu (Zef. 3:17). Pa Pathian sinak hi hihnakih tam in thatnak a nei tam sawn a si.

Pa Pathian thu kha Jesui a langter mipawl ruat aw. Himi ruangah hin can tampi Pathian tihzahtupawl hrangah a sunglawi mi thutak le ruahsannak an nei a si ko lo maw?

**TLAWNGKAI NIKHAT
BAWI KHRIH IH DUHDAWTNAK**

April 23

Sualnak in Pathian le milai a thenter ih, an karlakah pehzomaw thei lo in a umter. Cuih thenawknak hi anmahten an komaw theinawn lo. Minung tlaksiatnak in kumkhua siatnak a thlengter. Pathian le minung karlakah khur thukpi a um ih tihnung zet a si. Zohman in sual ruangih thenawknak thubuai relfel theitu an um lo. A thienglim ih a dingfel mi Pathian le minung remaw sal thei dingih tuah theitu an um lo. Pathian thawn kumkhua a ummi, amah rori Pathian vekih sinak nei mi in milai sinak taksa nei in hringnun hmangtu ih kan sual hrangah a pekawk a tul.

John 1:1-3,14 le Fill. 2:5-8 siar aw. Jesuh hi zo a si tiah in zirh.

Bawi Khrih kha a um theinak dingah midang rinsan le bomnak ih ummi a si loih amahten kumkhua a nungmi Pathian a si ih, lenglam langnak men si loin Pathian ngaingai a si. A sinak ngaingai hi Pathian kumkhua nungmi a si. Misual kan zate ai-awh ih thi dingah le milai taksa rori ih Pathian dan thlun famkim dingah milai hringnun a hmannak ah Pathian a sinak a um ringring (Rom 3:23).

Bawi Khrih hringnun a hman tikah midang par ihsin hlawnak ngah duhnak a um lo. Pathian thukhaam a thlun tikah Pathian sinak thawn a thlun lo, minung sidan in Pathian bomnak rinsan in a thlun.

Jesuh kha Pathian sinak famkim le milai sinak famkim a nei a si. A thiltitheinak a thu in ziangkim a kilhim theitu (Heb. 1:3) a si ih, caw rawl einak kuang sungih naute an ihter mi a si (Luk. 2:16). Cuih a sullam cu, “Amah cu ziang hmuahmuah hlanah a rak um zo ih, amah hi ziangkim funkhwam thehtu a si” (Col. 1:17). Amah kha hringnun hmangin naute ih hrinmi a si ih, taksa in siseh, fimmak in siseh a thang vivo (Luk. 2:52). A sullam cu amah tel loih tuah mi pakhat te hman a um lo (John 1:3). Cupa cu Cross parah mi ih thah ruangah a rak thi mi pa a si (Tirh. 5:30).

Hipawl hi Pathian ih in duhdawtnak langtertupawl a si. Khrih ih duhdawtnak hi Pathian ih in duhdawtnak langtertu a si. Khrih ih duhdawtnak hi Pathian ih in duhdawtnak langtertu a si. Curuangah Pathian hnenah lungawi thu sim ding leiba tampi kan nei.

Rom 8:38,39 siar aw. Tui ni kan zirmi ihsin hitawk ah Paul ih a simmi Pathian zumih rinsan ngamnak hmual nei zetin ziangvek in so in pek?

**TLAWNGKAI NIHNIH
THLARAU THIANGHLIM IH DUHDAWTNNAK**

April 24

Pa Pathian ih thu kan theih sual vekin thlarau thianghlism ih thu khal kan theih sualnak tampi a um. Pathian thu midang zirhtu mifim tampipawl in Pa le Fapa duhdawtnak ih pehzomawknak kha thlarau a si tiah an ruat. Pa Pathian le Fapa Jesuh karlak lawngah thatnak a um tiah an ti. An ti duh mi cu Pa Pathian le Fapa Pathian hnakin thiang thlarau kha niam deuh ah ret ih Pathian sinak a nei ve lo an ti duhnak a si.

Asinan, Bible in Thiang Thlarau hi mi pakhat sinak taksa pum nei a si tiah a simfiang. Khrihfapawl in Pa Pathian le Fapa Pathian hmin sal tikah thlarau hmin sal tel a si ve (Matt. 28:19). Thiang Thlarau hi Khrih sunloohnak petu a si ve (John 16:14). Thiang Thlarau in minung sualnak a sim (John 16:8). A riah a sia thei ve (Efe. 4:30). Thin hnem theitu a si (John 14:16), mi bawmtu a si, ruahnak petu ti khalin an ko. Cuih tlunah thiang thlarau hi zirhtu a si (Luk. 12:12), dilsaktu khal a si (Rom 8:26). Sual thianfaitertu tiah (I Pet. 1:2) a ti ih, Jesuh in thiang thlarau kha thutak hmuahmuah sungah hruai luttu a si tiah a ti (John 16:13).

Pa Pathian, Fapa Pathian vekin thiang thlarau in Pathian sinak a nei ve. An pathum in Pathian sinak ah pumkhat an si ih, thumkom Pathian pakhat an si.

Thlarau Thianghlism in Pathian duhdawtnak kha ziangkim parah a langter. Kha mi ah a tuah mi ziangpawl so a si (Luk 12:12; John 16:8-13; Tirh. 13:2).

Thiang Thlarau ih a tuahmi ropibik cu Pathian Jesuh kha minung hringnun hmangih a canternak kha a

si. Jesuh kha Thiang Thlarau thawngih hrinmi a si (Matt. 1:20). Hi thil hi Pathian sinak neitu lawngih tuah thei mi a si.

Thiang Thlarau in Khrih hrangah thil mangbangza a tuah (1) Hmuntin ih a um thei mi Pathian Jesuh kha Mary sul sungah a thlengter ih, van a kainak khalah temtawntu taksa pum thawn vanah a kaipi. (2) Temtawn ih a ummi Bawi Khrih hringnun taksa pum kha leitlun khuaza kipih a ummi Khrihfa in mangbangza an tuah theinak pawl hi minung ih theih thei ban lomi thiang thlarau ih in umpitnak a si.

Curuangah Thiang Thlarau Pathian kha Pa le Fapa Jesuh thawn kanmah aiawh in hna an tuan tlang. Pa Pathian, Fapa Pathian le Thiang Thlarau Pathian hi mi hmuahmuah hnenah zangfahnak langtertu an si ih, rundamnak khawkhangtu tla an si.

Pa Pathian, Fapa Pathian le Thiang Thlarau Pathian pawlih in duhdawtdan an bangrepaw theh. Pathian kumkhua lal ramah rundam kan si theinak dingah an tuantlang.

Rundamnak sunglawi hi ziangvek in so kan thlahthlam thei. Kumkhua ih kan that lan theinak dingah Pa, Fapa, Thiang Thlarau pawlin an tuah cia zo miah in hruai ih cumi ah ziangtluk in so rinsannak kan neih?

TLAWNGKAI NITHUM RUNDAM HNANGAMNAK

Seventh-day Adventist hrekkhatpawl cu rundamnak ah laklawh zetin an um. Hnangamnak nun hrampi theihnak an tlaksam ruangah a si. Thil tha tampi

an tuah mipawl kha santlaihnak a nei lo. An nun lamtuanah rundam hnangamnak an thinlung sungah a um lo.

Jesui nun le kan nunah nasa zetih a danglamnak kan hmu. Nunnak sungih luhnak kotka cu a fiakih a lamzin khal a har, a thleng theitu cu mi malte lawng an si (Matt. 7:14). Himi kan siar tikah awloksong le mangbangin kan um tikah olten zo so a feh lohli thei ding?

Ni neta hrangih kan timlamawk ahcun a tui kan damlai ah rundam hnangamnak, kan neih a tul. Kan hmai ih a ra thleng dingmi ih fehtlang thei dingah thinlung sungih rundam hnangamnak na neih a tul. Thumkom Pathian cun rundamnak ah hna an tuan tlang ti kan thei zo ruangah rundamnak ah hnangamten kan um thei a si.

A tangih Bible cangpawl siar aw. Rundamnak thuah ruahsannak le thlangamnak a ra thlen theinak dingah Pathian ih in tuahsak mi ziangso an si. Ziangvek in so thukamnak in pek.

- Saam 91:15,16
- Joel 2:31,32
- John 10:28
- Rom 10:9-13
- I John 5:11-13

Bawi Khrih thawngin rundam mi kan si ruangah nun thianghlim ih nung dingah thupekmi le kawhmi kan si. Hihi rundam ngahnak dingah a si lo. Rundamnak laksawng in pek mi kha thih tiang hlah loin kan kainget ringring ding. Pathian zumtupawl cun can cem tiang rinumten zawnlung ding kan si. Khrih ih in tuahsak mi

rundamnak ah kan lungkim rori ruangah kan hna a ngam ih, rinumnak le zawnlung in a thu kan thlun sawn a si.

**TLAWNGKAI NILI
KUMKHUA HMUNMI THUTHANGTHA**

Thuphuan 14:6,7 siar aw. A danglam dah lo mi thuthangtha hi ziangso a si?

Hitawk ah danglam dah lo thuthangtha tiah a ti. Hi thu hi hlanlai ih rak um zo mi a si ih, a danglam dah lo thuthangtha neitu cu Pathian a si. A pomih zum duhtu hmuahmuah hrangah pekmi a si. Himi thu in a danglam dah lo mi Pathian duhdawtnak a langter. Cuih thucuh cu leitlun khuazakip ah a thlen a tul. Mi hmuahmuah in co tha an ngah theinak dingah an theih a tul. A thehdarh (simphuangtu dingah) dingah a palaipawl a ko.

Leilung sem hlan ihsin amai hrilcia mi kan si. Amai in duhdawtnak sungah nun thiaghlim soisel ding um loin a hmai ah kan um theinak dingah a si. Jesuh thawngin Pathian fa a lungawinak thlentertu dingah hrilcia mi kan si (Efe. 1:4,5). Kumkhua a hmunmi thuthangtha lawng si loin sim betmi ziangpawl so a neih?

Leilung sem hlan ihsin amai hrilmi kan si ih kumkhua a hmunmi thuthangtha kan sim tikah leilung sem hlan ihsin amah ruangah rundamnak ngah dingin Pathian remruat mi a si.

“Hril mi” timi tongfang zohsal sehla “ruat cia mi” a thlawsuah ram lut ding” a fa cawm’ tiih hman theih a si. (EFe. 1:4,5). Sung thu zoh tikah Amah hnen ihsin kumkhua nunnak ngah dingah Pathian ih lungthlitum a langter. Hi hmuahmuah hi Pathian hi Pthian in kumkhua catuan hrangah a tuah theh (2 Thess. 2:13; 2 Tim.1:9) khalah kan hmu. A zangfahnak fiang zetih a langter mi a si. Hi

ruangah kan tuahnak ihsin rundamnak a ra lo timi le kan famkimnak in kan ngah thei lonak a langter. Himi hi Pathian duhdawtnak ziazza ihsin a hung put suak mi rundamnak a hung langsuk. Thil ziangkim semsuah hlan ihsin amai ruangah rundam dingih hril mi kan si tikah himi thuah ziangtin so kan tuahmi a rolh aw thei ding. Himi thu kan pom ding maw, kan hnong ding timi duhhirlnak lawng kan tuah thei.

Hril mipawl nunah ziang tivek ih langter ding so kan si. Duhdawtnak ruangah nun thiaghlim soisel ding um loin a hmai ah um ding kan si (Efe. 1:4). Himi in a langter mi cu zianghrang ah so hril mi kan si ti mi a langter.

Jesuh a rat sal tikah kumkhua hmunmi thuthangtha kha khuazakip ah phuang dingih kawhmi kan si.

Midang hnenah simphuannak kan neih hlanah kumkhua a hmunmi thuthangtha hi kan nunih nei le kan theifel ding ziangah so a thupit?

TLAWNGKAI NINGA

April 27

RUAH BET DING: Rundam hnangamnak hi kan neih thei mi a si. Asinan, khami ruangah poisak lonak kan nei ding a si lo. Khavek kha rundam hnangamnak fehsualpitupawl ih umdan a si. Himi thuah Jesuh in nasa zetin ralrin in pekmi thu a sim. “Bawipa, Bawipa titu hmuahmuah in vanram an lut lo ding. Ka pai duhmi a tuahtu lawng vanram an lut ding. Cuih ni ah mi tampipawl in, ‘Bawipa, nah min in thu kan sim, nah min in khawsia kan dawi, mangbangza thil tampi na hminin kan tuah,’ an ti ding. An hnenah ka sim dingmi cu, ‘ka lo thei dah lo, that lonak a tuahtupawl ka hnenin tlan uh ka ti leh ding’ tiah a ti (Matt. 7:21-23).

Minungpawl in thihnak thlenpi theitu sualnak pahnih an tuah. (1) Bawipai hminin thil mak tampi an tuah

nan, Bawipai duhmi tuah loin le a thukam a dan vekin an nung lo. Curuangah misualpawl dan nei loih a nungtupawl tiah a ti a si. (2) An tuah thei mi ah an porhaw ih, Bawipa na hminin kan tuahmi a si lo maw? An ti. Pathian hmaiah an dingfel thatnak kha an uaraw ih Jesuh kha an hnong, ziangtik tiang an tuah hrih ding. Kanmah in rundamnak kha Jesui in tuahsak mi zum ih ka ta tiih pomnak lawngin rundamnak kan ngah thei ding. Kanmah ah rundam hnangamnak a um thei loih Khrih ih tuahsaknak lawngin kan ngah. Rundam hnangamnak ngah na duh maw? Jesui dingfel thianghlimnak a lo pekmi rinsan in Pathian thukhaam ih a simmi vekin zawnlungten nungaw, na tulsam mi rundam hnangamnak na ngah ding.

RETLANG DING:

1. **Martin Luther ih a simmi cu, “Ka vun zohawk ih ziangruangih rundam so ka si” ti ka theiaw thei lo. Jesuh ka zohsal tikah mi hlothalau ka sinak ka theiaw. Himi tongfang ihsin a ropi zetmi fimnak ziangso ka sar thei? Himi pomdan hi ziangtin so kan cin ringring thei ding?**
2. **Leilung sem hlan ihsin rundam dingih hril zo mi kan si ruangah himi pomdan hi kan kai ringring ding mi a si. Ziangah so mi hmuahmuah van ih lak dingah a sim lo? Rundam ih lakso lo mipawl kha Pathian ih hril lo mi maw an si? A si lole anmai duhhirlnak an tuah mi so a si? Nan zir canah reltlang uh.**
3. **Do-awknak mak ah Pa, Fapa, Thiang Thlarau a um vekin thil tha lo, Setan a taktak in a um ve timi mitthlam in thate ih hmuthiam dingah hipawl in ziangtin so in bawm?**

ZIRLAI 5

April 28- May 4

VAN HMUN THIANGHЛИM SUNGAH BAWI KHRIH

SABAT TLAI LAM:

April 28

TUZARH SIAR DING: Rom 8:3; John 1:29; Thup. 5:12; Heb. 7:1-28; Heb. 9:11-15; Pui. 16:13; Heb. 9:20-23.

BIBLE CANG KEN: “Pathian in a sangbik hmunah a cawisang ih, hmin hmuahmuah lakah hmin cungnungbik a pek. Jesuh hmin upatnak ah vanih a um mi hmuahmuah siseh, leitlun le lei hnuai ih a ummi hmuahmuah siseh, a hmaiah an khuk an bil ding” (Fil. 2:9,10).

VAN ih hmun thianghlim ah Jesuh a umnak thu kan sim tikah, “Kan ai-awh in khi hmunah a thleng zo ih, Melkhizadek puithiam a sidan in kumkhua puithiam sang a si zo (Heb. 6: 20).

Kan hrangah Jesuh in leitlun ah pumpek thawiawknak hnatuan famkim ih a tuah theh hnu ah, van ih hmun thianghlim ah kan puithiam sang hna a tuannak thu kha thlung hlun sungah fiang zetin a sim (Heb. 10:12).

Tuzarh sung kan hawlsuah dingmi cu vanih hmun thianghlim ah Khrih ih rawngbawlnak a si ding. Minungpawl in can cemnak ih an timtuahawknak ah himi palai hna a tuanmi hi a thupi zet ruangah ralrin pekmi kan si. “Pathian zumtupawl hrangah van hmun thianghlim sungih thuthennak hnatuan hi theihthiam lo ding a um lo.

Puithiam sangih hnatauan le a dinhmun an theih a tul. Cuti a si lo ahcun Pathian beisei vekih zumnak nun langter dingah a har zet (**E.G White, The Great Controversy. Pp. 488**).

Khrin in van hmun thianghlim ah kan hrang ziangso a tuah? Can netnak ih um pawl in kha mi theih-fiang kha ziangah so a poimawh?

THAWHSAL NI **April 29**
RAITHAWINAK SANGBIK (Supreme Sacrifice)

A sangbik raithawinak Khrih ih a tuahmi zirnak hi zumtupawl ni neta hrangih timtuah awknak ah a bawmtu a si. Mi in a tumtah mi hngilh loih a tuah rero ahcun hlawhtlinnak an ngah theu. Asinan, an tumtah mi phenah Cross a um ti an hngilh theu. Kan hrangih a tumtah mi kha Jesuh in in tuahsak theh zo. Himi hi a tawp khawk tleng a tumtah mi a si ih, tlolh ding mi a si lo.

Rom 8:3; I Tim. 1:17; I Tim. 6:16; I Kor. 15:53
siar aw. Pathian in a fapa kha ziangah solei tlunah a run thlah?

Pathian in Bawi Khrih kha leitlun sualnak hrang raithawinak dingah a thlah. Cucu taksa ih a ummi sualnak kha mawhsiatnak a um lonak dingah a si . Himi sullam ziangso a si? Jesuh in thi thei lo Pathian a sinak in thihnak a tuar lo, hringnun taksa a thi thei mi a hrukaw ih kan aiawh in a thi.

Pathian sinak nei Pathian taktak in hringnun a hmang, tangdornak thinlung a nei ih Cross thihnak tiangin a tuar (Fil. 2:6-8). Cross parah Bawi Khrih a thihihmuah mi kha Bawi Khrih a si tiah a langter. Thuthangtha bu li pawlin leitlun sualnak hmuahmuah phurtu Pathian tuufa ngaingai hi Jesuh a si tiah a hnatauan dan le a umdan ihsin an simih an zirh tambik mi a si.

Luka 9:22 siar aw. Khrih thihnak kha thi dingin a tumtah hrimhrim mi a si ti ziangtin so in sim?

Mi hmuhsuannak vuaknak le hremnak thinlung kekkui in Cross parih thihnak a tonmi pawl kha kumkhua thih hloralnak ihsin luatnak ding a ruat lai ah, kannih in a langte ih thil cangmi vekah kan ruat ding a si lo. Himi duhdawtnak hi a tluktu a um lo ih theih famkim theh ti a um dah lo mi thu a si. Khrih kha thi dingih suak mi a si.

Zumnak le zawnlungnak nei in Pathian kan bia ih, a tlasia zo mi minung in duhdawtnak hi ziangtin so kan neih thei ding? Milai tuahthatnak hi santlaihnak a neih lonak Cross in a sinak ngaingai ziangtin so a sim?

TLAWNGKAI NIKHAT **April 30**
PATHIAN TUUFA

John 1:29; Thuphuan 5:12; Thuphuan 13:8 siar aw. Hipawl ih an langter cia mi ziangso a si? Himi an tarlang mi in a thupi zetmi rundam khawkhannak theithiam dingin ziangtin so in bawm?

Tipil petu Johan in Jesuh kha Pathian tuufa a ti tikah Puan biakinn rawngbawlnak a langter. Sual raithawinak hrangih thahmi tuufa ih a khiihmuh mi kha Bawi Khrih a si tiah a langter. Thuthangtha bu li pawlin leitlun sualnak hmuahmuah phurtu Pathian tuufa ngaingai hi Jesuh a si tiah a hnatauan dan le a umdan ihsin an simih an zirh tambik mi a si.

Kan rundamnak ding hrang Jesui hnatuannak a thihnak le a thawhsalnak kha thuthangtha bulipawl in a cem tiangin an sim theh.

Hebru cabu in a hramthok ih a zirhmi cu tuufa vekin sual thawinak ih a pekawk theh hnu cun Bawi Khrih kha van hmun thianghlim bikah puithiam bawibik ih

hnatuan mi tumtah in a sim. Cross parah Jesui thihhnu ah (Heb. 1:3) Puithiam sangbik hnatuannak fiang zetih a simnak a si. Van hmun thianghlim sungih a hnatuannak cipciar zetih a simnak hmun cu Hebru 7:1-28 kha a si.

Hebru 7:1-28 siar aw. Cangantu in Jesui thuhla ziangso a sim?

Lei puan biakinn sungah Aaron tefapawl ih puithiam rawng an bawldan hnakin tha sawnih Jesui rawngbawlnak a sungmurl kha thuk zet le famkim zetin himi cang pawl in an sim. Lei puan biakinn ah puithampawl ih rawng bawsaknak ai-awh in a tu ahcun van hmun thianghlim ah rawng in bawlsaktu puithiam sang kan nei zo. Jesuh kha kan zoh ringring ahcun van hmun thianghlim ih puithiam sang hna in tuansknapawl kan hmu thei ding.

**TLAWNGKAI NIHNIH
KAN PUITHIAM SANG**

May 1

**Hebru 7:24-27 le Hebru 8:6 kha siar aw.
Ruahsannak sunglawi ziangso in pek.**

Puithiam dangpawl ih an tuah thei lo mi rundamnak famkim ih a tulmi hmuahmuah tuah theh dingah sinak famkim neitu le tuah theitu cu Bawi Khrih a si. Sual in tlahsak theitu Pathian kumkhua tlaitluan ih puithiam a si. Khrihfa san hmuahmuah ah duhdawt zet le zawn ruat zetin khawhar riahsiapawl a hnem ih mina a damter, amah zumih rinsantupawl hrangah palai hna a tuansak. Amah kha za ah za milai a Sinan sual cithlah lo mi vekein sual nei loin a nung. Sualnak nei lo asinan minung hmuahmuah ih sualnak a phurih vansang mangbang in thihnak a tuar. Pathian/ minung a simi amah lawngin van hmun thianghlim ah misual hrang palai hna a tuan thei.

Keimah kha keimah ka si a titu khan Cross parah thihnak tuarin mi hmuahmuah hrang a pekmi kha ziangah famkim loin a pek ding timi kha kan ruah dingmi a si.

Hebru 9:11-15 siar aw. Khrih in a thihnak le vanah kan hrang rawng a bawlnak thawngin ziangso congahmi kan neih?

Hebru 9:12 ah Jesui pekmi cu kumkhua rundamnak tiah a sim. Grik tongin ‘redemption’ run ti mi hi tlannak man pekih run ti le thlah zalen le luatter tiih lehlin a si theu. Cumi cu Luka 1:68 ah kan hmu thei ih, Zekhariah in Pathian in a mipawl a vehih a run tiah a ti (NKJV). Khrih thisen kha sual raithawinak hrangah sawisel ding um lo thisen a si. Khrih in tuufa vekein sual thawinak a tuah ruangah rundam suah zalen theinak a nei. A sunglawi mi thuthangtha kha amai hrang si loin kanmai hrang sown a si. Bawi Khrih raithawinak zumih a pomtu hmuahmuah hrangah hmual nei zetih thiltitheinak kha Jesui a pek mi a si.

Himi thu kan ruah cun kan rundamnak kha kumkhua daih in Jesuh in a tuah theh hnu ah, kan ngahmi a si. Kan ai-awh in van hmun thianghlim ah lutin rawng in bawlsak. Khrih in van hmun thianghlim ah kan hrang rawng a bawlnak thu ah ruahsannak ziangso in pek?

**TLAWNGKAI NITHUM
IN SIMSAKTU (OR) PALAI (Our Intercessor)**

May 2

Pathian le minung kha rapthlak zetin sualnak in a thenter. Khrih raithawinak ruangah minung cu Pathian hnenah a thlenpi. Curuangah Pathian hmaiah a tlaitluan in luh theinak kan nei (Efe. 2:18; I Pet. 3:18).

Himi beiseinak hi hnangamnak in petu thirkawn bangtuk a si. Kan hrangah humhimnak hmun a si ruangah khoh zetin kan dingih van biakinn puanzar lan tahrat in hmun thianghlimbik sungah a thleng zo. Jesuh kha kanmai ai-awh in cuih hmun ah a thleng zo. Melkhizadek puithiam sidan in kumkhua puithiam sang ah a cang zo (Heb. 6:19,20). Himi Bible cang ihsin kan hrangah Jesuh in ziangso in tuah sak?

Hebru 9:24 siar aw. Khrih hnataunmi ziangso a ngan?

Kan ai-awh in van hmun thianghlim ah Jesuh in hmai tawnin Pathian hnenah a lut. Jesuh in Pa Pathian hmaiah rundam kan si theinak dingah kan ai-awh in a ding.

Jesuh in kan sual in thlahsak theh zo ti kan pom ahcun Pathian ih ngaidam mi le thianghlimter mi kan si zo. Khrihfa cu a mak zet mi nehnak thukam in pekmi kan si nan sualnak kan tuah theu. Jesuh kha van biakinn thianghlim sungah puithiam sang tuanin kan palai ah a ding. Sualsirtupawl ai-awh in a fehih kan thatnakpawl thawn feh loin Pa hmai ah amai thatnak kha kan thatnak ai-awh ih pomsak dingah a dil. Curuangah a tu le kumkhua in amah ruangah Pathian pantupawl a rundam thei. Kumkhua ih a nun ruangah Pathian hnenah a dilsak ringring (Heb. 7:25).

Mi piangthar Khrihfapawl cun zangfahnak le lainatnak an ngah ringring theinak dingah Khrih kha an hrangah a tul ringring timi thei loin an um dah lo. Khrih ah nunthar ngah ih danglam zetih nun thlengsak kan si hnuah sual thlahsak le ngaithiam tul ah zoso a tuahaw ringring ding? Curuangah Puithiam sang vekin Jesuh kan theihnak hi a sunlawinak ziangruangah so a si?

**TLAWNGKAI NILI
REMNAK NI (The Day of Atonement)**

May 3

Hebru cabu ih in zirhmi cu Hebru miphunpawl in lei puan biakinn rawngbawlnak in van biakinn thianghlim in khiihmuhnak a si. Cuih hmun cu puithiam sang tuanin Jesuh a luhnak hmun a si. Lei puan biakinn rawngbawlnak ah a khan pahnih in a then ih raithawinak hmun le thianhlimawktternak hmun a si. Moses in puanthlam biakinn a sak laiah khan Pathian in a hnenah “Tlangpar ah zothim ding ka lo hmuhmi vek cekci in na sak pei” a ti (Heb. 8:5 NKJV).

Lei puan biakinn rawngbawldan khalah innkhan pahnih a um. Hmun thianghlim le hmun thianghlim bik ti a si. Himi vekin van ih biakinn thianghlim khal a si ve. Leitlun ah remnak tuah ni (remawknak puai ni) hi thuthennak hmuhsaknak a si. Cumi cu hmun thianghlim thianfainak ih a sullam a si (Pui. 16 sungah kan hmu thei). Puithiam sangbik in hmun thianghlimbik sungah kumkhat voikhat a lut (Pui. 16:12-14). Mipi ai-awh in thianfainak hna remawknak a tuah theu.

Hebru 9:20-22 siar aw. Ziangah so tithianghlim le thianfaiter a tul. Pathian thawn remawknak tuahnak ni in Khrih rawngbawlnak ziangpawl so a langter?

Bible tlawngtapawl in vanih hmun thianghlim thianfai tulnak thu hi mak an ti lutuk. Kumkhat voi khat remnak puai ni ih hmuhsaknak cu thubuai rehternak a si tiah an ti. Hebru 9:23 sungih a simmi kha lei hmun thianghlim ah Israel puithiampawl in kumtin Pathian thawn remnak puai an tuah mi ni in Jesuh Khrih van hmun thianghlim ah a taktak in a tuah mi khiihmuhnak a si. Lei biakinn thianghlimbik sungah puithiam Bawibik in thianhlimnak a tuahmi kha van hmun thianghlim ah Khrih

in ni khat ni ah puithiam sangbik hna a tuan ding mi a khiihmuhnak a si. Jesuh in van hmun thianghlim thianfainak a tuahmi kha van ih a kaiso veten a tuah tinak a si lo. Himi rawngbawlnak hmun a tlengnak hi AD 1844 kumah a rak thok mi a si ti kha Daniel cabu kan zirnak ihsin kan thei thei a si. Khrih ih in tuahsak zo mi le van hmun thianghlim ah in tuahsak rero mi ah thumaw in himte ih kan um theinak dingah ni neta ih Khrihfapawl in himi tikcu can sungah kan um ti kan theihawk a tul.

Vancung mi pakhatnak ih a phuanmi cu “Pathian upat uhla a mak saknak thangthat uh. Ziangaatile miphun kip an thuthennak can a tleng zo (Thup. 14:7 NKJV). Thuthennak ih hmuhsak mi cu can netnak kan nai tuk zo timi a si. Himi can a nai zetmi ih kan nunah ziang vekih nung dingin so kan nun in nor.?

TLAWNGKAI NINGA

May 4

RUAH BET DING: Hebru cabu ih a khiihmuh mi cu lei puan biakinn umzia a langter ih, Khrih in lei ah in tuahsak dingmi kan hrang raithawinak le vanah puithiam sang in tuansak ding mipawl a si. Israel-pawl ih puan biakinn hi thuthangtha zirhlaipawl a khiihmuh ringring. Cumi cu Judah-pawl hnenah rundam khawkhannak thu a zirh. Cuihpawl cu raithawinak, palai rawngbawlnak, thuthennak le ni netnak ih sual cem netnakpawl a zirh duhmi a si. Daniel cabu ih can netnak thuhla theih theinak dingah ca siartupawl bawmtu le Khrih in van hmun thianghlim ah a netnak tuanvo lakah hna a tuannakpawl thei dingah in bawmtu a si. Can cemnak hrangah Daniel ih langnak a hmuhmi ih a sim duhmi cu Pathian thawn remnak tuahnak ni ah thianfainak, thuthennak le thiam coternak kha langter in a sim ih, lei can cemnak kha a lamdang ngaingai ding a si. Van biakinn thianfainak le Messiah ih lalnak le puithiam

sang hna a tuannak hi an pehzomawknak a um. Can thennak hi langnak in a langter hmaisa mi cu ca siartu in rundamnak thu kha olten an theihthiam theinak dingah a si. Messiah in vanhmun thianghlim thianfainak a tuah mi ah van Pathian hmaiah sual thianfainak le thuthennak kha a tuahmi a si (Handbook of Seventh-day Adventist Theology (Hager Stown, M.d Review and Herald Publishing Association, 2000). Pp. 394).

RELTLANG DING:

1. **E.G White nganmi zoh ahcun : Hlanlai zumtupawl in an sualnak kha an zumnak ruangah thawiawknak tilva parah sual cu an thum ih lei puan biakinn sung nitinten sual khawlkhawm mi cu kumkhat voikhat biakinn thianfainak ah rannung thisen in an thianfaiernak hi Jesuh van hmun thianghlim ah a takin sualnak a ummi a thianfainak a si. Lei puan biakinn ah sual an rak khawlkhawm mi ruangih a balhter mi kha an thianfaiernak mi in van hmun thianghlim ih a ummi cabu sungih sual hminsinnakpawl kha Khrih thisen in a hloter theh ih a ummi cabu sungih sual hminsinnakpawl kha Khrih thisen in a hloter theh ih, phiatfainak thianhlimternak khiihmuhnak a si. Kha mi tuah hlanlah Jesui remnak a tuahmi ruangah amai parah zumnak nei ih sual sirawtupawl kha nunnak cabu sungah hmin ngansak an si. Kha mi cekfelnak cabu kau ih zohnak kha a rak tuah sungmi a si. The Great Controversy. Pp. 421, 422). Remnak tuah ruangih thathnemnak thil pahnih a ummi kha ziangso an si? Ni neta ah harsatnak tuartu ding Pathian zumtupawl in himi thu theih hi ziangah so a poimawh?**

- 2. Puithiam Hnatuan 16:15,16 siar aw. Thisen ih langter mi kha ziangso a si? Thisen in ziangso a khiihmuh. Thisen suakmi in remnak ni ah a liam zo mi canih sualnakpawl remnak tuahsalnak ah a takih a umter ih, cumi in tui ni kan hrangah ziang sullam so a neih?**

ZIRLAI 6**MAY 5-11****DAN THLENGNAK****SABAT TLAI LAM:****May 5**

TUZARH SIAR DING: Rom 8:1; Rom 7:15-25; Rom 7:1-14; John 20:19-23; Tirh. 20:6,7; Dan. 7:23-25; Thup. 13:1-17.

BIBLE CANG KEN: “Cungnungbik Pathian a relsia dingih Pathian minungpawl a hrem ding. Pathian an biaknak can le Thukhaampawl thleng a tum ding. Pathian minungpawl cu kum thum le hrek sung a uk ding” (Dan. 7:25).

PATHIAN thukhaam elawknak hi ni neta bik thil thleng dingpawl theih thei nak hrampi a si. A hlei in thukhaam a palinak nisarih ni sabat thu kha mi tampi elawknak a si. Rundamnak hi zumnak thawngin Pathian thu ah a ummi vekin Sabat ni zarhiah hmannak tiangin a tel theh. Ni neta minungpawl in Pathian thu lungih nunpitnak in rundamnak thlenpi theitu a si lo ti kan thei fiang. Himi hi dodaltu kan si maw, si lo timi a langfiangnak le hminsinnak pawl a si.

Hihi acozah le sakhuhanak komih thuneihnak in leitlun mi hmuahmuah a tuahter ding tiah Thuphuan 13,14 in a simmi kha mipi parah an thuneihnak zatei a lang tikah cun can netnak ih thil thleng a si dingih oltei theih thei a si ding. Hipawl hi Thuphuan 14:7 thu zoh sehla Pathian in a mipawl kha van le leilung tifinriat le cerhtiput hmuahmuah tuahtu kha biak uh tiah a ti (NKJV). Biak

dingmi cu sersiam-tu a si ih, amah lo biak dingmi a dang a um lo.

Tuzarh ahcun Pathian thukhaam thu kan zir dingih Sabat thu kha zohfiang kan tum ding. Kan kiangkap ih Pathian thukhaam thleng an tumnak thu zirhnak kha kan hrangah ziangso san a neih? Zotei parah so can netnak zamrang in a thleng ding?

**THAWHSAL NI
THUTIAMKAM (The Promise)**

May 6

Rom 8:1 hi Bible sungih thukam ropibik pakhat a si. "Minung sinak dan thlun loin, thlarau dan thluntu cu Khrih Jesuh thawn an pehzomaw ih sual thuthennak in an luat zo (NKJV). Hihi lung lukhuhnak vek a si. Himi ihsin a tha sawn mi ruahsannak kan hmu thei.

Rom 7:15-25 siar aw. Rom 8:1 ih thu kha Rom 7:15-25 in ziangvek in so hmual a neither?

Khrihfa khawvel ah a dik siseh, dik loin siseh elawknak nasa zet a um ih Paul in zumtu pakhat dinhmun ihsin fiang zetih a simmi cu : Sual sinak ngaingai kha a sim. Khrihfa pakhat in hitawk ah ziangvek phun khal in a buai theinak Paul in a sim. An sungih a ummi sualih kaih tangmi ah an thei aw lo. An tuah dingmi an tuah loih, an tuah lo dingmi an tuah. Paul ih a buaipitmi cu daan thu a si loih tisa sinak a si.

Sualnak siseh, thatnak siseh tuah hiarnak nei lo ngaingai an um maw? Hrin thar zo mi Khrihfa nunah hrial thei lo ding mi sual a um thu a sim lo. Zawnlung in Pathian thu thlun tumtu cu a ton dingmi harsatnak a um ringring timi a sim sawn.

Curuangah tongkam lar zet a hmangih "thinlung rethei mi kava si so, thihnak lam I panpitu hi ka taksa

pum ihsin zoin so I runsuak ding?" (Rom 7:24) tiah a tong. Himi thubuai cinfelnak cu Jesuh rinsan in zangfahnak sunghih luttui hrangah "na sual" tiih mawhthluknak a um nawn lo" timi thu sunglawi a sarsuak. Sual a um rori ih zumtupawl tukforhnak an tongih an buai theu. Jesuh rinsan in Pathian thu vekih nun nei zumtu hrangah cun thukham in a mawhsiat thein awn lo. Annih cu tisa duhnak in an feh loih thlarau hruainak an thlun tu an si.

Tui ni kan zirmi Bible cang siarsal aw. Paul ih thusimmi thawn ziangvek in so na kaihkuahawkter thei? Rom 8:1 ih a simmi hi ziangah so a sunglawi mi thukam a si thei?

**TLAWNGKAI NIKHAT
SUAL LE THUKHAAM (The Law and Sin)**

May 7

Khrihfa nun ih a um rori mi sualnak (Rom 7:15-25) thu mizan ah kan rel zo. Himi thu a sim hlanah Paul in thukhaam thu a sim ih, ziangtin so minung in sual an tuah ih, ziangtin so thihnak a suahter timi thu a sim.

Rom 7:1-14 siar aw. Sual le thukhaam pehzomnak ziangtin so a um? Thukhaam ih in runsuak thei lodan ziangvek in so a sim?

Hitawk ah Paul ih thuzirhmi a thupi zet mi pahnih a um. (1) Thukhaam hi buaithlak ah a ruat lo. Ziangah tile a thianghlim ih a tha. A buaithlak mi cu sual a si ih, thihnak thlenpitu a si. (2) Thukhaam in sualnak le thihnak ihsin in runsuak theinak thuneihnak a nei lo. Thukhaam in sual le thihnak ih buainak kha a phorhsuak. Thihnak a tlenter tu sualnak lawng a langter ih a dang tuah theimi a nei lo. Sual thubuai a cingfel thei lo.

Ruat lem loin himi cang an siar tikah (thildang ruat loin) thukhaam dokalhnak ah an hmang theu. Cu tikah

thukhaam 10 hlon hlonak a suak. Hivek hi Paul ih thusimmi thawn an kalhaw. Paul in thukhaam a tul nawn lo tinak pakhat hman a ngan lo. Thudik a suahpi mi cu thukhaam in sual a langter ih, thuthangtha a tulnak a suahpi. Sual langtertu thukhaam hlon theih a si lo tiah a sim. Thukhaam hlon hlonak in sim sehla ziangtin so kan ti ding? Thukhaam hi sual a si kan ti kem? Ti lamlam hlah. Sualnak hi a tha lo ti langtertu kha thukhaam a si. Daan in “mi thil daw hlah” ti hlah sehla midang thil dawt cu sual a si kan ti thei lo ding (Rom 7:7 NKJV).

Rom 7:13 fimkhurten siar aw. Paul in thukhaam a tul ringringnak thu ziangah so a sim?

Thukhaam in thihnak a thlenpi lo, sual in thihnak a thlenpi. Ziangtluk in so sual in thihnak a thlenpi timi thukhaam in a sim. Thukhaam hi a tha mi a si ruangah sual a that lonak a phorhsuak. Himi thu ah a cinfelnak a um lo, himi thu cinfelnak cu thuthangtha a si. Paul ih a simmi cu Khrih rundamnak a ngah zotu cun thlarau ih pekmi nun ziaza vekih um dingah a sim (Rom 7:6 NKJV). Cuih nun cu Jesuh rinsan nun a si ih, a ziaza thatnak, dingfelnak ruangih rundamnak in pekmi zumih rinsannak a langter mi a si.

Thukhaam vekih na nunnak ih tonnun ihsin Pathian zangfahnak na tulnak ziangvek in so a langter?

**TLAWNGKAI NIHNIH
SABAT IHSIN SUNDAY AH**

Seventh-day Adventist kan si vekin kawhhran dangpawl in Daan thupawl a cemih zangfahnak tangah kan um. Thukhaam ih ukmi kan si lo tiih an simmi na thei theu ding. Cemter an duh ngaingai mi cu thukhaam a palinak kha a si. Himi thu an sim duhmi san ngaingai

ziangso a si? Mi tampipawl cun kha mi kha an sim duh taktak mi a si lo. An sim duhmi cu thawsal ni sunloihnak dingah zarh khat sungih a ni khatnak Sunday ni zarh kha sabat ai-awh ih kan ulh mi a si tiah an ti.

Cutin an zumnak Bible sirhsan mi an tuah ve. A tangih Bible cangpawl hi thlung hlun sungih nisarih sabat kha thlung thar sanah zarh khat sungih ni hmaisabik ni Sunday ni ah a thawnnak thu a si tiah Khrihfa tampi in an ruat theu. Kha mipawl siar tikah mahte ih kan ruah dingmi cu zarh ni thawn a sinak thu a sim ngaingai maw? timi a si. Thil thlengmi ni le can thu an sim mi men a si maw timi kha ruat aw. Bible umdan ahcun zarh ni thawn a sinak thu pakhat hman a lang lo.

John 20:19-23 siar aw. Tirhthlah-pawl inn tlunta khan sungah an umkhawm lai thu a simih ziangruangah khatawk ah an um timi a sim. Thawsalnak upatnak ih Pathian an biakkhawmnak thu a si maw?

Tirhthlah 20:6,7 siar aw. Hitawk ah Sabat kha zarh khat sungih ni hmaisa bik ni Sunday ah zarh ni a thawnnak thu a um maw? (Tirh. 2:46).

I Korin 16:1-4 siar aw. Midang bomnak thawhhlawm pek dingmi kha zarh khat sungih ni hmaisabik ni Sunday ni ah nan inn ciarah ralringten rak ret ciar uh ti thu a sim ih, Sabat ihsin Sunday ah zarh ni thawn a sinak thu a simmi a um maw?

Himi Bible cangpawl ah Sabat luahlan thei dingah zarh khat sungih ni hmaisabik thu kha thu rin ih laktlak in a thupitnak laktlak a um lo. Bible lenglam ahcun a thu umdan ih zirin ziangmaw canah zumtupawl Sunday ni ih an tonawknak a um ko. Cuvek ih tonawknak ah biakkhawmnak ruangah Sabat zarh ni ai ah Sunday ah thawn a sinak Bible cangah hmuh ding a um lo. Himi thu a hung suaknak hi Sunday ulh hi nunphung ih a rak neitu

Khrihfia ih ra luttharpawl ih thusuak a si ih, Khrihfapawl in kum za tampi a siar lawngih an siar theu mi men a si. Sunday ulh hramthoknak Bible cangah hmuh ding a um lo.

**TLAWNGKAI NITHUM
THLUNG THAR AH NI SARIH NI**

May 9

Mizan ih kan zirmi vekin Sabatai-awh ah Sunday hman theinak ding Bible ah a um lo. Ni sarih ni Sabat Pathian thukhaam 10 sungah a tel mi ulhnak thu hi Thlung Thar sungah kan hmuh thei mi a um tam sawn.

Luka 4:14-16; Luka 23:55,56 siar aw. Jesui thih hnu le thih hlanah ni sarih Sabat ni an ulhnak thu ziangso in sim?

Jesuh thawn a um tlangmi nunaupawl kha thukhaam ih a ummi vekin Sabat ni ah an colhnak thu kan hmu (Luka 23:56). Hihi Sinai tlangah Pathian in lungtlap parih a nganmi thukhaam pahra lakih a palinak a si. Pathian ih thukhaam a dangpawl le a palinak Sabat ni ulhdan ding le thlundan dingpawl kha zarh ni dang thlengih ulhdan ding Jesuh thawn an um lai ah an zir mi zianghman a um lo. Cuhnak in a dungthluntupawl hnenah Jesui a simmi cu, “Keimah in duhdawttu cun ka thukhaam an thlun ding” tiah a ti (John 14:15). Thukhaam thlun nun amah in a nei ih ni sarih Sabat ni khal a ulh dan kelin a ul. Sunday ni hi Sabatai ah hman ding thu hi nunaupawl in an theih mi zianghman an nei lo.

Tirhthlah 13:14,42-44; Tirhthlah 16:12,13 siar aw. Ni sarih Sabat ulhnak ding thu hitawk ih thil thlengmi in ziangso in sim? Zarh khat sungih ni hmaisabik ni Sunday ni ulnak thu in simmi teh a um maw?

Hipawl ah Sabat ni zarh ulhdan kha Sunday ni zarh ulhdan ah a thawnnak tla a um lo. Jesuh zumih a dingfelnak rinsan mi zumtu hmaisapawl in Sabat ni an ulhnak kan hmu sawn.

Tirhthlah 16:13 ah a mak zetmi thu a um ih tirhthlahpawl kha zum tu mi dangpawl thawn Sabat ni ah biakinn um lonak hmunah an tongaw. Zumtupawl cu tiva ralah thlacam khawmnak an tuah theunak hmunah an tongaw. Kha mi kha Jesui thih hnu kum tapi a liam zo hnuah a si ih, hi thu hi Sunday ulhnak ih ni zarh thawnnak sisehla a thawnnak thuhla lang loin a um lo ding.

Sunday ni ultu Zentail-pawl hnenah an ni zarh upat loin le soisel loin ziangtin so Sabat ulh dan ding thu na sim ding?

**TLAWNGKAI NILI
SABAT NI ZARH THAWN TUMNAK**

May 10

Pathian thukhaam (10) hi a hmun ringring (Jame 2:10-12). Cumi sungah Sabat a tel. Khrihfia tampi in Sunday zarh ni ih ulh theinak thu um lo cingin ziangah so an ul a si ding?

Leitlun rampi uknak pali a hung suahnak thu Dan. 7 sungah a um. Babulon, Medopersia, Grik le Rome pawl an si. A palinak hi lei can cem tiangin uktu a si ding. A netabik ah thuneihnak nasa zet aneimi Kifate hi Rome ram sung hmuahmuah ah a athu neih nak karh vivo ding. Cuih thuneihnak cu Pope thuneihnak a si ih, Rome khua ihsin a hungsuak. An thuneihnak kha tui ni khalah ziang mawzat cu a tanglai. AD 1600 hrawngah Thomas Hobbes in hitin a ngan, “Sakhua thuneihnak ropi a suahnak thu ruat ahcun Pope thuneihnak olte ih theih thei ding a si. Rome cozah uknak a tlaksiat hnu ahcun a thi cia mi par

khalah thuthen theinak neitu kha lal lukhum khumin lal tohkham ah a to. Thomas Hobbes Leviathan, (Oxford: Oxford University Press 1996). Pp. 463.

Dan 7:23-25 siar aw. Sunday ni zarth ulh hramthoknak theithiam dingah ziangtin so in bawm?

Himi tongfang a hmanmi kha a hramthok ahcun Aramic tongih ngan mi a si. Cang 25 ih Kifate thuneihnak in Daan thukhaam thleng a tum ding tiin a um. Lei thuneihnak in van thuneihnak ih tuahmi Pathian thukhaam a thleng thei kem?

Asinan, thuanthu cabu sungah cipciar zet le fiangten ngan mi a um lo. Kan hmuuhmi cu Sunday ulhnak nunphung a neitupawl in ni sarih Sabat ni aiah an thleng mi nunphung cu Sunday ul Protestant remthatupawl in an ulh ruangah tui san AD 21 tiangin a nung ringring mi a si. Tui ni Protestant mi tam sown cun Sunday ni zarth ulhnak kha Bible sung thukhaam (10) ih a ummi Sabat ulhnak hnakin a thluntu an tam sown.

Thuphuan 13:1-17 kha Dan. 7:1-8,21,24,25 thawn zohthim aw. Ni neta thuhla thei thei dingah a bangaw mi ziangso an langter.

Daniel ahcun langhngan in a langter ih, Rome ah Pope thuneihnak rasuak ding thu a lang. Thuphuan ahcun uktu Bawi pawl thuneihnak ih fialmi "Biaknak" duh loih dodaltupawl suupawknak um loih hremnak kha ni neta lamah a um ding mi a lang.

Thuphuan 14:6,7 ah cang 7 nak ih tongfang in ziangvek in so thukhaam a palinak thu a langter. Suahlannak 20:11 hi ni netnak ih biaknak thubuai ah Sabat hi a thupibik a si ding tiah ziangvek in so a langter?

TLAWNGKAI NINGA

May 11

RUAH BET DING: Setan kan timi rulhreng cu van ah Pathian thawn an doaw (Thup. 12:7). Amah kha lei ah Pathian zumtu le thukhaam a thluntupawl dotu ralpa a si. Thuphuan 12:17; Thuphuan 13:2,4 khalah a um. Setan amah rori kha an biakmi ah a cang (Thup. 13:4). Van ah Setan in Pathian a do ih, ral a tho. Cuih doawknak cu leitlun tiangin a pehzomaw vivo. Pathian a donak bik cu thukhaam 10 a daan thu ah a si.

Thukhaam a palinak in lei le van tuahtu Pathian sinak a langter. Cumi in Pathian dang hmuuhmuah Pathian lem an sinak a langter. Ni sarih ni kha thianhlimter mi ni minungpawl ih colh umnak ni ah pekmi a si. Cucu sersiamnak hngilh lonak dingah a si. Cumi cu minung thinlung sungah a nungmi Pathian kha hmaisabik ah retih tihzah ding le biak ding a si timi hminsinnak dingah a si. Setan in rinum zetih Pathian thukhaam thlunnak ihsin rinum loih um dingah le zinpeng zawh pi dingah a zuam rero. Curuangah sersiamtu Pathian a sinak langtertu, thukhaam kha do a tum mi a si (E.G White, The Great Controversy. Pp. 53.54).

Pathian kan biaknak a sanbik cu van le lei sersiamtu a si ruangah a si. Cuih ni sarih sabat cu sersiamnak lungphum hngouh san ih sersiamtu ih hminsinnak a si. Cun, zarth khat sungah lei le van sersiam a sinak in theihter saltu hminsinnak a si (Sem. 2:1-3). Ni sarih sabat hi Pathian thuneihnak hrampi a si ih, thuneihnak sangbik a neitu ih amah dottu Setan in Pathian thuneihnak a dodalnak hi mangbang ding a um lo.

Ni netabik ah Pathian in a lamtang mirin um leitlun ah a nei. Cu mipawl in Pathian thukhaam a zaten a thlunih sersiamtu langtertu umsun Sabat ni ah biaktlak Pathian kha an biak.

RETLANG DING:

1. Pathian thukhaam a tul lo tiih an hnon hnu ah, sual a um rori timi thu an simnak ah thubuai ziangso a um? Kha mi ah nasa zetin an pehzomawk thei lonak kawhhmuh thei mi ziangso na neih?
2. Sabatai ah Sunday ulh a si tiih thu elnak ah tonnun na neih mi ziang a um? Ziangtin so an thu na el theu, ziangvek ih hlawhtlinnak so na neih? Ni sarih Sabat ulhnak hi tuahnak ih rundam tumnak a si tiih thu elnak suahpitupawl kha ziangtin so na phi theu?
3. Ni neta ih thil thleng dingmi hrang timtuahawknak ah le Sabat thu midang thawn reltlangnak ah a ra thleng cing dingmi sahrang hminsinnak thu kha fiang zetih sim thei ding ziangah so a thupit?

ZIRLAI 7**May 12-18****MATTHAI 24 LE 25****SABAT TLAI LAM:****May 12**

TUZARH SIAR DING: Matt. 24:1-25; Thup. 13:11-17; Matt. 7:24-27; Luk. 21:20; 2 Siang. 23:13; Matt. 25:1-30.

BIBLE CANG KEN: “Messiah deu le Profet deu pawl an suak ding ih, mi bumnak ah mangbangza hmuhsaknak mak ngaingai an tuah ding. A cang theitawk in Pathian hril cia mipawl hman an bum ding” (Matt. 24:24).

MATTHAI 24 le 25 sungah Jesu in a thupi zet mi thutak ni neta hrangah ziangtin kan timtuahaw ding timi thu a sim. Jesuh in ni neta ih thil thleng ding mipawl kha himi bungpawl ah in zirh. A rei hlanih thil um ding mipawl le amah zumtupawl parih a thleng ding mi harsatnak an tuar ding mi kha a hmu.

A tirhthlahpawl hnenih a simmi kha sankhat hnu sankhat can netnak ni tiangih a um mipawl hrang khalih a simmi a si. Jesuh in lamzin nuamih feh dingah in sim lo. Do-awknak, ralhriamnam tuahnak, leitlun siatnak, Khrih deu le leitlun thilah siseh, kawhhran sungah siseh, hremnak tampi a um ding thu kha a sim. A rak simmipawl kha mak zetin an thlen famkimdan kan hmu thei. Curuangah kan sanih a thlen famkim lo hmanah a rak sim mipawl kha kan zum ding a si.

A ra thleng ding mi thu lawng hrangah Jesuh in ralrinnak thu a sim lo. Milai fapa rat zik zawngah zokhal daithlang lo le ralrin thiam dingah tahthimnakpawl tla a sim. Harsatnak thleng hman sehla a ratsal tikah zumtupawl kha tiaraw cia ih an um ding a duh.

THAWHSAL NI **May 13**
SIMSUNG THU HMUAL NEI ZETIH NEMHNGETNAK

Tirhthlahpawl in Jesui thu kha cross par a thlenhlan ih ani neta lamah Olive tlangah an reltlang. Jesui a simmi biakinn pi siatbal theh a si ding thu kha an hna thlite ah a cam ringring. Lei can cemnak le biakinn siatbalnak thu an pehzomawknak theifiang dingah thusuh an duh (Matt. 24:3).

Matthai 24:1-25 siar aw. Ni neta thuhla Jesuh in a dungthluntupawl hnenih a simmi thucah ziangso an si?

Matthai 24:1-25 sungah Jesui simmi thil tampi lakah ni netnak ih zumtupawl lakah bumawknak a um ding thu kha a sim. Profet deu le Khrih deu pawl an suak dingih an lakah bumnak a um ding. Mi hrekkhat in Khrih kha (Profet deu) a si an ti ding. Jesui ratsalnak thu ah mi an bum ding. A poi ngaingai mi cu kha mi thu kha mipipawl in an lungih an thlun.

Siatnak a thleng ding mi kha Pathian thu in hmual nei zetih a nemhngetnak kan hmu. "Khrih timi cu keimah ka si" tiah mi bumtupawl hi hlan laihi sin a tu khalah an um. Hlan lai thuanthu ah kan hmuhmi (Khrih san minungpawl ih an hmuve lo mi) phuan langih a ummi simsung thupawl kha hminsintlak zetin an thleng famkim theh. Can neta lam kan naih vivo ih bumawknak le buainak a karh sinsin mipawl ah mangbang ding a um lo.

Kan zumnak a khoh theinak dingah leitlun umdan Jesui in simmi kan zoh ding. Bawi Khrih sanlai ih leitlun thil thleng mipawl kha zumtupawl in an rinnak dungtun loih ruahsannak an neih theinak dingah, a nasa zetmi harsatnak minung parih a thleng mipawl hnangamte ih an tuar theinak dingah a si. Fimnak hmangih ram khelnak thuhla ah midang cun ruahsannak tumpi an nei. Hi thilpawl hi leitlun saduhthahnak men a si. Atu le atu siatnak a tonmi kan hmuh vekin beidonnak in a khat. Jesui a simmi vekin tuini kan leilungpi umdan hi hruaitu sualpawl ih hruaisualnak ah beiseinak sang zet an neih ding mi kha a liam zo mi kum 2000 laiah Jesuh in a sim zo.

Matthai 24:25 siar aw. Kan zumnak sawhhngetnak dingih bawmtu ah himi ziangtin so kan hman ding?

TLAWNGKAI NIHAT **May 14**
A NET TIANGIH DINGHNGET

Matthai 24:9 le Thuphuan 13:11-17 siar aw. John ih nganmi thuphuan sungah le Matthai sungah a bangaw mi thu ziangso Jesuh in a sim.

Leitlun pumhuap in thutak dodal ih bumawknak le sakhaw fehsual thlun dingih hnekknak kha can netnak lamah Pathian zumtupawl parah a um ding ti a sim. Cuih harsatnak, mi huatnak le thihnak tiang a thlen hmanah a ding ngamtu an si ding.

Matthai 24:13 siar aw. Leitlun pumhuap doawknak lakah rundam ih um thei dingin rinumnak timi ziangso a si ding?

Bible thutak thawn a thinlung kilhimaw lotupawl cu a netnak ih do-awknak ah nehtu an si thei lo ding. E.G White, The Great Controversy. Pp. 493,494). Bible thutak thawn a thinlung kilhimawtu cu ni neta ih bumnak in

zinpeng ah a hruai thei lo ding. Bumnak neh thei dingin thutak ah hram bummi an si.

Matthai 7:24-27 siar aw. Pathian hnenih rinum hnu ahcun a tul mi dang ziangso um lai?

Pathian thuah theihnak kau le thuk nei ih hramthok hi a thupi zet. Cule Jesui a simmi vekin harsatnak a thlen tikah kan dingsuak thei ding. Kan zir zomi vekih nun nei in Jesui thutak a thlun vekin kan thlun ding. Jesui in simmi inn saktu pahnih tahthimnak kan theih mi kha harsatnak tuar thei le thei lo karlak ih a danglamawknak a si.

Zawnlungtu cun a dinghnget thei ding ih, zawnlung lotu cu a tluk ding. Ziangruangah so a si ding? Zawnlungnak in zumnak a khohter ih a danglamter thei lo.

**TLAWNGKAI NIHNIH
TUKSUUMZA THIL BORHHLAWH**

May 15

Tuksuumza ih siatsuahnak kha can netnak ah a um ding tiah Jesuh in fiangten a sim (Matt. 24:15). Cumi cu Daniel cabu sung thu a lakmi a si (Dan. 9:27; Dan. 11:31; Dan. 12:11).

Pathian in tuksuumza tampi a sim. Danpeksalnak 27:15 ah Pathian thukhaam buarih milem biak kha Pathian hmaiah ningsinza a si. Puithiam Hnatuan 18:22 ah, neih bangaw mi sualnak (diriamnak) tuah hi Pathian hmai ah tuksuumza a si. Curuangah tuksuumza sualnak hi sakhua donak a si.

Matthai 24:15 le Luka 21:20 siar aw. Jesui tuksuumza sualnak a simmi theifiang dingin ziangvek in so in bawm?

AD 70 kum ah Jerusalem khua ih a thlengmi tuksuumza siatsuahnak kha mitthlam ih hmu thei dingah Jesuh in a rak sim. Kha mi kha Jerusalem khawpi lawng si loin Biakinn thianghlim tla milem bia Rome-pawl in an siatbal theh.

Jerusalem siatnak hi simsungnak neta a thlen famkimnak a si. Cuih tlunah kan hmai ih a ralai dingmi can netnak ih thil thleng dingmi hmuhsaknak a si. Jesui a sim duhmi cu leitlun mipawl lungruh ih an um lonak dingah le zumnak dodalnak a um lonak dingah Jerusalem siatsuahnak in a hmuhsak. Pathian daantatnak kha an sualnak phutawkh an ton dingmi kha a langter (**E.G White, The Great Controversy. Pp. 22,23**).

Dan. 12:11 le Dan. 11:31 ah tuksuumza thil borhhlawh kha Rome uk sungih Pope lalnak khaisan a sinak thawn an pehzomaw. Bawi Khrih ih in tuahsak zo mi le a tuih in tuahsak rero lai mi rundamnak le sual ngaihdamnak van hmun thianghlim ih a hnatauan lai mi va lonsaknak a si.

Dan. 8:9-12 ah Rome uknak phun hnih in cawisan a sinak thuanthu ah kan hmu. (1) Khrihfa uknak kha zamrang zet le hlawhtling zetih a karh (Dan. 8:10-12). A thuneihnak kha raltha zetin hmai a norpi ih, arsi hrekhatpawl kha lei ah a hlon (Pathian zumtupawl a hrem ih, a thahnak). Amah kha cungnungbik Pathian fapa tiah a salaw (Dan. 8:11). Milem bia Rome uknak a tluk hnu ah Pope ih lalnak khaisan a si. Cumi ah Rome uknak hmin a hlo lo. Kifate kha Rome thuneihnak ih uknak a hmuhsaknak pakhat a si. Dan. 7:9,10 ih thuthennak, Dan. 8:14 ih Biakinn thianfainak, Matt. 24:29 ih van ih hminsinnakpawl tla, Pathian in amah zumtupawl harnak an ton canih a bom ding thupawl tla kan hmu thei a si.

**TLAWNGKAI NITHUM
FALA PAHRA**

May 16

Matthai 24 ah a ra thleng dingmi thil hminsinnakpawl thei rori dingih a sim hnu ah Matthai 25 ah cu mi thil thleng ding mi hrangih timtuahawkdan ding thu a sim.

Matthai 25:1-13 siar aw. Fala pahra tahthimnak thu a si. Jesui ratsalnak ding hrangih timtuahawkdan theithiam dingah himi in ziangtin so in bawm?

Jesuh in a tumtah mi theithiam dingah fala pahra thu a sim. Hihi Khrihfapawl sim duhnak a si ih do-awknak ah Setan lamtang an si lo. Vancung uknak ram mipawl (Matt. 25:1), an si nan a netnak ah an itthat theh (Matt. 25:5). Bawipa Jesuh cun fimvar zetih hngak dingah a sim (Matt. 24:42). (or) Fimvarte ih an um lo cun Bawipa rat tikah an timlamaw man lo ding.

Fala pahra-pawl in mopa ton dingih an hngak lai ah mei-inn an nei cio. A ratnak hngakhlap zetih thlirtupawl an si. Mopa a thlen tlai ruangah zumtupawl an it that. An rin lo laifang zantim ah mopa ratnak au-aw an thei ih an tho (Matt. 25:1-6).

Fala aa-pawl cu timtuahawnak a um lo ruangah an thin a phang. Ziangah so? Lehlin pakhat ahcun “Kan mei-inn zinaan a cem” ti a si (Matt. 25:8). Grik cahram an lehlin dik mi ahcun, an mei-inn pawl kha san a tlai lo (or) a mit tinak a si. An mei-inn pawl kha mit duapdo (vang duapdo) in a um. Zinaan malte lawng an nei ih, Jesui ratnak timlamawknak hrangah a dahir lo tinak a si.

Cu mi ah a poinak a um maw ?

Himi fala-pawl in Jesui ratnak hngak tu tui san Khrifapawl a zohter ih, Khrif thawn umtlannak tonnun kha a lenglam ih langnak lawngih a nei mi an si. Thlarau

hnatuannak tonnun zinaan tampi an nei ko, asinan tuan tul mi tampi lak ihsin malte an tuahmi ah an lung a awitawk ruangah an mei-inn kha vang duapdo in a um.

Milai thinlungah sinak thar nun nei dingah a duhdan le rem tidan in hna a tuan. Asinan fala aa-pawl ih khiihmuh mi cu lenglam thiltuahnak lawngih lungkim mipawl an si. Pathian ih ziaza thu zirnak le Pathian thawn lenglangnak an nei lo ih, Pathian kha an thei lo. Curuangah ziangvek in kan um ding ti an thei lo ih Pathian rinsan dan ding khal an thei lo. Pathian an rennak tla tumsuk lam an pan vivo. **E.G White, Christ Object Lesson. Pp. 411.**

Himipawl ih an palhnak vek tuah lo dingah ziangvek hmuhsan so kan neih ding? Rundam hnangam-nak nei thei dingah ziangvek thlirdan so kan nei ding? Kan nun ziangvekih thleng danglamaw ding so kan si?

**TLAWNGKAI NILI
NA TALENTPAWL HMANGAW**

May 17

Matthai 25:13-30 siar aw. Kan talent-pawl kha ziangvek in so Jesui ratnak hrangah timlamawknak dingah kan hman ding?

A danglam zetmi thuthimnak kha Jesuh in a sim. A hmaisa ih thuthimnak thawn bangaw in Jesui ratsalnak hngaktupawl fimkhur ih umnak ding thu a simnak a si. A pahnih ih a sim duhmi cu fimkhur le fimkhur lo umdan thu a si. Thlarau lam thuah daithlang ih an um ruangah kumkhua hloralnak an ton thu simnak a si.

Fala pahra ih Zinaan kha thlarau thianghlim a hmuhsak ih sui tangka khal a si thotho (Matt. 25:15 NIV). Grik cahram ih talent timi hi thlarau laksawng simduhnak a si. Thlarau thil pek kha a hmannak ding zawnih hmannak thu a si (The SDA Bible Commentary Vol. 5. Pp. 510).

Hnen-umpawl in an Bawipa hnen ihsin thil ngahmi an nei. An Bawipa in an thiltitheinak tawk cio in rinsan zetih a pek mi an si (Matt. 25:14,15). Anmah rinsan ruangah thilpek a pek ih, anmai neih lo mi thil parah kilkhawitu tuanvo an nei. Curuangah hi hnen-umpawl hi an Bawipa a thlen tikah an tangka thuhla relfel an si ding (Matt. 25:19).

Thlarau thilpek kha Thiang Thlarau hnenin a ra (I Kor. 12:1-11,28,31; Efe. 4:11). Thlarau laksawng an ngah mipawl kha an hrangih thuthangtha an don mi a si. Petu um loin thilpek ngah thei a si lo. Thlarau Thianghlim pekmi laksawng sunglawi kha an donmi a si.

Khrih ruangah kan zaten thilpek kan dong theh. Hi thilpek hi a hnenah le thlarau thianghlim hnenah pumpekawknak ihsin kan thiltitheinak zulin pekmi kan si. Ka co phutawk ka co lo tiawtu cu thil tisualtu a si. A hnenah laksawng pek a si ko nan, tuahsuak mi an nei lo ih a laksawng ngahmi a karh lo. A hnenah duhsak zetih pekmi laksawng hmangin tuahmi a nei lo. Cuvekpawl cu Jesuh in zangzel hrokhrawl tiah a ti ih, nasa zetin a mawhsiat.

Jesuh in a ratsalnak thuhla a simmi ah himi thuthimnak a hmang. Ni neta hrang timlamawknak ah kan talent hman thu in zirh mi ziangtluk ih thupi so a si.

TLAWNGKAI NINGA

May 18

RUAHBET DING: Talent pakhat a ngahtu in a Bawipai tangka leisungah a phum. Thilpek malte lawng a dongtu in Khrih hrang hnatiannak ah in olh seh ti an duh ih, an ngah mi talent kha a karhter lo. Curuangah hivek in ralrinnak pek a si. A ropi zet thilpawl tuah thei sehla ziangtluk in so an lungawi ding. An ngahmi laksawng a mal ruangah tuanvo lak loih ngaidam a duh hi an palhnak

a si. Laksawng in pekmi talent hi kan thinlung put le ziaza hniksaknak a si. Talent karhter duh lonak in rinum lonak a langter. Talent panga ngahtu in pakhat ngahtu vekin lei ah phum sehla vanlam thilpek talent pakhat dongtu ih hman sualmi a lang vekin a daithlannak a lang ve ding.

Thil malte ah rinumtu cu thil tampi par khalah a rinum ding (Luk 16:10). Thil malte a poimawhnak ruat lotu cu thilih man a ruat lotu a si. Cuih thil malte in kan nunih thil tampi parah dan in neihtertu a si. Khrihfa nunah a thupi lo tuk timi a um lo, thil tenaupawl ih poimawhnak kan hngilh ahcun kan nun ziaza remthatnak dingah tihnung phunkim in a khat ding (**E.G White, Christ Object Lesson. Pp. 356**).

RELTLANG DING:

- 1. Mi hrekkhkhatpawl in leilung in famkimten thil umdan a suahpi leh ding tiah ruahnak an nei, an saduhthah mi ziangso a si ding? Kha mi ruahnakpawl kha a sullam hawl ding um loin ziangah so a palh theh?**
- 2. Zumnak hnget khoh dingah zawnlung in Pathian simmi tuahsuak theh timi ziangso a si? Tuahnak um lo zumnak hi a thi (Jame 2:26). Ziangah so a si? Pathian thukhaam thluntupawl in thin sau in tuar theinak an neih a tul timi ruat aw (Thup. 14:12). A ra thleng dingmi hrangih timtuahawknak ah kan hmuhmi thil tenau hi ziangah so kan hrang a poimawh.**
- 3. Fala him pahra thu ruat sal aw. Anmah vekih um lo dingin an thuanthu hi ziangah so kan hrang fimmak in petu a si thei? Fala him a aa mi vekin bumaw mi si lo dingah ziangti ih ralrin so kan tul?**

- 4. A cang thei ahcun hrilcia mipawl hman bum a tum ding timi a san ziang a si? Hril mi timi kan theihthiamdan ziangvek so a si? (Matt. 24:31; Rom 8:33; Col. 3:12). Bumnak hi ziangtluk ih tihnung so a si?**

ZIRLAI 8**May 19-28****SERSIAMTU BIAKNAK****SABAT TLAILAM:****May 19**

TUZARH SIAR DING: Thup. 14:6,7; Matt. 24:14; Gal. 3:22; Luk 23:32-43; Sem. 22:12; Thup. 14:8-12.

BIBLE CANG KEN: “Van ah a zam rero mi vancungmi pakhat ka hmu. Amah cu leitlun miphun kip, tong kip, hrin kip le ram kip hnenah kumkhua ih a hmunmi thuthangtha thantu a si” (Thup. 14:6).

SEVENTH-DAY Adventist kawhhran kan si vekin Bible pomdan tlaitluan thutak kan pom (2 Pet. 1:12). Pathian in minung hnenah a thutak kha sankhat hnu sankhat, a tleunak a tul canah tleu sinsin in phuan lang a si tiah kan pom. A hmaisabik thuthangtha thukam kha Seemtirnak 3:15 ah a lang ih, nunau nui cithlah a tluk mi nupa tei hnenah ruahsannak a pek. Abraham hnenih thukam kha a tesinfapawl miphun tum le cak ah an cang ding tiah thlawsuahnak a pek mi vek thlawsuah kha leilung tlun miphun hmuahhmuah in thlawsuah in dil ding (Sem. 18:18 NKJV) ti ah a ti. Hihi thuthangtha thukam phuannak a si. Jesui a phuanmi cu, “Milai fapa hi ren mi si loin riantu ah le mi tampi tlen dingah a nun pe dingin a ra” (Mark 10:45 NKJV). Hi mi hi thuthangtha thutak ropi sawnih phuannak a si.

Tui ni ah vancung mi pathum thucah (Thup. 14:6-12) kha Jesuh rat zik zawngih khawsa mi Khrihfapawl ih a

famkim mi ruahsannak kan zummi kha tlaitluan thutak kan ti.

Vancung mi pakhatnak thucah ih a tumtah mi hmuuhdan tuzarh ah kan zir ding. Can netnak ih tihnung lak khalah thutak ah rinum zetih um a tumtupawl hrangah a thupi zet.

THAWHSAL NI May 20
LEITLUN KHUAZAKIP AH THUTHANGTHA SIM

Thuphuan 14:6; Matthai 24:14; Matthai 28:19 siar aw. Tumtah mi bangaw ziangso kan hmuuh thei? Kawhhran ih kan tumtah mi vekin midang hnenih thuthangtha sim a thupitnak theithiam dingah ziangtin so in bawm?

Mi in vancungmi pakhatnak thucah kha (Matt. 28:19) kawhnak ropi a si ih, tui sanah in pekmi a si, tlaitluan thutak kan timi a si ko tiah kan pom.

Bible cangpawl in leitlun khuazakip ah thlenpi ding timi an langter. Ramkip phunkip, hnam kip, tong tin le mi hmuahhmuah hnenah thlenpi ding a si. Himi thucah hi leitlun khuazakip ih an ngah dingmi covo a si.

Galati 3:22 siar aw. Thuthangtha hi leitlun khuazakip in an theih a tul timi theithiam dingah a simmi in ziangtin so in bawm?

Leitlun sualnak ih in simfiangmi cu leitlun khuazakip ah feh dingih kawhmi le thlahmi kan si. Minung hmuahhmuah in sualnak kan tuah theh. Pathian daan buar sual thu neihnak tangih kharhkhum mi kan si. Eden ah Adam a tluknak in mi hmuahhmuah a kai-awk theh ih, a luatmi zohman kan um lo. Sualnak ih rahuah mi kan tuar cio ih thatter sal theih a si lo. Cuih tha man kumkhua hloralnak hmabak kan si.

Himi remthat salnak dingah khua in khan sakmi kha Jesui nunnak, thihihna, thawsalnak le van hmun thianghlim ih a rawngbawlnak a si. Sual thubuai cingfel theitu cu amah a si. Jesui ruangah Pathian pekmi ruahsannak sunglawi kha mi hmuahhmuah in an theih a tul. Curuangah Seventh-day Adventist pawlin leitlun hmuntin ah rawngbawl ih kan fehnak a si. Jesui thucah pekmi kha a thei lo mipawl theihter dingah kan feh.

Midang hnenah thuthangtha simin thucuh phuannak ah thlarau lam hlawnak a um thei. Midang hnenih thuthangtha phuannak kha Jesui ratsalnak hrangih timtuahawknak a si .

TLAWNGKAI NIKHAT May 21
CROSS PARIH FIFIR PA LE KUMKHAW HMUNMI THUTHANGTHA

Thuphuan 14:6 sungah “Kumkhua a hmun mi thuthangtha” kha leitlun mi hmuahhmuah hrangah ruahsannak thucuh phuan ding mi a si. Himi hi mi hmuahhmuah hnenah ruahsannak a pe theitu thucuh a si.

Luka 23:32-43 siar aw. Hi mi thuanthu in misualpawl hrangah kumkhua hmunmi thuthangtha sunglawi ziangtin so a langter?

E.G White in mifir pai thu hitin a ngan: Sual lutuk ih dan pahbaltu a si lo. A sualnak khuh hlosak dingah Jesui thuhla zingzoitu a si. Amah kha sual khur thuk ah a pil vivo , an tuahmi sualnak cemter dingah kaih an tongih Cross ah thi dingin thuthen cat mi a si. E.G White, The Desire of Ages, pp. 749.

Fifir pai parah ziangso a thleng? Cross parah khai a si ih, Jesuh a vun hmu ih zo a si ti a theithiam. Cule a au

suakih “Bawipa na ram uk dingih na rat tikah I hngilh hlah aw” (Luka 23:42) tiah a ti.

Jesuh ih a sawnnak cu, “A tha ka rual, nangmah lo bom ka hiar tuk, daan na buarnak nasa deuhdeuh in na tuah ih, sual khur thukah na lut deuhdeuh ko lo maw? Jesuh in mipi hnenih thu a rak simmi a laksal ih, Dan thiampawl le Farasipawl hnakin nan fel sAWN lo ahcun vancung uknak sungah nan lut thei lo ding” (Matt. 5:20). Jesuh in a liamcia mi fifir pai sualnak a phorhsuak a si maw?

Si lamlam lo, Jesui a simmi cu hlanih a sualnak ruangah camsiatnak a parih a thlengmi le amai dingfelnak in thiamconak a ngah thei lonak thu a sim (Matt. 27:44). Cule sual a sirawknak le a hrintharnak a hmuhsak ih a tu ah na hnenah ka lo sim. A tu rori ah thu ka lo kam, na sualnak, daan na buarnak, na palhnak pawl ngaithiam na si theh zo. Paradise ah keimah thawn kan um tlang leh ding (Luka 23:43) ti ah ati.

Hihi vancung mi pakhatnak ih thucuh a hrampi kumkhu a hmunmi thuthangtha a si. Himi thutak tel loin thukhaam thu, Sabat thu, thihnak umdan thu, sim theih a si lo. Himi thuthangtha tel lo thuzirhnak hi ziangtin so an thinlung sungah a lut thei ding?

Himi thuanthu ihsin ruahsannak ziangso na ngah?

TLAWNGKAI NIHNIH May 22
PATHIAN TIHZAH UH, A SUNLAWINAK PEK UH

Leitlun hmuahmuah ah kumkhu a hmunmi thuthangtha simnak vancungmi pakhatnak ih thucuh a fiak, a kauhnak a tawi, sau kan rel theh zo. Kumkhu a hmunmi thuthangtha kan phuanmi sungah tui can hrangih

thucuh thuthangtha thutak tla kan sim tel a tul. Thuphuan 14:7 thu hi can cemnak hrangih “tlaitluan thutak” khal ka ti thei.

Thuphuan 14:7 siar aw. Pathian tihzah ih sunloih pek timi ziangso a si? Thuthangtha pomdan thawn an remawknak ziangvek so a si?

Pathian tihzah le sunloihnak pek hi pehzomawknak a um lo. Bible simdan ahcun Pathian tihzahnak kan nei ahcun sunlawinak kan pe thei ding. Cumi cu midang hnenah pek thei mi a si.

A tangih Bible cangpawl siar aw. Pathian tihzah timi le sunloih peknak an zomawknak theithiam dingin ziangvek in so in bawm thei ding? (Seem. 22:12; Suah. 20:20; Job 1:9; Thus. 12:13; Matt. 5:16).

A tlunih Bible cangpawl ah Pathian tihzahnak timi hi zawnlung ih thu thlunnak thawn a zomaw. Pathian thuthu ih nun cun a dik mi kan tuah theu. Cule a sunloihnak kan thlenter theu. Pathian tihzah hi Pathian sinak ah mak tiih upat tihzahnak sunglam nun a si. Pathian tihzah ding kan sim ih sual cithlah misual thihnak hmabak kan si. Zokhal in kan tuahmi sualnak ruangah a tu le tu ih thinphan thla lau nak kan tong ringring. Ziangatile an tuahmi sualnak hrangah Pathian dingfelnak le thatnak in cohlan tlakah a cangter si lo sawm? Himi ihsin Pathian tihzahnak a suak. Cuih Pathian tihzahnak in sual thlahnak dingih Cross lamah in fehpi hmaisa. Pathian thilitheinak thawngin kan sual thianfai sak kan sinak a phuangsuak. Cross um lo sehla kan thlarau hloralnak ah a thleng ding (Matt. 10:28).

Pathian tihzahnak tonnun na neih zo mi ziangso a um? Pathian tihzahnak ruangah thil tha tuahnak hi kan thlarau lam hrangah le kan zumnak ruangah Pathian fialmi vekin upat zetih umnak ah ziangtin so in bawm?

**TLAWNGKAI NITHUM
THU A THEN CAN A THLENG ZO**

May 23

Vancung mi pakhatnak thucah sungah Pathian tihzah pomdan le sunlawinak pek timi kha thuthennak thawn an pehzomaw (Thup. 14:7). Bible in fiangte ih in zirhmi cu Pathian hi a dikmi thuthentu a si. Ni khat ni ah leitlun ih thuthentu Bawi pawl an palhnak le an tlaksam zia a langter leh ding.

Pathian tihzah timi mangbang ding a um lo.

Kumkhua a hmunmi thuthangtha ah thuthennak a tel. Hitei pahnih an pehawknak ziangso a si? Thuthangtha hi lungawiza thuthannak a si. Pathian daan buar mi sual kan si ih, Cross parih misirpa vekin thuthen ni ah sual man dantatnak ih hrem phu kan si. Asinan, cuih thuthennak dantatnak kan tuar nawn lo ding, kan luat zo.

A tangih Bible cangpawl siar aw. Mai dingfel thatnak in ziangvek in ka ding thei timi ruataw aw (Matt. 12:36; Thus. 12:14; Rom 2:6; I Kor. 4:5).

Kan lu ih sam a siar thei thehtu Pathian kha lei le van thuthentu a si. Curuangah kumkhua a hmunmi thuthangtha hi lungawinak thuthannak a si tiah dik ciah in kan ti thei. Jesui dungthluntu mi rinum hrangah cun thuthennak a thlen tik khalah sual puhnak in a luat. Jesui thiamcoter ih kholhfa i thianhlimter zo mi an si (I Kor. 6:11). Thuthennak fehtlang in dingfel thiaghlimnak an ngah ruangah Jesuh kha an dingfel thiaghlimnak a si.

Tlapih ei mi thir vekin sualih ei siatmi an si nan, an sirawk ahcun Pathian hmaiah soisel ding a um lo mi ah a cang. Sualnak tha man thihnak an tuar lo ding. Kan palai Jesuh in a tu rori sualsirtu, zumnak nei in nun pekawtui hrangah famkimten kan ai-awh in dilsak zo. Calvary ih thucuhawknak ruangah camsiat an sinak ihsin Jesuh in

thu suahsalhnak a tuahsak zo ih, a nehsak zo. Pathian thu kha Cross parih thihnak tiangin a thlun ih, van le lei ih thuneihnak hmuahhmuah a hnenah pek theh a si zo. Pathian zangfah lainatnak ruangah misual hrangih hremnak tuahmi cu a famkim in theh a si zo tiah a phuang. **E.G White, Testimonies for the Church Vol. 5. Pp. 471.**

A thuthennak thu in sual ngaihdamnak famkim kan tulnak thu, ziangso in zirh? Jesui thawngin sual ngaidamnak Pathian in a lo pek vekin na parih sualnak a tuahtha parah zangfahnak nei dingah ziangtin so na zir ding?

**TLAWNGKAI NILI
VAN LE LEI SERSIAMTU BIAKNAK**

May 24

Thuphuan 14:6,7 siar aw. Vancungmi pakhatnak ih thucah phuanmi a hrampi ziangso a si? Ziangvekih pehzomawknak so an neih theh?

Thuthangtha in Pathian tihzah ih sunlawi upat peknak ding le sersiamtu a si vekih Pathian biak dingah thuthangtha sim dingih kawhmi kan si. Hipawl hi kumkhaw thuthangtha tlaitluan thutak ih langdan phunkhat a si. Thuthangtha sim dingih kawhnak thuthennak timipawl hi sersiamtu Pathian a sinak thawn pehawknak ziangso a neh? Himi hi thutak a suahnak hrampi ziangkim sersiamtu Bawipa a si. Bawipa kha sersiamtu tiih kan biak tikah thil semsuahnak hrampi kan hmusuak ding. Cu tikah minung le a nunnak hrampi ziang a si ti kan thei ngah ding. Minung hi sersiam mi thilnungpawl thawn an danglamawknak cu Pathian hmel bangin milai a tuah. Sersiamtu tiah Bawipa kan biaknak in a tu le a ralai dingmi thil ummi ah amah rinsan ding ti theihthiamnak kan nei. Himi ruangah nisarihnak ni zarth

ih hmangin Pathian biak hi a poimawhnak a si. Pathian hi sersiamtu tiin amah lawng kan biak theinak dingah a hleice ih theihter mi kan si. Cumi cu thuthangtha le thuthennak timi a si ih, Pathian kha sersiamtu tiih biak dingih langhngan zetin in pek.

Thuphuan 14:8-11 siar aw. Pathian kha sersiamtu tiah biak a thupitnak theithiam dingah ziangtin so in bawm?

Leitlun hmuahmuah ah sersiamtu hnakin sahrang le a lem biak dingin hnek a si ding tiah ni neta thilcang dingmi ah phuan a si. Sahrang le a lem betupawl parih thil tleng ding mi ralrin peknak ah Pathian kha sersiamtu tiih biaknak le amah lawng hi biaktlak a si timi theithiam sinsin dingin a langter. Ni neta ih do-awknak ah himi biaknak thu hi a thupibik mi thutak a si ringring ding.

Mangbangza leitlun thil sersiam mipawl ruat aw. Pathian kha biaktlak Pathian umsun, ziangkim tuahtu a si thu theithiam dingah ziangtin so in zirh.

TLAWNGKAI NINGA

May 25

RUAH BET DING: Bible tlawngtapawl cun Thuphuan 14:7 ih van le lei tifinriat le cerhti put tuahtu biak timi (RSV) le Suah. 20:11 sungih Thukhaam a palinak Sabat ni a sawh duhmi kha niruk sungah Pathian in van le lei tifinriat le a sungih a ummi hmuahmuah a tuah theh (NKJV) timi an pehzomawknak kha an hmuifiangnak a rei zo. Tongkam ih pehzomawknak um hman sehla Thuphuan ih a langter mi Bawipa kha cerhti put sersiamtu a sinak a langter mi ah danglamnak a um zo.

Author John Baldwin ih thusuahpi mi ah "Cerhti put" timi ih phenah Pathian ih ruahnak a tumtah mi a um. Jesuh in Suah. 20:11 ih thuthawn bangaw mi kha a palai F-6

hnenah a phuannak kha ziangah so a si ding? Vancung mi in ziangah so cerhti put timi ngelcel a sal? Sersiam mi thildang mual le tlang, thingkung hrampi le vatepawl tla a um lo maw?

Pathian in cerhti put timi a langter duhsan mi cu ca siartui thinlung sungah Pathian thuthennak umdan kha hlanlai ih a rak um zo mi Pathian ih thuthennak umdan kha oltei theithiam dingah a si. Himi ah hlanlai tilik a rak tlung lai ih "Cerhti put" timi Pathian in a hmang tiih ruah a si. Pathian amah hi thuthentu a si vequin rinum zet, rinsantlak le ngil nei zangfah thiamtu timi fumfe zetin a sim ih, hlanlai ih tilik a ummi kha tawi famkim in a langter. Cuti a si ahcun cerhti put timi kha casiartupawl in thupi zetih an lak theinak dingah thlarau lam le minung lam, kungkaihawknak kha tiliknak thu ihsin a hramthok in uar deuhin a sim. Thuphuan 14 ih vancungmi pakhatnak ih thucah, a than mi vequin can netnak ah a thupi zetmi bulpak thuthennak a tleng dingmi kha a feh kelih fehpi theinak dingah a si (John Baldwin ed. Creation, Catastrophe and Calvary: Why a Global Flood is Vital to He Doctrin of Atonement, Hager Stown, Mdi Review and Herald @ Publishing Association 2000. Pp. 27).

RELTLANG DING:

- 1. Isaiah 53:6 siar aw. "Tuu hlo vequin kan zaten a hlo mi kan si". Kan zaten timi kha Hebru tongah "Cullanu" timi a si. Himi ah Pathian in kan zatei sualnak kha Jesui parah Pathian in a suan theh tiah Isaiah in a sim. Isaiah 53 sungah kan zaten timi hi Hebru tongin "Cullanu" timi a hmang thotho. Himi in sualnak ih thubuai a natsat ai ih nasa in a cingfel a tulnak ziangvek in so a sim?**

2. Cross parih fifir pai thuanthu ihsin zirlai dang ziangso kan lak thei? Fifir pa kha sual ngaidam a si ruangah Cross ihsin thumthlak in luatter sehla kan ti mai thei. Cu vekin nung sehla ziangvek in so nun a hmang ding tiah na ruat? Bawi Khrih in danglam zetih kan nun in thleng theinak huham a phi na ngah mi in ziangso a sim?

ZIRLAI 9**May 26- June 1****CAN NETNAK IH BUMNAK****SABAT TLAI LAM:****May 26**

TUZARH SIAR DING: Thup. 2:13,24; 2 Kor. 11:13-15; Saam 146:4; Sem. 1-2:3; Thup. 13:1-17.

BIBLE CANG KEN: “Rulhreng timi khuahlan rulpi, khawsia a si lo ah Setan tiih kawhmi leilung pumpuluk a bumtu cu a vancungmipawl thawn van ihsin leilungah an vun hlon thlak” (Thup. 12:9).

SETAN kha van ihsin dawi a si hlanah van mipawl bumtu a si. Lucifer in a lungkim lonak van mipawl hnenih phuangdarh dingah Pathian hmaika a umnak hmun ihsin a suak.

Pathian tihzah upatnak langter cingin a thupte ih a tumtah mi kha lang lo dingin a tuah. Van mipawl hnenah thukhaam parih a lungkim lonak le a thinnatnak a langter ih, anmah thawn nelaw zetih komaw in Pathian thukhaam a tul lo timi thuthawn a temtawn theinak dingah a lem rero. **E.G White, The Great Controversy. Pp. 495.**

Eden ahcun amai sinak ngaingai thawn a lang loih Eve hnenah rul ah cangawter in a bum lala. Kum thawng tampi hnu khalah sankhat hnu sankhat tuini tiangin mi a bum ringring (Thuf. 20:8). Amai ni netabik canah hlawknak ngah thei dingah a zuam rero a si.

A mak zetmi cu amah kha mi piang zet a si, thiltitheinak tampi a nei ih, kanmah hnakih fim depde a

si. Curuangah a hrokholnak ihsin kan venhimawk theinak dingah Jesuh thawn kut kai-aw ringringih a thu vekih kan nun a tul. "Bawipa nan Pathian a rinsantu nannih cu tuisun tiang nan nunglai (Danp. 4:4). A thupi zetih an tuahmi "Bawipa rinsan in tuini tiang nan nunglai" tivek in kan um ve a tul.

Depde zetih Setan bumnak hlawhtling ngaingai mi ihsin kan him theinak dingah tuzarh sung kan zir ding.

**THAWHSAL NI
A MAK ZETMI BUMNAK**

Lei le van huapih thu cuhaw/elawk nak zirlai hmaisabik ah kan rel tlang zo. A poi ngaingai mi cu van kumpi boruak lanih a thleng thei mi kha a si.

Hihi a poi zet, Khrihfa siseh, midang siseh, doawknak mak an zum lo ahcun Setan a um timi khal an zum lo. Bible ih a simmi Setan (or) khawsia thu le leitlun ih thil tha lo a si mi natnak le siatnak a um mipawl kha fim zirnak, fimthiamnak thawn simfiang an tum. Mi tampi in an ruah ngaingai mi cu Star war timi milai pakhat ih thiltitheinak sangbik cu midang siatnak dingah thilhar tuahnak fimnak hawlnak in a luah khat theh.

A tangih Bible cangpawl siaraw. Thuphuan sung thu lawngte an si. Setan ih mizia taktak ziangso in zirh? Lamdang zetin ni neta ah ziangtin hna a tuan ding ti in zirh. Thuphuan 2:13,24; Thup. 12:3,7-9,12,17; Thup. 13:2; Thup. 20:2,7,10.

Thuphuan bu in ni netabik ni ah leitlun mi hmuahmuah Setan thiltitheinak in a uk theh ding tiah a

langter. Rundamnak ngah lo ding lawngin a hruai lo dingih Jesuh kha rinum zetih zumtupawl hrem dingin a hruai ding.

2 Korin 2:11 ih thu kha Setan ih hriamhrei pawl a ti ih Grik tongin "neomata" timi tongfang a hmang ih 'mind' thinlung tiih lehlin a si. Setan a um lo rori a si tiah minung ih zum dingin a tuah mi kha bumnak NASA bik a si. Kan ralpai huham thlazar hnuaiih beunak a hawltu cu a dik ngaingai mi thil a zum thei pei maw? A mak tukmi cu Khrihfa tiawpawl khalin setan timi khawsia hi a um rori ko tiah khoh zetin zumnak an nei lo. Daithlang zetin Khrihfa dinhmun kha an kai ringring. Bible thu hrampi lehlin nonsal rero mi a si ruangah leitlun cemnetnak kan nai sinsin vekin bumnak ih neh a tumnak kha a langter. Curuangah mi tampi in Bible ih thil cangmipawl hmu hman sehla Setan a um rori ti an zum lo. A thupi zetmi Bible thu theithiam dingih in zirh mipawl kha hmual nei zetin in theihter sal.

A thupte ih Setan thil tuah tummi kha thuphuan in a sim. Ni netabik ni ah Thuphuan 12 sungih thu, ruahsannak sunglawi ziangso kan hmuh thei? Khawsia do theinak thiltitheinak khui in so kan ngah?

**TLAWNGKAI NIKHAT
A NASA ZETMI PALHNAK PAHNIH**

A tangih Bible cangpawl siar aw: Setan thiltitheinak ih bumnak thu ziangpawl so in sim?

- 2 Korin 11:13-15
- 2 Thessalon 2:9,10
- Thuphuan 12:9
- Thuphuan 20:10

Kan zir zo mi zirlaipawl hminsins aw. Can netnak ih bumnak thu Jesuh in a dungthluntupawl hnenah ralrinnak thu a sim. Khrih deu le Profet deu-pawl a hleice in an suak dingih mi tampi an bum ding tiah a sim (Matt. 24:5).

Khrih deu le Profet deu pawl hi can netnak ih bumnak lawng si loin kan ralrin dingmi a si. Do-awknak mak ah bumnak in neh a tum ih, a cang theitawk in in bum ding. Neh tumih bumnak kha Khrihfa kan si veikin ralrin kan tul. Bible thu zirhmi veikin zawnlung ih thuthlunnak lawngin kan neh thei ding.

A mak zetmi bumnak pahnih thu E.G White ih a simdan ahcun: Minungin thi thei lo thlarau neihmi le Sunday Pathian biak ni ih hmannah hi a rapthlak mi palhnak pahnih an si. Setan in himi bumnak pahnih hnuai ah mipi a kharhkhum. Mithi thlarau thawn biakawk theinak in hlanlai ah hram a rak thok. Cuih hnuah Rome thawn lungruanak an tuah. America ramih Protestant-pawl hi mithi thlarau biaknak sakhua thawn lungruanak tuah hmaisabiktu an si. Cuih hnuah thuneihnak pathum ih hruainak Rom kut tangih um dingin an karlak ih thenawknak nasa zet a ummi kha rualremnak an tuah. Cule a dingfel mi le a thianghlim mi ansia tha thleidannak cu Rome in a ke tangih palbek dingin cui ram uknak cun a hun dawi vivo. **The Great Controversy. Pp. 588.**

Himi thu a ngan hnu kum reipi tiang kan zum thei ngaingai lo. A nasa zetmi palhnak pahnih hi hmuntin ah ziangtluk in a khat zo ti a tu ah kan hmu ih, Khrihfa khawvel ah a um vivo lai ding ti khal kan thei.

Bible thutak kha thinlung takte ih theih le thlunnak hi ni neta hrangah a hleice in Setan bumnak dodal dingah ziangah so hreihriam thabik a si thei.

**TLAWNGKAI NIHNIH
THI THEI LO MINUNG THLARAU**

May 29

Mithi umdan thu a tanglam Bible cangpawl in ziangtin so in zirh? A nasa zetmi sualnak pahnih lak ihsin humhimnak tha ziangso himi Bible cangpawl in in pek. Thus. 9:5,6,10; Sam 115:17; Saam 146:4; I Kor. 15:16-18; Dan. 12:2.

Kan dung kum 10 a liam zo mi ah minung ih tonmi thihnak thu ah thaw thaw thei loih an umnak kha lungturm a cawl ruangah a si ih, thil thei theisal dingah an tuah tum timi thuanthu tla kan thei. Ziang thei lo ih a thih hnuah theihmi dang a nei ding ti zum har zetmi thil phun tam zet an sim. Mi tampi in thli lakah hmuu thei loin an um ih, an ruangpi kha tlun van ihsin an run zoh tiah an ti. Mi hrekhat ih simdan cu a taksa ihsin a thlarau kha a suakih a lamdang zetmi tleunak thawn a um ih, duhdawtnak zawnruahnak, thutakpawl kha thinlung takten an dinpi tiah an ti. Mithipawl thawn biakawk a theih a si tiah midangpawl khalin an sim.

Hivek thil mak zetpawl hmuu ding a um ih, fim zirnak lamih hminpek mi cu (NDES) thi zik zawnghih tonnun (Near Death Experience) tiah an ti. Himi NDES in thu elawknak kha in theihter sal. Khrihfa tampipawl cun an thih hnu ih a thi thei lo mi an thlarau taktak ah an ruat. A thlarau ih a suak mi kha theih theinak nei lai ih hmundangte ih a um mi tiah an ti.

Asinan, NDES pawl hi palhnak nasa zet phun hniih a um mi pakhat langtertu a si. Mi a thih tikah a thla kha a nunghitawh ihsin hmundang ah piandan phundang nei in a um tiin mi in hlanlai pi ihsin zumnak an nei. Thlarau khawvel lam a si tiah kau zetin thlarau sual bumawknak kha an phuang. Himi bumnak hi olten an pom ih olten a

karhzai. Cuvek pomtupawl in Jesuh kha langhngan in siseh, a thupte in siseh kan lo hai lo tiah an ti. NDES timi thih zikzawngih theihnak nei mi tampipawl in an thlarau kha anmah rori ih tongin an sim. Cui a thi mi thlarau thawn biakawk thei ih duhdawtnak thu thawn an hnemaw ih, lungdaih hnangamnak thu, Khrih ih in tuahsak mi kha rundamnak hrangah thathnemnak a um lo an ti ih, Bible sungih ummi sirhsan in sual timi le thuthennak a ra thleng dingmi khal a um lo an ti. Ruah ding a ummi pakhat cu a thi zo hnu a thosalpawl ih toteh nun ih theih mipawl kha Khrihfapawl in an zirhaw. Cule santhar zumnak ih cohlan ding (pom ding) ih zirhmi a si an ti.

**TLAWNGKAI NITHUM May 30
NUAMTE TEIH THLENGAWKNAK LE SABAT THUZIRHNAK (Sabbath and the Theory of Evolution)**

Minung in thlarau thi thei lo a nei timi zumnak hmangin setan in leitlun mi a bum neh theh. Culawng si loin zirlai 6 nak le 8 nak ah Khrihfa thuanthu ah Bible Sabbath ai ah Sunday ni zarhii hmang dingin an thuneihnak hmangih an tuah mi tampi kan hmu.

A liamcia mi kum rei lote ah Setan in bumnak a tuah ih, ni sarah Sabbath thu kha minung thinlung sungah a thiatsak theinak dingah nuamte tein zirhnak a suaipi.

Sem. 1-2:3 siar aw. Bawipa in ziangtin so leilung a tuah timi ziangso in zirh? Ziangtluk ih rei so a tuah?

Himi cang kan siar tikah sersiam dan thu phun hnih Bible in a langter. (1) Thil ziangkim khawkhan lairel cia mi a si, tumtah nei loin a menmen ih tuahmi an um lo. Bawng mal timi vanthatnak ruangih thil ummi a um lo. Bible simdan ahcun sersiammi an sit heh ih, vanthat ruangih a um mi zianghman a um lo tiah a ti.

(2) Bible in Sersiam mi ramsapawl anmah ih ci umdan vekte ih pungzai dingin tuahmi a si. Curuangah phunkhat le phunkhat bangaw loih tuahmi a si. Phunkhat le phunkhat cawkrawi ruri ih um dingin taksa le thisen a nei mi an um lo. Thil umdan ihsin Semtirnak hrilhfiah ih lehlinnak a um lo. Himi ah a fiang zetmi thu pahnih a um. (1) Tumtahmi um loih a menmen ih sersiam mi zianghman a um lo. (2) Sersiam mi thilah mai cithlah teih thlahawkdan a si ih, a tawmaw thei mi ci pakhat hman a um lo.

Darwin zumnak a thluntupawl in nuamte tein a thlengaw vivo mi a si an ti. Tumtah mi um lo timi le cithlah hmuahhmuah ci tawmaw ih thlahaw thei tiah an ti.

Himi zirhdan in Semtirnak a sullam an hrilhfiah tikah thil tampi ih a hrampi dinhmun thawn an kalhaw. Ziangah a si ding? Himi in leitlun mi tampi fimnak sang zet a nei mipawl a hruaisual hleiah Khrihfapawl in himi thurin thawn rem thei dingin an zumnak thu an zirhaw ih a kalhawknak sim tel mi tla zohsalnak an nei nawn lo.

Nuamte teih thlengaw vivo mi umdan hi can netih thil thleng tihnung mi phenah bumawknak tihnung tampi a lang. Ni sarah Sabat hi ni ruk sung lei le van sersiamnak hngilh lonak a si. Asinan, hipawl ih an simdan ahcun sersiam mi pakhat kha kum billion 3 rei in an tuat. (Cumi cu leitlun ah nunnak a um thoknak a malbik ih an tuatdan a si.) Ziangah so hipawl in ni le can kum hi thupi zetin an tuat. Ni ruk sungah thil ziangkim tuah a si ih, ni sarah ni hi sersiamnak hminsinnak ni a si. Himi a poimawhnak kha Darwin zirhnak in a hnong. Sersiamnak kha phuahcop thuanthu vekah an cangter. Ni ruk sung sersiamnak a si lo timi zumnak in kum tampi sersiam tul timi zumtupawl in Pathian zumtupawl hremnak a suahter dingih

thahawknak tiang a suahter ding. Sunday dodal in Sabat an ul tiah sual in puh ding.

TLAWNGKAI NILI

May 31

THUMKOM PATHIAN LEMCANGNAK (The Counterfeit Trinity)

Bible sungah thumkom Pathian pomdan lawng hi Pathian sinak a langmi kan hmu. Can netnak ih bumnak le hremnak thawn pehawknak an neihdan Thuphuan sungah a langih rulhreng tipi sungih sahrang le leilung in a suakmi sahrangpawl hi thumkom Pathian vekih an umnak kha Thup. 13 sungah kan hmu.

Thuphuan 12:17; Thuphuan 13:1,2; hitawk ah ziangtin a langter.

Hitawk ah rulhreng hi Pa Pathian vekih hmuh theinak a um, amah hi thu neitubik a si. Tipi sung ihsin a suak mi sahrang kha amah in uk theinak thuneihnak a pek ih, Bawi tohkham tla a pek. Cumi cu Khrih lem cangih a tuahawknak a si. Thuneitu pahnihnak hi ziangruangah Khrih lemcang ih hmuh a si.

Thuphuan 13:2-5 siar aw. Tipi sungih sahrang ziaza ziangpawl so a nei?

Rulhreng hnen ihsin thuneihnak a ngahmi kha Pa Pathian hnenin thuneihnak a ngah thu Jesui a simmi kha a let zawngin sahrang pa in amah ah sullam a neither (Matt. 28:18). Himi tipi sungih sahrang in Jesuh sinak vek a nei, a thi zo ih a nungsal (Thup. 13:3). Himi sahrang ih thuneihnak hi thla 42 sung a si (or) kum thum le hrek sung a si. Bawi Khrih ih rawng a bawlnak kum thum le hrek sung kha simsung thu ih ni tuatdan in nikhat kumkhat ih an simnak kum thum le hrek kha a si.

Thuphuan 13:11-17 siar aw. Lei sung ihsin a hungsuak mi sahrang in ziangso a sim duh?

Lei sungih a suakmi sahrang in tipi sungih a suakmi sahrang upatnak a pekmi kha Jesuh in sunlawih upatnak a pekaw loih Thiang Thlarau in a tuahsak mi bangin a sim (John 16:13,14). Thlarau Thianghlim in hmual nei zetih thiltitheinak van ihsin mei a run tlakter. Lei ih a hung suakmi sahrang khalin cumi thawn bangaw in thil a tuah ve (Thup. 13:13).

Pentecost ni thil umdan vekin lei ihsin a hung suak mi sahrang in tumtah mi nei in lem a cang ve. Leitlun pum huapin thumkom Pathian hi a dikmi Pathian tiah pom a si. Cumi lemcang ih thil tuahdan a si. “Jon Paullen, What the Bible Say About the End Time (Hagerstown, Md: Review and Herald @ Publishing Association. 1998) pp. 111.

Ni neta hrangih fimkhur ding bumnak dang ziangso um lai? Himi bumnak midang ih an theihthiam theinak dingah ziangvek in so kan bawm ding?

TLAWNGKAI NINGA

June 1

RUAH BET DING: Nuamte teih mahte a thlengaw mi zirhnak kha ni neta thil thleng dingih a tel ve mi kha ruat aw. A thupibik in Sabat thuhla ah ruat aw. Charles Darwin ih a ruahmi pakhat cu nuamte tein amahte ih thlengaw vivo mi hi doawknak mak a bawmtu thu pakhat a si tiah a hramthokah a ruat ban lo. Duhdawtnak neitu Pathian hi thil tha lo le nat tuarnakpawl thawn a kalhaw tiah a ruat. Curuagnah himi thil fiangternak phundang ih a hawlnak hi a palhnak a si. Himi hi AD 1800 cem zik lamih thil a ra suak pangmi a si lo. Nuamte tein amahte ih a thlengaw vivonak thuzirhnak hi Darwin ih hliakhlainak a tuah rero theu. Pathian in Seventh-day Adventist a dinsuah ah khan Darwin thuzirhnak a um zo. Seventh-day Adventist timi hi

sersiamnak a langter ih a kiltu a sinak hi a mak zetmi hmin a si. Himi kawhhran a ra suak can le Darwin thuzirhnak can hi a bangaw.

E.G White cangan mi Education. Pp. 26 sungah, "Camsiatnak ngetih a ei ral rero mi leilungpi hi minung hrangih zirlai cabupi a si. A tu ahcun thatnak lawnghi langter theih a sin awn lo, hmun tinah sualin a luah khatih leilung, tipi le ni le thlapawl tla a baalter ih a siatsuah rero. Thatnak famkim a langter mi, Pathian ziaza ngannak leilungpi kha Setan ziaza ngannak ah a cang. A tu ih leitlun thil thleng mipawl hi sual theihthiamtertu ah a cang ih, sualnak ih tha man theithiam dingah minungpawl ralrinnak pe ringringtu a si" tiih nganmi ca tawite a siarih a ruat ve ding ti zoso thei thei. Nuamte tein cithlahawknak dan phun khat ihsin phun khatah amahten a thlengaw vivo timi hi a nasa zetmi leilungpi ih palhsualnak hi milai thinlung ruahnak ah a um ding timi tla zohman in an thei lo.

Darwin in amahte in nuamte ten thil a thlengaw vivo timi hliakhlainak le ruahnak a suahpi mi hi a tluse mi leitlun sualnak lakih kan umnak, leilung umdan le Pathian nun ziaza theihsualnak ruangih a ummi a si. A suahpi mi zirhnak in nineta ih do-awknak ah milai hmuahhmuaah kha Setan bumnak sungah a kharhkhum.

RELTLANG DING:

- 1. Setan a um rori timi Khrihfapawl in ziangah so an hnong? Himi zirhnak thlidan hi Bible zirhnak tihnung zetih hnonganak a si.**
- 2. A thi zik mi kha kan thih hnuah kan nung lehsal ding timi thu ziangtin so na sim ding?**

ZIRLAI 10

June 2-8

AMERICA LE BABULON

SABAT TLAI LAM:

June 2

TUZARH SIAR DING: Thup. 13:1-12; Thup. 14:9-11; Thup. 16:2; Thup. 19:20; Thup. 20:4; Jer. 51:6,7,53,57; Thup. 18:1-4.

BIBLE CANG KEN: "Puan hmangfem ih tahmi hnipuan a hruktu vancungmi in, cuih canah na minungpawl a kilvengtu vancungmi maksak, Mikhael a lang ding. Hi miphunpawl hnenah an thawhkeh ihsin an ton dah lo mi harsatnak nasa zet a thleng ding. Cuih tikcu a kim tikah Pathian cabu sungih hmin nganmi na miphunpawl cu runsuak an si ding" (Dan. 12:1).

SETAN (rulreng) le leitlun ih thu nei zet pahnih tangtlang in Pathian zumtupawl parah hremnak an tuah ding.

Thuphuan 13:1-10 ah tifinriat sung ihsin sahrang a hung suak mi kha tlavang, vom le kiosa tiin (Thup. 13:12) thu kha (Dan. 7:4-6) sungih sahrangpawl kha taksa pakhat parah an zaten a langter theh. Zirlai 6-nak ih kan zoh mi vequin Dan. 7 kha Babulon (kiosa) lal ram a ding hnu ah Medo le Parsia (Vom le Grik (tlavang) cuih hnu ah thuneibik lalram Rome a hung suak. A hramthok ah milem biaknak ram in a ukih a hnu ah Rome Pope lalram ah a thleng theh. Cule sahrang palinak ihsin a hung suak mi thu nei zet Kifate a hung suak (Dan. 7:7,8, 19-21,23-25). Phundang zetin

Rome ih um Pope thuneihnak a um ih, midang thawn an bangaw lo (Dan. 7). Kha mi kha Thuphuan 13:1-10 ah tifinriat sungih sahrang in a langter sal. Bible zirsangpawl in Rome hi midang dodaltu, Thuphuan 13 ih can neta thil thleng dingni tlangzarhnak a si.

Rome hi amah lawngin a lang lo, lal thuneihnak dang a langter. Tuzarh sungah Thuphuan 13 sungih thil cangmi le thuneihnak langtertu kha a tlangpi in kan zir ding. Cumi cu thusuhnak an tuah theu mi a si. Hi thil cangmi ih tican ziangso a si? Cumi hrangah ziangvek in so kan timtuahawk ding?

**THAWHSAL NI
THIHPITLAK HLIAMHMA DAM**

June 3

Thuphuan 13:1-10 siar aw. Himi thupawl in Pope thuneihnak ziangso a sim duh? Ziangah so hlanih Pope thuneihnak le a ralai dingmi ih thuneihnak pahnih fehdan ziangtin so a langter. Uar zetin a umdan a langter mi kha hminsin aw. Himi in ni neta ih thil cang dingmi umdan ziangpawl so a langter?

Pathian hi kawhhran hmuahhmuah ih minungpawl hnenah rinsantlak mi rinum a si. Thuanthu sung ihsin a lak mi a si ih a tuah dingmi kha Bible in felfaiten a tarlang. Ni neta ih thil thleng dingmi khalah hivek thotho a si ding.

Thuphuan 13:3 siar aw. Thil cang mi ziangso a um. Rom thuhla fel zetih in zirhmi ziangso a si?

Rome Kawhhran hi sakhanak, thildang a phunphun, ram kheldan tiangin nitlaknak ram khawvel ah a tlaitluan in a thupibik mi a si. Rome siangpahrang Henry IV nakih thuanthu kha Pope thuneihnak hmuhsaknak ah hmang sehla. Pope Gregory VII nak in

siangpahrang Henry parah a thin a hengih Pope lalnak ruh kulh sungah siangpahrang cu remnak tuah dingin a lut. Siangpahrang Henry IV nak cun Pope ih ngaihdamnak ngahih a bawi tohkham hmaiah lut theinak dingah rulh kulh sung tualah thlatang vurtlak laiah nit hum sung kedam hrhu loih dingin a hngak. Gregory VII nak pain siangpahrang lalnak khaisannak le thumnak a tuahmi kha tluangkhawngin nehnak a ngah mi parah a lung hmui zet. Zabi 18 laiah remthatnak in a luah khatih ruahnak dik nei dingah French ramkhel buainak khalah Rome-pawl ih ramkhelnak le sakhanak, lal thuneihnak in a uk ih remthatupawl tla an thekdarh theh. Kum 1799 ah thawnginn sungah a thi mi Pope Pius VI nak kha French ralkap in 1798 ah an kai ih, Pope lalnak thuneihnak kha a cem ih, thihpitlak hriamhma a tuarnak a si.

Thuphuan 13 ah thihpitlak hriamhma a damsalnak a um ih, nunnak a neisal tiah a sim. Gregory VII san laiah ral hriamnam thawn rampi thuneihnak phun a neihmi kha tui nitiang ah Rome-pawl in an nein awn lo. Pope ih thuneihnak an neihsal mi kha tu baite lawngin a si ih, lungawi za ngaingai a si. Sakhanak le ram uknak tiangin lal thuneihnak a hmangih (Santhar thuanthu ngan miih hmuhdan ahcun 2015 ah American dan thu an zohfel ih mipi hrugitupawl zungpi ah sakhanak le ram uknak thu ah Pope Fransis ih thu simmi ah an thuneihnak hmaisabik a hmanmi kan hmu) simsung thu kan zoh mi vekin himi thuneihnak lawng hi a thangso vivo dingmi a si.

Thucah sim ding tuanvo pekih kawhmi kan si ih, huatawnak fate khal um lo dingin le thucah rinum zetin ziangtin so kan sim thei ding. Ram uknak dan tuahtupawl ih soisel ding um loin, an tangah kun loten um dingin tlaitluan thutak kan sim phuang thei ding, ziangah so a tul?

**TLAWNGKAI NIKHAT
SIMSUNG THU IH U.S.A**

Thu an suh theu mi cu: Tui sanah le hmailam canah Rome in hlan lai vekin thuneihnak an neisal kem? Kha mi kha Thuphuan 13 ah ngan in a um. Hlanlai ih an tuahdan vekin cumi ni ah ralkappawl kha thupeknak a tuah ding. Thuphuan 13 ah cumi ih a phi kan hmuh thei mi a um.

Thuphuan 13:11,12 siar aw. Himi thuneihnak neitu zoso a si? Kan theihthiam dingah hminsinnak ziangvek in so in bawm?

Himi sahrang hi hlanlai ah a rak um zo mi a si. Protestant-pawl in can reipi Rome an hmuhsdan ahcun thla 42 sung kha thuneihnak pekmi a si (Thup. 13:5). Thla 42 hi kum thum le hrek thawn an bangaw (Dan. 7:25 le Thup. 12:14). (or) Simsung thu ih ni 1260 ti mi (Thup. 12:6) a si ih, Pope in amah dodaltupawl a hremnak le thuneihnak a neih sung can a si. Simsungnak ih can tuatdan ah (ni khat kha kum khatih reldan a si). Pope thuneihnak kha AD 538 ihsin thokin 1798 kum tiang a si. AD 1798 ah Pope thawng an thlak a si. Cui canah Pope thuneihnak kha thihipitlak in hriamhma a tuarih himi hi simsung thu a thlen famkimnak a si.

Himi thuanthu ih thla 42 a cemnak 1798 kumah thuneihnak dang a hung umsal (Thup. 13:11; Thup. 13:1). Cui thuneihnak cu lei sung ihsin a hungsuak, a hilanh thuneihnak dangpawl thawn an bangaw lo, a dang cu ti sung ihsin an suak (Dan. 7:2,3). Tipi timi cu mipi tampi umnak tinak a si. Na hmuhmi hlawhlang nu ih tonak tipi kha a thangso zo mi mipi tampi umnak ram le miphun tinak a si (Thup. 17:15).

Himi thu hi American ram a relnak rori a si. Himi ram hi ramdang uknak tangah a um loih minung um F-7

June 4

dahnak hmun khal a si lo ruangah hi vek ram le thuneihnak nei an um lo.

1798 ihsin a hung thangso mi thuneihnak neitu leitlun ram pakhat a si ih, cahnak le ropitnak leitlun mipawl ih uar mi le rinsan mi a si ko lo sawm? Hi tahthimnak a hmanmi in thu elnak um thei lo dingah a tuah. Ram uknak pakhat lawnglawng hi simsung thu ih a tarlang mi a si ih, USA American ram hmuhsaknak a si ti mi hi a palh thei lo mi a si. **E.G White, The Great Controversy. Pp. 440.**

Himi uknak hi tuufa ki pahnih nei ti in a tarlang ih, tuu timi in nunnemnak a khiihmuh. Cui ram uknak in “rulhreng tongin a tong” (Thup. 13:11). A sim duhmi cu uknak thuneitu dangpawl ih kut tangah hremnak a um vekin a tuah leh ding tinak a si. Thuphuan 13:11-17 ah Rome in simsung thu rak phuan mi thuneihnak ih a rak hruainak ziangvek in so a hmang. Kha mi thuneihnak kha U.S.A American phenih a um mi a si.

**TLAWNGKAI NIHNIH
BIAKDAN DING THUSUAHNNAK**

June 5

Sakhua thuanthu hmuahmuah ah milem biak le biaknak fehsualnak thu ah Pathian in a cingfel theu (Matt. 4:8-10). A netabik buainak Thuphuan 13 ah Biaknak thu a suaksal ding mi kha a tarlang. Pathian fapawl in an rianmi le an biakmi ah duhhirlnak an tuah a tul (Josh. 24:15).

Zirlai 2-nak ah Daniel le can cemnak thuah sui milemumpi be dingih fialmi Hebru tlangval pathum thuanthu kan zir (Dan. 3:5). Thuphuan 13 ah kan hmuhsal mi ih tongkam hmandan ah can cemnak ih a um mipawl in hremnak an tuar ding thu a tarlang sal. Dan. 3 ih thil thleng mi hi ni netnak ih a thleng dingmi rak langter sungmi a si. Thuphuan 13 ih sahrang thuneihnak a tarlang mi ah

mi hmuahmuah milem be dingih thupek mi a si (or) meipi sungah hlonih thah ding an si. Thuphuan 13 thawn an bangaw ih sahrang ih mi zuk biak lotu cu thah an si ve ding (Thup. 13:15).

Thuphuan 14:9-11; Thup. 16:2; Thup. 19:20; Thup. 20:4 siar aw. Biaknak thuthawn pehaw in a ra tleng dingmi tihnung zet ziangso a si?

Babulon hi biaknak fehsualnak ih khawlipi a si ringring. Babel in sangdawl mi in a saktupawl ih tumtah a langter. Cumi cu Lucifer in mero tlunah kai in to a tum mi vek a si (Isai. 14:14). Leitlun pumpuluk tilik a tlung laiah ammahte in runawk a tumaw mi thawn an bangaw (Sem. 9:8-11). Babulon thar kha minung kutsak mi siangpahrang cawisanawknak vek a si. Nebukhanizar in “A ropi zetmi Babulon ka kut ih sakmi” tiah a porhaw (Dan. 4:30). Cui hnuah Belshazzar in Solomon biakinnpi sungih sui khuathai pawl kha puai tuahnak ih zu innak ah a lak ih Sabit zu innak ah a hmangih sui, ngun, dar thing le lungih tuahmi milem pathianpawl an thangthat (Dan. 5:34). Biakinn sungih khuathai thianghlim a sunglawi zetih hmanmi cu riter theitu Sabit zu innak ah an hmang ih an zaten thleidan thiamnak an thinlung a hloter theh. Babulon a sungih siatsuah an si thehnak kha a rahuah an ton mi a si. Babulon zu in thiinhak tlak lenglam thatnak thutakawkternak in kanmah siatsuah dingah in bum thei. A dik lo mi biaknak le ruahnak sualpawl hi Setan uknak ram ah a tlaitluan ih an hmanmi a si.

**TLAWNGKAI NITHUM
A MAKSAK ZETMI BABULON**

June 6

A tangih Bible cangpawl siar aw. Babulon thu ziangso in sim (Jer.51:6,7,53,57; Zek. 2:7; Thup. 17:5,6; Thup. 18:2,3).

Sakhaw fehsualpawl ih khawpi kha Babulon a si tiah mizanah kan zir. Can netnak lamih miphun hmuahmuah bumtu thiltithei zet tahthimnak thawn a remaw zet.

Rulhreng, tifinriat sungih sahrang le sahrang senpi thawn zohthim aw (Thup. 13:1-3; Thup. 17:3; Thup. 12:3). An bangawknak ziangso a si? Ziangmi so an danglumnak?

Sahrang pathumpawl in ki pahra le lu pasarih an nei cio. Dan. 7 sungih a simmi sahrang ki le lu pawl a langter sal. An hlanih a ummi ram uk thuneihnak par ihsin pehzom in ram an dinsuak vivo. Sahrang sen in rulhreng le tifinriat sung ihsin a hung suakmi sahrang sinak a zate komin a langter (Pope thuneihnak kha Rome uknakpawl khiihmuhnak a si). Cuvek in lei sung ihsin a suakmi sahrang (Thup. 13:11-14), Pathian dotu a langte ih pawlkomaw pawl an si (Jacques, B. Doukhan, Secrets of Revalution, The Apocalypse, Through, Hebrew Eye (Hagerstown, md: Review and Herald. Publishing Association, 2002). Pp. 162). Thuphuan 17 ih a bet sal mi thupawl cu sahrang sen parih totu nunau, cozah thuneihnak le sakuanak komawknak a khiihmuh a si. Himi nunau hi Thuphuan 12 sungih fala thianghlim thawn a bangaw lo a si.

Fala Thianghlim (Thup.12)

1. Van ah
2. Ni ih thuamaw
3. Arsi hleihnih lal lukhum
4. Rulhreng in a do
5. A tangmi Khrihfa bu ih nu

Hlawhhlang (Thup. 17)

- (1) Tifinriat parah
- (2) Mepian le puan sendup ih thuanaw
- (3) Sui, tikep lung le lungman tamih thuamaw mi lukhum
- (4) Rulhreng ih bommi
- (5) Hlawhhlangpawl ih nu

Hlawhlangpawl ih nu a si vekin, amahte ih cithlahawknak in a buai zet. A umnak kawhhran phatsantu nu, in phatsantu fanu tampi a hring. Pathian kha fehsual mipawl neitu a si lonak a phuang lang. Phatsantu Khrihfapawl cun rapthlak zetin sual an tuah. Pathian zumtu taktak pawl cu rulhreng in a do ih, kum za tampi sung tikcu pekmi le venhim an si ve.

Thuphuan 14:8, Babulon siatnak kha mipipawl hnenah ralrinnak pek a si zo. Thutak an pialsan ih sahrang hminsinnak hmgan ni neta ih bumnak sungah hruaisal ding an si (Thup. 14:9-11). Himi ralrin peknak hi nasa zet le hmual nei zetih simsal a si ih, Babulon zirhnak sungih a um lai mipawl tiangin nunau nui sung ihsin tlansuak dingin ni neta ih atanglai mi Khrihfa thawn komaw dingah Pathian in kawhnak vawrtawp a tuahmi a si (Thup. 18:1-4).

TLAWNGKAI NILI KA MINUNGPawl NUNAU NU HNENIN SUAK UH

June 7

Kum rei lote ah Bible simsung thu zirtupawl in leitlun ih thil thlengmipawl hi simsung thu zulin a um an ti ih mak an ti nasa. Can cemnak thawn pehaw in an hmu hleice. USA American ih hnatauan danpawl kha ruat aw. Kum 1851 hlan thuah kirsal awla Adventist-pawl in American hi sahrang pahnihnak huham neitu a si tiah an sim zo (Thup. 13:11-15). Hlanlai khawvel kum 1800 hrawngah thuneihnak sang zet neitu an um ih, Prussia, Frace, Austria, Hangary le England pawl an si. Cui sanah U.S.A American sinak hmintsintlak cu daihnak an neih can a si ih, an ram ralkappawl tla thawng kul tluk an si. Cumi lak ihsin thenhra ih thenkhat pawl kha Waterloo ral donak (1855 kum) ah ral dotu an si. 1814 kum a thlen hlan kum 40 a rak liammi ah British-pawl in an rak do ih, Washington

D.C kha mei in an rak urkang. 1867 ah Sitting Bull's mi ralthapawl in US ramih ralbawi (7) nak Custer ih hoha mi rang ralkap bu khatpawl kha an that fait heh. Cui hnuah America ram hi leitlun ah sahrang hminsinnak nei dingah thuneihnak neitu a si leh ding tiah hrifiahnak a tuahtupawl in an rak sim zo. Anmah le an ram leilung ciar ihsin American-pawl an do rero ding nan, an neh lo ding.

Leitlun ih thil cang mipawl hi kan zum mi vekin a rak famkim rero mi hi mangbang ding a um lo. Can cem tiangin thil tampi ra thleng bet dingah phuan zo mi a si. Curuangah sahrang hminsinnak thu reltlannak ah amah hi a thupibik ih hmuh mi a si ih, amah vek zohman a um lo. Thukhaam palinak a thlun lotu tla a si.

Cuhlei ah phuan tulmi tampi a um lai.

Thuphuan 18:1-4 siar aw. Thil cangmi ziangso a um? Himi hi kan hminsin ding ziangah so a pawimawh. Leitlun ih hnatauan dingmi thuah in zirhmi ziangso a si?

Himi Bible cang in leitlun ih ramkhelnak le uknak, thinlung put ziazza, thlarau lam thuah ruahsannak a um lonak thu a langter. Leitlun ih sakhuia zirhawknak ah a sualmi in midang siatnak ding khawkhannakpawl a langter. Cui canah van ihsin vancungmi pakhat a tleu zetmi in leitlun a tleuter ih an hrangah ruahsannak sunglawi a pek. Pathian hnenah rinum zetih a umtupawl ih theih tulmi rak zir lotupawl kha Babulon ihsin suak dingah kawh an si. Himi hi can cemnak lamih thleng dingmi a si ih, Pathian a zumtupawl kha Babulon uknak sungih an um lan khalah Pathian hnenih rinumnak rak tuah zotupawl an si.

Babulon ih a um lai mipawl kha Bawipa in, "Ka minung" tiah a kawhnak kha kan hrangah sullam ziangso a neih? Midang thawn kan pawlkomawknak ah hngilh lo dingah ziangah so kan hrangah a thupit?

TLAWNGKAI NINGA**June 8**

RUAHBET DING: Setan in Pathian daan a dodal ih Pathian khal a do. Pathian thuneihnak le a uknak lalram tiangin a dodal. Ni netnak ahcun doawknak netabik kha a tawp khawk a thlenpi ding. Setan in Pathian thukhaam thluntupawl kha a do lehsal ding (Thup. 12:17; Thup. 14:12). Leitlunah Pathian ai-awhtu le upatnak petu an si ruangah cumi nunpi thei lo dingin dodalnak a ummi a si. Pathian dodalnak kha vanah hlan laipi ihsin a rak tuah zo ih, kan umnak leilung tiangin a sunzom vivo. Van ih doawknak ah a sung zo ih leitlun khalah a sungsal. Vanah doawknak a suah thok laiah Setan ih a tumtah mi cu Pathian thukhaam hlonhlo ding hi a si.

Himi a tuah famkim thei lawng sersiamtu do dingin ral donak tualrawn ah a lut thei ding. A sung ruangah van ihsin hlonthlak a si ih, a ral donak thuam kha leitlun khalah a hmang vivo. Pathian dan buarih sualnak tuah dingah minung kha a bum ih zinpengah hruai hloih a dungthlun thei dingin a tumtah. Himi tuah famkim thei dingah cun thukhaam hlon fait heh ding. (or) Dan thu pakhatte kan hnon mi ih thaman kha a zate ih hnnonnak tha man thawm a bangaw. Thukhaam zate lakah hmuitin mi pakhat nei in a zuam rero ih, a thununnak tangah amai nun cawnnak hi daan buarnak a si ih thukhaam zate buar mi sualah a cang (Jame 2:10). **E.G White, The Great Controversy. Pp. 582.**

RELTLANG DING:

1. Nan zir canah leitlun thil thlengpawl reltlang uh. Ni neta lamah kan zum tulih a ummi ziangso a sawh duh. A thupi phuan tul ziangso a um lai? Bible simsung thu le E.G White cangan mi ah ral tha zetin ni le thla can tuatin thu lungkhen nei ih ral tha

zetin kha can hminsinnak simphuannak tuahnak thu ziangtin so kan hrial thei ding? Fimkhur ih kan kilhimawknak ziangtin so kan zir ding?

2. **Biaknak ih thubuai kha ruat rero aw. Thildang biak timi ziangso a si? Mi tampi ih an biakmi ziangtin so kan biak ve thei?**
3. **Babulon khawlipi ah Pathian in a mi le sa pawl a nei lai timi kha ruat aw. Babulon a sim duhmi ziangtin so kan theihfiang thei ding? Ram uk thuneihnak le sakhua thurin an zumnak san a tlaih lonak thucanh midang hnenah sim ding tuanvo kan neih thu ziangtin so in zirh?**

ZIRLAI 11**PATHIAN HMINSINNAK LE SAHRANG HMINSINNAK****SABAT TLAI LAM:****June 9**

TUZARH SIAR DING: Sem. 17:9-11; Suah. 31:13,17;
Thup. 13:17; Efe. 1:13,14; Heb. 4:9,10.

BIBLE CANG KEN: “**Bawipa ziangtin kim tithei Pathian, na thil tuahmi hi ziangtluk mangbangza so an si. Miphun hmuahmuah ih siangpahrang na lamzin cu a dingmi le a dik mi an si**” (Thup. 15:3).

MOSI hla le tuufa hla cu tuzarh ih Bible cangken ihsin a hram kan thok ding. Hlasaktupawl cu sahrang le a milem tlunah siseh, a number ai-awhtu tlunah siseh, nehnak ngahtu an si. Van ih thlalang tifinriat kapah an ding (Thup. 15:2). Khatawk mipi lakah ziangtin so kan tel thei ve ding.

Hminsinnak pakhat an rel theu mi cu ni neta ih Pathian zumtu ngaingaipawl ih vancungmi pathum thucanh kha an phuang ding. Kha mi kha sahrang hminsinnak kalihih ralrin peknak a si. Bible sung hmuahmuah ah hivék ih a thupi mi ralrin peknak a um lo. Himi hminsinnak pomdan tampi a um ih, kum tampi an buaipi mi a si. Daan kalh (buar) tu ih calah hminsinnak, tangka suahnak card number (or) mi pakhatih nunnak le a ziaza thinlung putpawl automatic ih theih theinak ti vekpawl an si. (or) (Somebiometric Identification).

June 9-15

A buai zetmi Babulon ih pomdan a karh vivonak kha mangbang ding a um lo. A hmin sullam ah “buainak” (Confusion) ti a si. Vancungmi pathum thucanh kha hmual nei zetih tlangaupi theinak dingah Pathian kawhhran a tanglai mipawl in fiangten kan theih a tul. Tuzarh ahcun sahrang hminsinnak ziangtinso kan phial thei ding ih, Pathian hminsinnak ziangtin so kan ngah thei ding timi thate ih theihthiam kan tum ding.

THAWHSAL NI**June 10****PATHIAN HMINSINNAK A MIPAWL THLEIDANNAK**

Pathian minungpawl lenglam hminsinnak langtertu thlung hlun sanah phun hnih in a um. (1) Vunzim tannak hi mi hi a hmaisabik an hnenih pekmi a si. (Sem. 17:9-11; Suah. 31:13,17).

Pathian in Abraham le a cithlahpawl hnenah an rundamnak thukam hminsinnak ah vunzim tan a fial. Mipapawl an suahthlak ihsin a niriatsnak ah vunzim tan ding a si (Pui. 12:3). Hihi sakhanak nunphung a poimawhzia langtertu a si. Vunzim tan hi a thupi zetmi thinlung tuahtharnak khiihmuhu a si (Danp. 30:6). Judah mi sinak ah a lenglam ih serh tannak kha taksa parih tuahmi a si ih, Judah mi ngaingai a si lo. Sunglam ihsin serh tanmi kha Judah mi ngaingai a si. Judah mi ngaingai pawlin thinlung sung vunzim tannak an ngah. Daan ih phur ruangih tuahmi a si lo, Pathian thlarau ih tuahmi sawn a si. Cupawl in milai thangthatnak si loin Pathian thangthatnak ngahtu an si (Rom 2:28,29).

1 Korin 7:19; Gal. 5:6 le Gal. 6:15 ih kan hmuvekin thlung thar ah vunzim tannak hi Baptisma conak in thleng a si. A hmuhsak mi cu “Sersiam thar” sualah mi thi, an si ih nunthar nei dingih thimi an si (Rom 6:3,4).

Hiruangah Paul in vunzim tan hi a thupi nawn lo, duhdawtnak ih hnauantu zumnak thawngin a si a ti (Gal. 5:6). Cui nun cu Pathian thukhaam a sunloih ih a nunpi a si.

Lenglam ih a langmi kha ziangso a si? Pathian in amah zumtupawl kha ziangah so hminsinnak ah cucu a pek (Suah. 31:13,17; Ezek. 20:12,20).

Sabat hi sersiamnak thei kirsal dingih hminsinnak a si (Sem. 2:2,3). Vunzim tannak kha Abraham hnenih hramthokmi a si. Jesuh in “Sabat cu minung hrangih tuahmi a si” a ti tikah Semtirnak thu a sawh duhmi a si (Mark 2:27,28). Himi in Pathian ta kan sinak a langter. A kutih sersiam mi kan si ruangah amah ih thiamco mi le thiaghlimter mi rundam kan sinak in a neih mi kan si. Paul in vunzim tannak hi thupitnak a nein awn lo tiah a ti. Sabat ni ulhnak a tel mi thukhaam thlunnak hi a tlaitluan in a poimawh zet a si tiah a sim (Heb. 4:9).

Thinlung vunzim tan zo mi na si maw, si lo, na thinlung sungah ziangtin so theihawknak na neih?

**TLAWNGKAI NIKHAT
SAHRANG LE BIAKNAK FEHSUAL**

June 11

A tangih Bible cangpawl in sahrang hminsinnak hnon a thupitnak ziangso in zirh? (Thup. 13:17; Thup. 14:9,10; Thup. 16:2).

Pathian thinlung ih hremnak sabit zu hran, a netabik hremnak phun 7 ih thil thleng dingmi a tuartupawl kha kat le mei tili sungih hlon dingmi an si. Sahrang hminsinnak tlansan ih thlalang tifinriat kapah Pathian le tuufa thiangthat ih nehnak hla saknak thawn thim ahcun an thlau-aw tuk.

Zohman ih neih duh lo mi hminsinnak ziangso a si? A tlunih Bible cangpawl hi biaknak fehsual thawn an

pehzomawknak a langfiangter. Zirlai hmun tampi ah kan zir zo veikin Dan. 7 ih a palinak sahrang a netnak lamih a hung suakmi kha Thuphuan 13 ah fiang zetin a langter. Amah in can thennak le thukhaam daan thu thleng a tum ding (Dan. 7:25). Dan thu thleng a tum mi pakhat cu sabat zarh ni a si ih, thukham (10) sungih a palinak a si. “Cuih ni cu Pathian in lei le van le tifinriat le a sungih a ummi hmuahhmuah niruk sungah a sersiam ih, a ni sarihnak ah a cawl” timi sersiamtu Pathian a sinak langtertu a si (Suah. 20:11).

Vancungmi pakhatnak thu phuanmi in sahrang ih thuneihnak thawn thleng a tummi kha thukhaam (10) sungih sersiamtu Pathian biaknak kha a sawh duh. Thuphuan 12 le 14 ah Biaknak thu cang sarih lai a lang. Thuphuan 14:7 cun a dik mi biaknak lawng a tarlang ih, a dang cang 6 pawl cun sahrang milem biakih feh sualnak a langter (Thup. 13:4,12,15; Thup. 14:9,11). Vancungmi pathumnak ih thucah in biaknak fehsualpawl ih ngah dingmi covo kha a sim. Pathian dik betupawl kha hitin an sim. “Pathian ih mi thiaghlim, Jesuh hrang rintlak zetih nung Pathian thukham thluntupawl in thinsau ih tuar theinak an neih mi an langter ding (Thup. 14:12).

Himi thucah pathum phuan mi in minung hmuahhmuah buur hnih ah a then. Sersiamtu Pathian biaknak ni sarih ni zarh sabat hmangih thukhaam thluntupawl le sahrang le a lem betupawl tiin a then. Fehsual biaknak hnakin sersiamtu Pathian biakih thukhaam ih ummi veikin sabat ni zarh hman hi hril ding in pek mi a si.

Pathian biak timi le rinum timi karlak kha an zomawknak ruat aw. Biaknak ih tuahdan a langmi le Pathian dik biaknak ih rinumnak a lang.

**TLAWNGKAI NIHNIH
PATHIAN TACIK (OR) HMINSINNAK**

Hminsinnak hi hmin senthut thawn a bangaw. Thusak ding lai a thupi zet ti theihnak ih hmanmi a si. HLanlai ah thil neitu langternak ih nemhgnetnak dingah hminsinnak kha tlak lei (ciar bek) or khuai hnun parah an nem kai theu.

Pathian hminsinnak (Tacik) hi ziangso a si? Ziangtik ah a pekih ziangvek in so a pek (Efe. 1:13,14; Efe. 4:30; 2 Tim. 2:19; Thup. 7:1-4; Thup. 14:11).

Pathian hminsinnak hi amai ta hminsinnak le a mipawl a humhimnak dingah a si. Paul in pianthrnak le thiang thilarau laksawng ngahnak thawn pehaw in hminsinnak tacik thu a sim. A sim duhmi cu zumtupawl hmuahmuah Jesui rat tikah rundamnak famkim an co ding mi ah hnangam dingah a si.

Thuphuan cabu in Jesui ratsal hlan teah hmainsinnak tacik khen dingin a sim. Cui hminsinnak tacik kha ruah neta a surih thiang thilarau kha minung 144000 hnenih pek dingah a sim. Pathian hmin an calah khensak an si ding. Zumtui nunah Pathian ziazza langtertu dingah thiang thilarau a cangvai.

Pathian hminsinnak le sahrang hmainsinnak an danglamnak zohthim aw. A umdan le hminsinnak hmun a bangawk lonak ziangtin so a um? (Thup. 7:3; Thup. 14:9).

Pathian hmainsinnak kha rinum zetih Pathian betupawl pek a si. Sahrang khalin amah betupawl hnenah hmainsinnak a pek ve. Cal ah Pathian hmainsinnak khen timi kha thinlung sungih duhhrilnak tuah ih Pathian simmi vekih nun hmangtu langternak a si. Hminsinnak dangpawl kha an kut a si lole an calah tiih nganmi a si.

June 12

Hi mi in sahrang biakdan mipi lakah phun hnih a langter. An zumnak ih pomnak duhhrilnak an nei ih Pathian ngaingai kan be ko tiih ruatawtu le anmai lungkimnak um lo hremnak tih ruangah an thu suahmi thlunnak a si. Cui can ah lei thei lo le zuar thei lo in khap a si ding ugm that khal an that ngaingai ding a si.

Leitlun minung thawn lungrual tlangnak tuah, mah le mah rinsanawknak an nei lo, taksa duhnak an thlun ih sahrang hminsinnak ngah dingah an tiaraw. Pathian hmaiah tangdor ih a umtu rundam an sinak an theih fiangawk ruangah Pathian thutak kha zawnlungten a thluntu an nun thianhlimnak pekmi an si. Hipawl in an calah Pathian hminsinnak khen dingah van lam thlarau tuahthatnak cotu an si. **E.G White, Testimonies for the Church. Vol. 5. Pp. 216.**

**TLAWNGKAI NITHUM
SAHRANG HMINSINNAK**

June 13

Himi hmainsinnak hi ziangah kan hrial a tul? Kan zir zo mi ah Dan. 7 ih sahrang palinak hnu ih thuneitu cawisang a sinak kha Thuphuan 13 ah Tidai sungih a hung suakmi sahrang in a langter. Amah in can le thukhaam thleng a tum ding (Dan. 7:25). Sabat thleng a tumnak thu pakhat a si. Cuih thu in lei le van tifinriat le a sungih ummi hmuahmuah Pathian in a tuah ih, ni sarah ni ah a cawl timi (Suah. 20:11) ah a langter.

Vancung mi pakhatnak ih thucah in ca siartu hnenah cui thukhaam a langtersal. Sersiamtu Pathian kan biaknak fiangte ih a langtertu kha sahrang pain thleng a tummi a si. Sahrang le a lem betupawl hrangah an ton

dingmi a sim theh hnu ah (Thup. 14:9). Pathian rinsantupawl ih rinumnak an langternak Thuphuan 14:12 ah a um.

Thuphuan 14:12 siar aw. Ni neta ih thil um ding mi ah Sabat hi a thupibik ah a cang ding. Pathian ih rinumtupawl hrangih theihthiam thei dingin ziangtin so a langter.

Pathian fapawl Pathian thu thluntu le Jesuh hrangih rintlak ih a nungtupawl in hi bangtuk canah thin sauin tuar theinak an langter a tul a si (Thup. 14:12). Thukhaam ih kan hmuhami a palinak sabat in sersiamtu Pathian lawng biaktlak a si ti a langter. Sahrang hmainsinnak kha a phunphun ih langter mi a si. Cupawl cu Sunday ni ih Pathian biaknak thawn a pehzomaw. Bible sungih a um lomi Sabat lem (ni zarh ni deu) an tuah mi a si. Thukhaam a palinak hmang thei lo dingih dokalhnak a si.

Khrihfapawl in Sunday ni ah Pathian an biaknak hi sahrang hmainsinnak an ngahnak a si lo sawm? Thuphuan 13:15 thu vekin himi biaknak a thlun lotupawl cu sahrang in a that ding. Himi hi thih le nun karlak thu a si ih, a tumtah mi a thlen hlan, a netabik hnixsaknak a thlen hlan tiang sahrang hmainsinnak pek a si lo ding. Curuangah zohman in sahrang hmainsinnak a ngah lo ding.

Pathian thukhaam, Jesui zumnak a langter mi hi a tuah a poimawh zetmi KHrihfpa dik sinak ziangso a sim duh?

**TLAWNGKAI NILI
HMINSINNAK TACIK SABAT**

San thuanthu hmuahmuah ah ni sarih ni Sabat hi Pathian zumtupawl hmainsinnak a si ti kan hmu zo. A hramthok Adam le Eve san ihsin Israel san tiang a

pehcihaw vivo. Thlung Thar Kawhhran ah Jesuh le a tirhthlahpawl khalin an ul ringring ti kan hmu. Ni neta ih Pathian zumtu “Pathian thukhaam thlun ih Jesui zumnak a neitupawl” hrangah hmainsinnak a si (Thup. 14:12).

Sabat hi ziangah so a poimawh? Khrihfpa hrangah ziangso a tumtah mi a si (Suah. 20:8-11; Heb. 4:9,10).

Thukhaam ih a thupitnak kha Sabat ah a um. Sersiamtu in a thuneihnak hmainsinnak ah pekmi a si. Hi zawnah a hmin a sal ih, “Bawipa na Pathian” tiah a ti. A thuneihnak ram a langter ih, “Lei le van tifinriat le a sungih a ummi hmuahmuah” parah thuneitu a si. A thuneihnak hrampi a langter ih, “Ni ruk sungah van le lei a tuah ih ... ni sarih ni ah a cawl” (Seem. 2:2,3).

Thlung Thar ih a langmi cu Pathian in thil zangkim hi Jesui thawngin a tuah (John 1:1-3; Col. 1:16; Heb. 1:1,2). Jesuh in leilungpi hi ni ruk sungah a tuahih ni sarih ni ah a cawl. Tlawngkai ni nga tlailam ah an khainak Cross par ihsin “Kat heh zo” tiih a au suak mi in himi thu hi a thupibik in a tarlang a si (John 19:30 NKJV). Sersiam mi a theh veten Sabat ni ah a colh vekin rundam kan sinak dingah kan aiawh thihnak tuarin raitluan thawiawknak a tuah theh hnu ah, thlankhur sungah Sabat colh ni a hmang. Curuangah Sabat ni thlawsuahnak kha “sersiamnak ah a voikhatnak le cross ah khan a voi hnihnak thlawsuah a pek ih, thlawsuah thuah hnih a peknak a si. Curuangah Hebru cabu sungih nganmi vekin “Pathian a hnatuannak in a colh vekin an hnatuannak in a cawl ve ding” (Heb. 4:10 NKJV). Curuangah Khrihfapawl in sersiamtu Pathian betu kan si ti langternak ah Sabat ni ah kan cawl ding a si. Sabat zarh ni kan hmannak in kan rundamnak hrangah tuah theimi kan neih lonak fiangten a langter. Curuangah

Bawi Khrih kha kan zumnak hramthoktu le famkimtertu hna a tuan theinak a si (Heb. 12:2).

Sabat ni ah hnatauan kan colh ruangih hminsintlak na nei ahcun Sunday ni hmannah in ziangso a langter ve? Babulon ih mizia thawn ziang vekin so an bangawk?

TLAWNGKAI NINGA

June 15

RUAH BET DING: Pathian zumtupawl cu an calah hminsin an si. Thutak sungih an um ruangah hminsinnak tacik dang hmuu ding a um lo. Pathian sumtupawl cu ni neta ih a tleng dingmi hrikthlaknak hrangah an sia, tha thleidannak le thlarau ih tacik khensak mi an si ruangah an tluk maimai thei lo. Pathian thuthennak kha a thok zo ruangah leitlun ih thil tleng mipawl ruangin thil umzia kan thei thei a si.

E.G White, The Faith I Live By, Pp. 285.

Thu elawknak le do-awknak ih a tumtah mi thu cu Sabat thu a si ih, rinum le um lo hniksaknak bik a si. A netnak ih hniksaknak kha minung thil tuahmi parah ret a si. Pathian riantu le rian lotu thleidannak a si. Ram dan thawn zarh ni dik lo hmannah a ummi kan thlun ahcun, thukhaam (10) sungih a palinak kalhin Pathian ralpa ih thuneihnak kha langhngan in a pomnak a langter. Pathian thukhaam zawnlung ih thlunnak kha ni zarh dik Sabat hmannah a si ih, sersiamtu hnenih rinumnak kan langter mi a si. Leitlun thuneihnak le hminsinnak pomtu cun sahrang hminsinnak an nei ding. A dangpawl cu Pathian thuneihnak an rinsan sawn ruangah Pathian hminsin mipawl an si.

REL TLANG DING:

1. **Thuelawk buainak um lo dingin Pathian hminsinnak le sahrang hminsinnak midang hnenah ziangtin so**

kan sim thei ding? Sahrang hminsinnak a dik ciahin midang ih an theih theinak dingah ziangvek in so kan sim ding?

2. **Thlarau thianghlim tacik khen le Sabat ziangvek in so pehzomawknak a neih?**
3. **A tlunih tacik khen mi pomdan vekin thutak sungih rinumnak ah thluak fimnak le thlarau lam thu ziangtin so kan langter ding? A sullam the ziangso a si?**
4. **Babulon umdan a thatnak le that lonak rel tlang uh. Pathian uknak thawn an danglamawknak ziangvek so a si? Ziangah so kan kawhhran sungah Babulon rim a nam theu? Pathian uknak rim mi pakhat ah a nam ve theinak dingah Khrihfa ziaza ziangtin so kan hawl ding zir ding ziangtin so kan theih ding?**

ZIRLAI 12**June 16-22****BABULON LE ARMAGEDDON****SABAT TLAI LAM:****June 16**

TUZARH SIAR DING: Thup. 14:8; Thup. 16:19; Isai. 52:9;
 Thup. 18:1-10; Thup. 16:12-16; I
 Siang. 18:1-40; I Kor. 15:1,2.

BIBLE CANG KEN: “A calah hmin pakhat an ngan ih, tican thup a nei. A maksak zetmi Babulon leitlun ih hlawhlang hmuahmuah le misual borhhlawh hmuahmuah ih nu ti a si” (Thup. 17:5).

THUPHUAN bu sungah thlung hlun sungih tongkampawl le mizuk hmuihmelpawl an khat theh ti kha kan theihcia mi a si. Babulon hmin hi Thuphuau cabu sungah voi ruk a lang. Hi thu in hlanlai Nibukhanizar lal ram sim duhmi a si lo. Cui lal ram kha hlan lai leitlun thuanthu ihsin kum za tami a liam zo mi a si. John in thutak a phuansuah mi ah thlung hlun sungih a tarlang mipawl a hmang. Himi thu ah Babulon ih ram khal mipi thuneihnak le sakhua thuneihnak in Pathian zumtupawl kha an hrem. Atui can netnak khalah cozah uknak thuneihnak le sakuanak mipi thuneihnak in kha vek hremnak tuah dingin an hawl rero ti ah a ngan.

Armegeddon timi tongkam thawn a bangaw mi tami a si. Himi ih a tumtah mi cu thuphuau bu sung lawngah hmuah a si. Hebru tong ih (Mount of Megiddo) Megiddo tlangih doawknak sirhsan ih hmanmi a sinak a

lang ih hlan lai Israel ram le a hmun a langter. Armageddon a umnak thuruah rero ahcun khatawk hmunah ralkap tami a um ding tiah an ti. Megiddo kha lei can cem zikah a um leh ding.

Tuzarh cu Babulon le Armageddon thu kan zir ding. Cule himi hmuihmel langdan ziangvek a si ti Bible ihsin ziangtin so kan zir ding timi in sim ding.

THAWHSAL NI**June 17****THINHENGNAK SABIT ZU HRIIM**

Thuphuau 14:8; Thuphuau 16:19; Thup. 17:5; Thup. 18:2,10,21 siar aw. Thuphuau bu sungah Babulon thu voi ruk a ngan. Thlung Hlun sungih Babulon thu a rak nganmi ruat sal aw. Ni neta ih thil thleng dingmi thuthawn pehaw in Babulon thuah himi Bible cangpawl in ziangso in zirh?

Khawpi pahnih thuanthu Bible in in sim a si. Babulon le Jerusalem khawpi thuanthu an si. Bible sung hmuahmuah ah Pathian ih thukam a pekmi miphunpawl hrangah Jerusalem khawpi din a si (Saam 102:21; Isai. 52:9; Isai. 65:19; Thup. 3:12). Babulon khawpi sungah langhngan ih Pathian dodalnak, saklaw fehsualnak nun rawngih hremnak hmun khawlipi a si.

Thuthimnak ah Babel lungdawl kha ruat aw (Sem. 11:9). Hebru tong cun “Babel” hi ‘Babulon’ khawpi timi thawn a awsuah a bangaw. I Peter 5:13 sungah Babulon ih a ummi kawhhran hnenah kutkaihnak ca a ngan ih, a tlangpi ih a sim mi cu hlanlai khawlipi a siat theh zo mi tuisan Iraq ram thu a sim duhmi a si lo ti kha kan thei ko ding. Kawhhran hremtu ding Rome a sim duhmi a si. Rome-pawl ih hnatuandan Thuphuau cabu sungah mak zetih hmin pekmi a langter a si.

Thuphuan 14:8 le Thuphuan 8:3 siar aw. Pathian zumtupawl le leitlun mipawl parah Babulon that lonak in a zelbuai thu Bible cangin ziangso in sim?

Leitlun hmuahmuah NASA Zetih thatlonak a tuahmi in a suan theh. Thildang a tuahmi hmuahmuah hi Babulon thiltitheinak ih suan theh mi ti ah Thuphuan ih a simmi hi mangbang ding a um lo. Kha mi thu kha "A taksa hiarnak (hurnak) Sabit zu" tiah Thuphuan 14:8 a ti. Hihi a dik lomi thurin zirhawknak a sim duhmi a si. Zirhnak sual, thil tha lo tuahnak le a netnak ih a tuar dingmi tla a hnen thothe in a ra thleng. Babulon hi thil tha lo tuah dingah mi hnekhrimtu a si ih, miphun hmuahmuah parah a tuah ringring (Thup. 18:3). Curuangah anmah vekih thatlonak tuahtu si lo dingah mi hmuahmuah fimkhur kan tul.

Tui san khawvel hi zoh hnik, hrokhrawlak, buainak le rukawknak in a khat theh. Jesuh le a thunung pawk ringring ih kan um a tulnak ziangthu so in zirh?

**TLAWNGKAI NIHAK
BABULON A TLU ZO**

Babulon sualnak hi leitlun hmuntin ah a thleng. Cumi cu lei can cem tiang a um ding tiah Thuphuan bu in a sim.

Thuphuan 18:1-10 siar aw. Babulon khaw ropi thu ziangso a sim?

Vancung mi pahnihnak thucah (Thup. 14:8), Babulon a siat zo timi kha Thuphuan 18:2 ah a simsal. A tuahmi that lonakpawl kha a tuahmi vek cekci in a parah a thleng ding tiah a sim. Bible in kan Bawipa a rat zikah Setan in a thiltitheinak hmuahmuah hmangin mangbangza hminsinnak a tuah ding ih, mi a bum ding.

Bum ol mi dik lopawl, thutak ngaina lopawl rundam nan si thotho ding tiah a bumnak aw nem kha thutak ah ruatih kaihngettupawl in an zum ding (2 Thess. 2:9-11). Hi thu hi kawhhran le cozah uknak komaw in Khrih ram an din tikah a famkim in a thleng ding. Cu tik lawngah a taktak in Babulon siatnak a thleng ding. Thuphuan 14:8 hi hi a ralai dingmi thil a si ih, thanso duh ruangah a thleng dingmi a si.

Hi thil hi ziangtik ah a thleng ding ti theitu cu Pathian lawng a si. Babulon in a NASA ZETIH sualnak a tuah ruangah Pathian thuthennak nikhat ni ah a tong ding tiah Bible ih a simmi kan thei. "A sualnak cu van a thleng ih, a thatlonak Pathian in a cing ringring" (Thup. 18:5). Hi thu fehdan hi Thlung Hlun ih a um zo mi hlanlai Babulon Pathian thuthennak a tongih a siat theh vekin ni neta ih thil thleng ding mi a langternak a si (Jer. 51:9).

Hi mi thuthennak hi rinlo paralih a ton dingmi a si lo (Dan.). Bible cang tampi ah fiang zetih a simmi cu, mi hmuahmuah in an tuah mi anmahten Pathian hmai ah an phuang ding (Ezek. 7:8) timi ah Babulon tla a tel. Khrihfapawl hrangah hnangamthlak zetmi thil pakhat cu cui thuthen ni ah kan ai-awh in thu in relsaktu palai kan nei (I John 2:1; Dan. 7:2). Babulon thuzirhnak pomtupawl thu ah amah thawn danglumnak a um lo ding.

Pathian in mi hrokhrawlak le sualnak a tuahtupawl kha a tu ah dan tat loin a zuah ih ni neta ah an tuahmi sualnak vekin a rulsal leh ding timi thu in ziangtin so na hnemawk thei?

**TLAWNGKAI NIHNIH
ARMAGEDDON**

Thuphuan bu hi Khrihfal mi tampi in an theithiam lo nan, Armageddon timi tongte cu an uar zet (Thup. 16:16).

Leilungpi le leitlun nunphung tla hi ni netabik buainak tong dingmi a si. Hollywood zuknung an tuahmi ah Armageddon hi arsi tumpi asteroid in leilungpawl siatsuahnak a tuah ding mi thu a si. Leitlun mi hmuahmuah khalin lei can cemnak hi an thinlung ih an pommi a si.

Khrihfa tampi in Thuphuan bu sungih a simmi vekin Armageddon hi lei can cem zik zawngah nisuahnak ram laifang (Middle East) ah doawknak a um ding tiah an zum. Cangan mi pakhat ah Asia ihsin million 200 ralkappawl hi Israel nitlaknak ram hmuahmuah neh thei dingah a um tiah an ngan. Armageddon ral donak hi netabik doawknak a si dingih, doawknak hmun bualrawn cu Megiddo timi hmun hrawngah a si ding tiah an zum. Himi hi leitlun ih doawknak le hmuntin ih a ummi leitlun ukawknak hrekkhaptawl in hnget zetin an pom.

Bible simdanpawl thawn cun an danglamaw zet a si. Bible simdan ahcun Armageddon hi lei le van doawknak tawpkhawk a si dingih miphun pakhat le pakhat doawk buainak a si lo. Sakhua doawknak a si ih, sumdawnnak le ramkhelnak a si lo. Asinan, sumdawngpawl le ramkhelpawl tla himi ah an tel thothe ding.

Thuphuan 16:12-16 siar aw. Himi cang pakhat lawngin Armageddon thu ziangtin so kan zir thei ding?

(1)Himi hi thuthimnak tongkam ih hmanmi men a si. Butlak bangtuk a simi thlarau borhhlawh kha rulhreng ka sugin Profet deu ka sungin sahrang ka sungin a suak (Profet deu timi kha lei ihsin a suakmi sahrang a sim duhmi a si (Thup. 13:11)). Hitawk ih khawse thlarau timi hi doawknak mak ah (Thup. 16:14). Pathian ih ni sunglawi ni ah do dingin a pok. Leitlun pumhuap in Bawi Khrih le Setan doawknak hi Armageddon timi a si. A tui Iraq ram sehvel kha Thuphuan ih a simmi Babulon a si lo ih, Armageddon tla Megiddo tlang kiangkap hrawngih doawknak a si lo ding.

Thuphuan 16:15 siar aw. Hitawk ih thil thlengmi lakah Jesuh in thuthangtha thucah in thazang in pek ih, ziangtluk ih duhnung mi so a si. A ratsalnak ah a dingfel thianghlimnak ih thuamaw dingih thukam mi kan si. Thlarau lam raldonak ah kan tel ve timi theithiam dingah himi in ziangtin so in bawm?

**TLAWNGKAI NITHUM
ARMAGEDDON LE KARMEL TLANG (THEN 1)**

June 20

Armageddon doawknak timi ziangso a si? A hmin umdan ahcun Megiddo tlang timi a si. Cumi kiangah tlangdang a um lo ih, cutawk ihsin hla lote ah Karmel tlang a um. Curuangah Bible tlawngtapawl in Megiddo tlang hi Karmel tlang a sim duhnak a si an ti.

Bible tlawngtapawl in Elijah le Baal Profet-pawl Karmel tlangih an zuamawknak kha Thuphuan 13 ih phuanmi khhimuhnak a si an ti.

Mizan ah Thuphuan 16:13 ih thu kan zir mi vekin rulhreng, sahrang le Profet deu a langter mi kha Thuphuan 13 ih thumkom Pathian lem zirlai 9-nak ah kan zirih a ra thleng dingmi khhimuhnak a si.

Thuphuan 13 ih thu kha Thuphuan 13:13,14 in a cem tiangin a rel. Sahrang pahnihnak in midang hnakin thuneihnak a neih mi in mangbangza “mipi mithmuh ah van ihsin meisa a tlakter ding” (Thup. 13:13). Himi hi Pathian le Setan hmaiton ih doawknak, Pathian dik biaknak le sahrang biaknak ih doawknak a si.

1 Siangpahrang 18:1-18 siar aw. Himi thuanthu ah thil cangmi ziangso a um? Kha mi in Thuphuan cabu sungih can netnak thil thleng dingmi a langter ih, a phuanmi ziangso a si?

Do-awknak mak phun tampi ih kan hmuh theinak dingah fiangfai zetih langternak a si. Elijah ih thusimmi kha a tluangtlam zet (I Siang. 18:18). Mipipawl in Pathian thukhaam le a dikmi Pathian biak kha an dungtun ih a dik lo mi Pathian an biak. Himi thil tuahdan hi a tlaitluan ih tuah ringring dingmi a si lo. Thatlonak hi sankhat hnu sankhat thuanthu sungah a lang ringring ih ngaihsak loih um men ding kan si lo. Lei le van tifinriat le cerhti put le tidai a sersiamtu kan biak maw? (Thup. 14:7). A si lole mi pakhat maw, thil pakhat khat so kan biak? Thuphuan 13 ih thu kha thil a cangmipawl phuannak a si. Mipipawl in Pathian nung hnakin sahrang le a lem an biak sawn. Himi thil ah tanlam neih loih um a theih lo. Pathian lamih kan tan lo le Setan lamah a tangmi kan si. Himi hi a poimawh zet. Karmel tlangih thuanthu ah felfai zetin kan hmuh vekin a tu ih Armageddon khal a si ding.

TLAWNGKAI NILI

June 21

ARMAGEDDON LE KARMEL TLANG (THEN 2)

1 Siangpahrang 18:18-40 siar aw. Thil thlengmi ziangso a um? Thuanthu a cemnetnak ziangvek so a si. Can cemnak ah doawknak mak tahthimnak tha zet kan neih theinak dingah himi thuanthu ih thil thlengmi in ziangso a langter?

Karmel tlangih doawknak kha Pathian Profet Elijah le Baal puithiam 450 rualpawl doawknak a si (thatnak lam hnakin that lonak lamah minung ziangtluk in so an tam timi hminsin aw). Hi hmunah lei le van sersiamtu Pathian dik zo a si timi fiangten a langter. Leitlun hmuahhmuah bum thehtu rulhreng lole Baal kan ti mi (or) Pathian ngai kan ti ding (Thup. 12:9).

Baal puithiampawl cun cawcang thawinak kangfai theh dingah Baal Pathian hnenah meitlakter dingin an aw neih suahin sun hnu tiang ring zetin thla an cam. Ringpi au hrigh uh, nan Pathian a itthat si pei maw tiah phirsit in a ti (I Siang. 18:27 NKJV). Puithiam-pawl in an lu zing theh tiangin an au ciambco. Tlai lam raithawinak can a thlen tikah beidong le vansang in dung an sip.

Elijah tuahmi Biaktheng kha ciap theh koin voi thum tiang tidai an toih ih, a kimvel ih khur laihmi khal a khat liam theh tiangin an toih. Elijah in Pathian hnenah tluangtlamten thla a cam. Hmakhat teah Pathian in mei a run thlah ih biaktheng lungdawl mi le leilung sung tiang in a kangfai theh. Baal pathian le Pathian ngaingai thiltitheinak zuamawknak kha palh thei loih a lang fiangmi a si.

Thuphuan 16:13; Thup. 19:20,21 siar aw. Baal Profet pawlih an tonmi thawn zohthim aw. Kan hmuhsuak mi ziangso a si?

Kan theihthiam thei lo mi Armageddon thu ah ruahnak ziangso in pek? A tu khalah Pathian ral hloral ding mipawl kha Pathian ih thiam coter mi mi thianghlimpawl hnakin an tam sawn.

1 Korin 15:1,2 siar aw. A rei hlanah a thleng dingmi Armageddon an danglamawknakpawl in ziangtin so in sim? A r alai dingmi canah tleunak kan ngah mi kilhim theinak dingah kha mi kha ziangah so kan theih ringring a tul. Thuphuan 16:15 khalah Armageddon kha fiangte ih a simmi kan hmu. Himi cangin ziangso an tuah tlang dingmi a si tiah in sim.

TLAWNGKAI NINGA

June 22

RUAH BET DING: A tawinak in sim sehla, Armageddon a ral hi hmun tampi ah sersiam mi thilpawl ih mawinak, siatnak pawl kha a milai ih sinak ah a takin a lang. Cumi

lakih kan hmuhmi pakhat cu Thuphuan 16:15, fifir bangin ka ra ding, mipi hmaiah tak lawng le ningzak ih nan um lonak dingah itthat loten a hnipuan a fingkhawitu cu mi lungawi an si (NIV). Hi mi cang hi Armageddon kan timi a takih a thlennak hmun pakhat a si. Thlung Thar hmun tampi ah Jesuh ratsalnak dingah le can netnak thil thleng dingmi hrangah pumpak in timtuahawknak dingah a si.

Thuphuan 17:14 hi cang danglam zet pakhat a si ih, himi ah tuufa thawn an doawk dingih tuufa le a kawhmi mi thianghlimpawl in an neh ding (cangantui lehlindan). Ziangatile amah cu Bawi hmuahhmuah lakih Bawibik siangpahrang hmuahhmuah lakih siangpahrang a si. A nasa zetmi ral doawknak ah meithal hriamnam ih thatawknak a si lo ding. Anmah kotu le hriltu hnenah rinumnak sawnin a si ding. Himi doawknak hi tulai tapungpawl in cozah an donak thawn a bangaw lo.

Armageddon ral kan simsal ahcun thinlung buainak thu a si. Himi ral donak hi thinlung khuaruahnak thuthen catnak a si ih, thah ih a ummi tuufa lamah thinlung pekih doawknak a si (Thup. 5:9,10,12; Thup. 13:8). (John Paulien, Armageddon at the Door, Hager Stown, Md: Autum House Publishing, Advision of Review and Herald Publishing Association 2008) pp. 193.

RETLANG DING:

1. **Thuphuan cabu sungih tarlan mi vekih thleng famkim dingah zumtupawl kha ziangtin so na bawm thei ding? Khavek hrilhfiah dan kha a hman lomi a si ti theifiang dingah anmah bawm dingin ziangtin so na pan thei ding?**
2. **Babulon ih thuneihnak kha lei killi a luah khat theh ti kan thei zo. A thuzirhnak ziangpawl so a si? A**

thuzirhmi kan hlon dingmi ziangpawl so a si tiah na hmuh?

3. **Tlawngkai ni khat ni ah E.G White ih a nganmi : “A thleng hrih lo mi kawhhran le leitlun uknak komaw ih Khrihfa cozah uknak an din ding: Cutik ah Babulon cu famkimten a siat ding” tiah a simmi kha Kawhhran le cozah uknak an komaw timi thu kha ruat aw. Kan hrangah ziangtluk ih fimkhurnak ding thu so in sim?**

ZIRLAI 13**June 23-29****KA BAWIPA JESUH RATSALNAK****SABAT TLAI LAM:****June 23**

TUZARH SIAR DING: Isai. 13:6,9; Matt. 24:30,31; Dan. 2:34,35; 2 Tim. 4:6-8; 2 Thess. 1:7-10.

BIBLE CANG KEN: “**Nisuahnak ihsin nitlaknak tiang hmakhat ih a tleu zukzo mi nimthla kau vekin milai fapa cu a ra ding**” (Matt. 24:27).

T.S. ELIOT in hitin bezai a ngan, “In my beginning is my end” ka hramthoknak hi ka netnak a si tiah a ti ih, tawi fel famkim, thutak hmual nei zetmi a suahpi. Kan hramthoknak thil ummi a netnak a thleng. Seventh-day Adventist timi kan hmin in a langter duhmi taktak cu Bible ih zirhmi thu pahnih sirhsan in a fehpi. Seventh-day kha thukhaam 10 sungih a palinak Sabat a sim duh. Cumi cu zarh khat sungih niruk sungah leitlun ih thilnung a ummi hmuahhmuah sersiam a sinak hminsinnak a si. Cule Adventist timi in kan Bawipa Jesuh ratsalnak kha a sawh duh. Himi hminah Bible sungih ruahsannak hmuahhmuah le thukam hmuahhmuah kumkhaw nunnak thukampawl tiangin a funtel theh ti kan hmu.

Leilung sersiamnak kan hramthoknak hi hlanlaipi a si zo ih, Jesuh ratsalnak le kan netnak, misual sinak a um mi cem netnak ihsin cun hlanlaipi a si zo nan, a tu tiang pehzomawknak a um. Pathian in in sersiam (John 1:1-3), a ra sal dingmi tla amah a si. “Netabik tawtawrawt

an tum tikah mitthep karah” (1 Kor. 15:52). Kan rundamnak tawpkhawk a thleng ding. Cumi ah kan hramthoknak ihsin kan cem netnak kan hmu ding.

Tuzarh sungah a netabik thil thleng ding mipawl kan reltlang ding. A tu kan leilung dinhmun thaw cun kan Bawipa Jesuh a ratsalnak ding hi a hlatawk tuk lai.

**THAWHSAL NI
BAWIPAI NI**

June 24

Jesui ratsalnak thu hi Thlung Thar sung lawngah a um tiah kan ruatah cun a dik lo a si. Jesui voi khat a ratnak a thihnak, a thawhsalnak le van a kainak in a ratsal leh ding thutak famkim le sullam nei zetin a langter. Thlung Thar ah tampi kan hmuu vekin Thlung Hlun khalah thil um leh dingmi thutak sunglawi hi a thlamin an langter zo. Jesui ratsalnak thu hi Thlung Thar ngantupawl in thutak thar an hmuuhmi a si lo. Bible sungih a um zo mi thutakpawl kha uar sawnin an cawisang.

Thinglamtaih a thihnak le Bawipa thawhsalnak in a ratsalnak thukam theihfiang sinsinnak le a sunloih-nak an theih famkimnak a si.

A tangih Bible cangpawl siar aw. Jesui ratsalnak thu ziangso in zirh? Isaiah 13:6,9; Zekha. 14:9; Dan. 12:1.

Bawipai ni hi siatnak ni, riahsiat ni le hloralnak ni a si. Nunnak cabu sungih hmin ngan mi hmuahhmuah Pathian zumtupawl luatnak ni a si (Fill. 4:3; Thup. 3:5; Thup. 13:8). Bawipa ni timi cu misualpawl an sual thuthennak can a si. Cui canah Pathian ih rinumtupawl cu humhim an si ding ih laksawng pek an si ding tiah Thlung Hlun sungah kan hmu. Cui ni ah mi hrekhat cun Pathian thinhengnak an tong ding. Asinan dingfel

thianghlimnak le tangdornak nun hawl dingin kawhnak a pomtupawl cu Bawipai thinhengnak ni tihnung kha an hnенah a thleng lo ding.

Matthai 24:30,31 siar aw. Jesui ratsalnak ni ah hloral dingmi le rundam mipawl thenfelnak ziangso in sim?

Ni netnak thil thleng mi ah khui tawkih ding ding so kan si? Rundamnak ih a dingsuaktu si thei dingin ziangvek duhhrilnak kan tuah ding?

**TLAWNGKAI NIKHAT
DANIEL LE JESUH RATNAK**

Judah miphun tampi in anmai sanah Jesuh, Messiah in Rome uknak nehtu ding le ramdang hnakih cak sawnih din dingah an beisei. Jesui vokhat ratnak le voi hnih ratnak hi ram uknak tuah dingah a ra lo. Pathian in amah zumtu mi rinumpawl hrangah an sunlawinak a tuahsak sawn. Sualnak ih siatsuah theh zo mi kan leilungpi kha a tharin a tuahsal ding.

Thuthlung Hlun sungah hi thu fiangte ih a langmi a um lo. Dan 2 nakih thutak phuanmi ah leithar kha a hlun mi leilungpi ihsin a hung suak lo ding. Lei thar kha a hramthoknak ihsin danglam zetih sersiam a si ding.

Dan. 2 ah a langmi cu leitlun ih ram uknak pali a hung suahmi cu Babulon, Media-Persia, Grik le a netabik Rom tla ans i. Rome hi Europe ram thendarhawknak a suahnak ram a si. Nibukhanizar in a mangah mizuk tumpi a hmuh tikah leitlun ah thuneihnak ropi zet neitu le nehnak cotupawl khiihmuhnak a si. A netnak ah a sunglawi zetmi Jesui rat hnu ih a um ding mi leilungpi thawn pehzomawknak a nei lo.

Dan. 2:34,35,44,45 siar aw. Hi leilungpi a cem netnak le leilung thar pakhat a um ding.

Himi Bible cangin Jesuh rat tikah ziang a cang ding timi thu fiangte ih sim loin a tanta. Luka 20:17,18 ah Jesuh in lungpi tiah as tarlang aw. Zokhal cui lungpi ih a nenmi cu an zam theh ding a ti. Dan. 2:35 kha Armaic tongih ngan mi siar ahcun sui, theh in ngun, cutheh ah dar le thir le tlak rawi mi hipawl dengzaam theh an si ding ih fanghi thli in a semhlo theh vequin anmai hmun kelih a umtu an um lo ding. Cui can cu leilung hlun kha Jesui rat tikah zianghman a tang nawn lo ding tinak a si.

Leilung hmaisa ih miphunpawl a siatsuah thehtu lungto kha tlang tum zetah a cang ih, leilungpi a khat theh tiah a ti. Himi uknak hi Jesui ratnak a si ih, "Ziangtik hmanah a siat nawn lo dingih kumkhua a hmun ringring ding" (Dan. 2:44).

Minung hmuahmuah hrangah thu cemnetnak pahnih a um. Jesuh a hngaktupawl cu lei thar ah an nung ringring ding. Jesuh thawn thenaw loin kan um tlang ringring ding. A hrekkhhatpawl cu a siatmi leilungpi ah fanghi vequin thli in semhlo dingah beidong zetin kan um ding. Asinan, kumkhua nunnak in kan zaten in hngak theh a si.

**TLAWNGKAI NIHNIH
CAN REIPI RAK THURMI (Longterm Prospects)**

Tita 2:13 siar aw. A sunglawi mi ruahsannak ziangso a sim?

Zirhtu pakhatin kan leilungpi hi amai zumnak in kum 13 billion rei ih hram a rak thok mi a si tiah a sim. Abu buih a ummi siarcawk lo thil fate tam zetin hlan laiah a rak um lo. Cui thil hlawmpawl cu a puakkui ih kan

leilungpi ah a thlengih an um tiah a sim. Hi mipawl sah zetih a ummi kha a um pangmi a si tiah a sim.

Tuzarh kan zirlai thuhmaihruai hminsing aw. Kan hramthoknak ihsin kan cem netnak kan hmu thei. Himi thu hi zirhtu ih a zirhmi sawn a si. Kan cem netnak hi can reipi um hman sehla, ruahsan ding a um lo. Kan leilungpi hi thil fate a hlawmhlawm in sah zet le siar cawk loih a ummi thil ihsin umsuak mi sisehla, thiamlo coternak, thihihak tivek tla a um lo ding. Hipawl hi milai hnenah can reipi ihsin a um zo mi a si.

Bible simdan thawn kan hramthoknak zohsal ahcun a hmuhdan hnakin thil umdan fumfe sawn le ruahsan ding tami tla a um. Kan hramthok thil umdan ah Pathian hnenih lungawi thusim ding kan si. Can reipi thil kan rak thlir rero mi kha a tha zetmi a si. A ra thleng dingmi hrangah ruahsan ding tami kan nei ih, hi mipawl tla Jesui ratsalnak thukam parah a thumaw a si.

2 Timote 4:6-8 siar aw. Paul in ziangthu so a sim? Ruahsan ding ziangso a si?

A rei hlanah Paul tla thah ding a si ih, rundam hnangamnak nei in Jesui ratsalnak a hngak. Jesuh a langnak kha Paul in ziangtin so a sim? (2 Tim. 4:8). Dingnak sui lukhum a hngakih amai dingfelnak si loin (1 Tim. 1:15) Jesui dingfelnak sawn kha Paul in ruahsannak a neihmi a si ih, Jesui ratsalnak ah a thumaw. A kiangkap ih thil um mipawl kha hngilh in a thabik mi kha a ruat (thih hngakin thawnginn sungih a um lai thil a si sawn). Paul in reipi a rak thlir rero mi kha a tha zetmi thil a si ti a thei. Tui amai dinhmun lawngin a thinlung ruahnak a luah khat lo, thil ziangkim a tha zawngin kaupi in a thlir sawn.

Tui na kiangih thil ummi kha hngilh aw. Paul ih a neihmi ruahsannak ziangtin so na nei thei ding?

Ruahsannak in pek ruangah hmailam thil kaupi ih thlirdan ziangtin so kan zir ding?

TLAWNGKAI NITHUM VAN IH MERO LAKAH

June 27

TAksa thawn a ra ding timi kha Bible simdan ih thulaimu a si. Khrihfapawl lawng si loin a rat lai a hmu hmuahmuah hrangah a thupi zet. Mi hrekkhatpawl in Jesui rat salnak ah amah rori ra loin, Thiang Thlarau in leitlun kawhhranpawl hnenah a um ding. A ratsal tikah Khrihfapawl ih ziaza ah hmuh theihin a famkimter ding tiah an ti.

Zirhnak dik lo a si ih, an ti vek sisehla can reipi kan hngak rero mi ruahsannak kan nei taktak thei kem?

A tangih Bible cang Thlung Thar sungh nganmi Jesui ratsalnak thupawl kha siar aw. Khrihfapawl umdan ziangso an langter.

Matthai 24:30
1 Thessalon 4:16
Matthai 26:64
Thuphuan 1:7
2 Thessalon 1:7-10

A khar-aw mi van kha a ong ding. Cutawk in Pathian Bawi tohkham ih a sunlawi tleunak a ra ding. Thli in hrampi a semih a hnih vekin tlang tumpipipawl tla an hnih ding ih, lungpawl tla hmuntin ah an sepdarhaw ding. To tum thlippi a hrangih tifinriat cu thinheng aw vekin a huk ciamco. Setan ih thlaphang au-aw cu to tum thlir hrang vekin siatsuahnak a thlentertu hnenah a au ciamco. Leilungpi cu tifinriat ih a dolhmi vekin a hlon hlo-aw ding.

Cule kan leilungpi kha a deng kuai aw theh ding. Thil hramthoknak zianghman um lo vequin a hlo theh ding. Tlang tumpipi an zomawknak pawl an hlo theh. Minung umnakpawl an lung theh. A sual zetmi Sodom khua vequin lawng colhnak khawlipipawl tla tidai in a dolh. A ropi zetmi Babulon kha Pathian in a hngilh lo. Pathian thinhengnak khuahai Sabit zu hran kha pek a si ding. E.G White, The Great Controversy, Pp. 637.

Jesui rat tikah lei can cemnak hi nasa zetin a um ding ti kan thei. Hi thil thleng theitu an um lo ding. Jesuh voikhat ratnak ih kan hrang a rak tuah theh mipawl kha vawi hniah a ratsalnak in a famkimter ding.

Atui kan nun ziaza in Jesui ratsalnak hrangah thathnemnak ziangvek in so a um? Kan nun ziangtluk in so a thupi ti hngilh lo dingah ziangvekin so in sim?

**TLAWNGKAI NILI
A NUNGMI LE A THI MI**

June 28

Thlan sung ihsin a rualpa Lazarus a thawh hlanah himi thu a sim. Keimah cu nunnak le thawsalnak ka si. Keimah I zumtu cu a thi khalle a nungsal ding (John 11:25). A thihnak a rei zo ih, a rim a sia zo mi kha ka thotersal ding tiah a simmi thu kha zum ding um lo an ti ko nan, Lazarus kha thihnak ih thotersal dingah a feh (John 11:39).

Jesui tuahmi hmutu a simmi thei ih a zumtupawl tla an thi ngaingai. Jesuh ih a simmi cu an thi khalah a nungsal ding tiah a ti. Himi hi a thi mi hmuahmuah thawsalnak a si. Himi Jesui ratsalnak hi ruahsannak kan neihmi hmuahmuah ih a hnukpi (a laimu) a si.

Jesui ratsal tikah amah a zumtu a thi mipawl parah thil thleng ding ziangso um ding? Rom 6:5; 1 Thess. 4:16; I Kor. 15:42-44,53,55.

Jesuh ratsalnak ih ruahsannak sang zet a neitu cu thihnak ihsin thawsalnak a si ding. Kha mi kha sankhat hnu sankhat a hnenah rinum ih a umtupawl ih tonnun a si. Jesui thawsalnak ah khan a hnenih mi rinum zetpawl in pumpak hrangah ruahsannak hngetkhoh zet an neihnak a si.

Jesui ratsal tikah a nungdampawl hrangah ziang thil so thleng ding (Fil. 3:21; 1 Thess. 4:17).

Jesui ratsal tikah taksa thihnak tong loih a luattupawl rinum zetpawl in thawsalnak tonnun an nei lo ding. Thihnak ihsin a thosaltupawl in thi thei lo nunnak nei loin vanlam thilitheinak Pathian mi thianghlim a nungmipawl in mittheep karah thi thei lo sinak ah an thleng ding. Anmah sunloihnak dingah Pathian ih a au suakmi cu “a tu ah annih cu thi thei lo mi ah an tuah zo” ti a si ding. Cule thihnak in a thosaltu mi thianghlimpawl thawn an Bawipa tong dingah lakso an si ding. E.G White, The Great Controversy, Pp. 645.

Na hrangah a thupi zetmi leithlun thilpawl kha ngan aw. Khapawl kha na hnenih pek mi kumkhaw nunnak hnakin na hrilsawn ding maw?

TLAWNGKAI NINGA

June 29

RUAH BET DING: Jesui ratsalnak kha misualpawl riahsiat ih an um hnu ih thunetnak bet cop mi a si lo. Jesui ratsalnak hi Khrihfa hrangah ruahsannak sunglawi a thleng mi a si. Himi um hlah sehra ziangvek so a si ding? A tui kan sinak vequin milai thuanthu ah beidonnak pakhat hnu pakhat, riahsiatnak pakhat hnu pakhat kan tong ding, kan thih ih kan cem ralni tiang a reh lo ding. Khrih ratsalnak beiseitu lakah kan tel ih, William Shakspear ih nganmi ah, “Thuanthu hi mi aa-pawl ih sim mi a si, san nei zianghman a um lo, Aatthlak tongnak men a si” tiah a ti.

Himi ruahsannak kan neih mi hi a tu le a tu Pathian thu ih in nemhnget sak rero mi a si. Jesui nunnak ih tlenmi kan si ruangah himi ruahsannak kan nei thei (Mark 10:45).

Cule tlennak man pek zo mipawl lak dingah a rasal ding. Kan hrangih a ratsalnak dingah vanih arsi-pawl in thusim ding an nein awn lo. Thingkung par ihsin vatepawl khalin an tlangaupi lo ding. Hipawl in an sinak umdan in kan hrangah ruahsannak thawn a khatmi thil tha tampi an langter zo. Nikhat ni ah Jesuh a ra ding tiah au in an sim lo ding. Van in tawtawrawt a thang ding ih, a thi mipawl kha siat thein awn lo dingin an tho ding. Cule kannih tla thi thein awn lo mi ah thleng theh kan si ding (I Kor. 15:5). Milai fapa hi ziangkim tithei vorhlam kapah to in vanih mero thawn a rat khal nan hmu leh ding. Cuih ni cu rak thlir uh tiah in zirh hai lo ding (Mark 14:62). Hi thupawl Bible ah kan hrangih sim theh zo mi a si ih, cui tongkam kha kan rinsan ding a si.

RETLANG DING:

1. **Mi hrekkhat ih zumdan vekin Jesuh ra lo ngaingai sehla, Khrih dungthluntu Khrihfapawl ih nundan thu kha ruat hnik. Ziangso a si ding? Ni netabik ni ah a um rori dingmi a si ih, ruahsan ding um loin ziangah so in tanta ding?**
2. **Tui sanih a lar zetmi leilungpi hi zianghman lo ihsin a rak umsuak a si timi thu hi ziangah so aatthlakza ruahnak a si kan ti thei? Kha vek ruahnak kha ziangah so minungpawl in an uar zet? Mi tampi in ziangah so an zum? Lei le van thuhla hrilhfiahnak ah ziangkim sersiamtu Pathian hi kumkhua in a nung ringring timi zum hi ziangah so daan vekih fehnak a si kan ti thei?**

3. **Kumkhua nunnak a lo pekmi hnakih thupi sawnah na nunih na ruah mi kha nan zirnak ah sim aw. Na rak nganmi thu ihsin zirmi a dang ziangso na neih? Mi tampipawl in an duhsawn mi ngai ding nei loih an um ahcun rundamnak ah himnak a um lonak thu theifiang dingah ziangtin so kan sim thei ding?**

MORNING WATCH
April 2018

1. Thawhsal Ni Marka 16:15
2. Tlawngkai Nikhat Galati 6:14
3. Tlawngkai nihnih 1 Johan 4:21
4. Tlawngkai nthum Saam 144:12
5. Tlawngkai nili Isaiah 59:9
6. Tlawngkai ninga Tirhthlah 20:20
7. Sabat Johan 3:16

8. Thawhsal Ni Joel 2:1
9. Tlawngkai Nikhat Rom 13:12
10. Tlawngkai nihnih Joshua 24:15
11. Tlawngkai nthum Luka 9:23
12. Tlawngkai nili Matthai 7:13, 14
13. Tlawngkai ninga Johan 15:5
14. Sabat 1 Peter 2:12

15. Thawhsal Ni Philippians 2:15
16. Tlawngkai Nikhat 2 Korin 3:2
17. Tlawngkai nihnih 2 Korin 6:1
18. Tlawngkai nthum Matthai 3:1, 2
19. Tlawngkai nili Johan 1:29
20. Tlawngkai ninga Luka 1:17
21. Sabat Rom 12:1

22. Thawhsal Ni Galati 2:20
23. Tlawngkai Nikhat Tahhla 3:27
24. Tlawngkai nihnih 1 Johan 2:14
25. Tlawngkai nthum Tirhthlah 1:8
26. Tlawngkai nili Matthai 10:8
27. Tlawngkai ninga 1 Johan 1:3
28. Sabat Rom 10:2

29. Thawhsal Ni 2 Timothy 2:19
30. Tlawngkai Nikhat Johan 20:21

135

136

MORNING WATCH
May 2018

1. Tlawngkai nihnih Isaiah 43:2
2. Tlawngkai nthum Saam 34:7
3. Tlawngkai nili Tirhthlah 5:29
4. Tlawngkai ninga 2 Piter 3:16
5. Sabat Rom 1:21

6. Thawhsal Ni 1 Timote 6:20
7. Tlawngkai Nikhat Daan Peksaalnak 29:29
8. Tlawngkai nihnih Tirhthlah 1:7
9. Tlawngkai nthum Luka 17:26
10. Tlawngkai nili 1 Korin 4:9
11. Tlawngkai ninga Tahhla 11:9
12. Sabat 2 Timote 4:3

13. Thawhsal Ni 2 Timote 3:13
14. Tlawngkai Nikhat 1 Johan 3:13, 14
15. Tlawngkai nihnih Matthai 5:28
16. Tlawngkai nthum Isaiah 56:12
17. Tlawngkai nili Saam 101:3, 4
18. Tlawngkai ninga Luka 10:27
19. Sabat Filipi 3:2, 3

20. Thawhsal Ni 1 Piter 5:8
21. Tlawngkai Nikhat Thuphuan 6:12
22. Tlawngkai nihnih Joel 2:31
23. Tlawngkai nthum Matthai 24:29
24. Tlawngkai nili Thuphuan 9:14, 15
25. Tlawngkai ninga Efesa 5:3
26. Sabat 1 Korin 14:32, 33

27. Thawhsal Ni Matthai 7:15
28. Tlawngkai Nikhat Isaiah 8:20
29. Tlawngkai nihnih Luka 17:1
30. Tlawngkai nthum Matthai 7:19, 20
31. Tlawngkai nili Saam 69:32

MORNING WATCH
June 2018

137

1. Tlawngkai ninga Amos 3:7
2. Sabat Zefaniah 2:3
3. Thawhsal Ni Daniel 7:25
4. Tlawngkai Nikhat Saam 94:20, 21
5. Tlawngkai nihnih Thuphuan 13:14
6. Tlawngkai nithum 2 Thesalon 2:3
7. Tlawngkai nili 1 Johan 4:1
8. Tlawngkai ninga Isaiah 8:20
9. Sabat 2 Thesalon 2:8, 9
10. Thawhsal Ni Thuphuan 13:12
11. Tlawngkai Nikhat Thuphuan 14:6, 7
12. Tlawngkai nihnih Thuphuan 14:8
13. Tlawngkai nithum Thuphuan 14:9, 10
14. Tlawngkai nili Malakhi 4:5
15. Tlawngkai ninga Jeremiah 25:32
16. Sabat Thuphuan 7:1
17. Thawhsal Ni Thuphuan 12:12
18. Tlawngkai Nikhat Matthai 10:16
19. Tlawngkai nihnih 2 Timote 4:2
20. Tlawngkai nithum Saam 119:126
21. Tlawngkai nili Matthai 24:15, 16
22. Tlawngkai ninga Matthai 6:34
23. Sabat Jeim 5:7
24. Thawhsal Ni Thuphuan 13:17
25. Tlawngkai Nikhat 2 Korin 6:17
26. Tlawngkai nihnih Matthai 10:7, 8
27. Tlawngkai nithum Matthai 24:9
28. Tlawngkai nili Thuphuan 17:12, 13
29. Tlawngkai ninga Thuphuan 13:3
30. Sabat Thuphuan 18:4